

**NATIONAL ASSEMBLY OF  
SEYCHELLES**

*Wednesday 04<sup>th</sup> August, 2021*

*The Assembly met at 09am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour Manm Onorab e bonzour nou piblik a lekout. Byenveni pou nou travay ozordi. Nou annan en *Statement* par en Minis, Minis Zafer Entern pou komanse.

Aprè nou annan 3 Mosyon lo *Order Paper* ki mon pe plan pou pran dan lord ki zot ete lo papye. Savedir Mosyon, Mosyon Onorab William premye, Mosyon Onorab Henrie dezyenm e Mosyon Onorab Cosgrow trwazyenm.

Avek sa pou komanse, nou ava apel Minis pou Zafer Entern silvouple. Mon a zis partaz avek zot *Order 38* lo *Statement by Ministers*.

*'A Minister may make a Statement to the Assembly on behalf of the Government on any matter for which the Government is responsible, and*

*the statements may not be debated, but at the discretion of the Speaker, questions may be asked by Members for the purpose of elucidating any matter of Act with which the Statement deals.*

*Thank you. Bonzour Minis Errol Fonseka, Minister of Internal Affairs e Mrs Ina Laporte Director of the Trafficking In Person Secretariat of the Ministry of Internal Affairs. Minis mon envit ou pou fer ou Statement. Thank you.*

**MINISTER ERROL FONSEKA**

*Thank you Mr Speaker. Mr Speaker, Leader Lopozisyon, Leader of Government Business, tou Manm Lasanble, tou dimoun dan Lasanble la e tou dimoun a lekout bonzour. Mesaz lo Trafik Imen avek Lasanble Nasyonal ozordi.*

*Mr Speaker, trafik imen i en krim ki pran diferan laform e ki vyol drwa imen fondamantal en dimoun.*

*Sesel i angaze dan sa lalit pou konbat trafik imen, e an Zilyet 2021, ti inisyé en kour 3 zour an kolaborasyon avek UNODC, pou evalye efikasite Lalwa Prohibition of Trafficking In Person Act, 2014.*

*Lobzektif sa latelye ti pou reviz sa Lalwa e Polisi, sirtou kot i konsern prevansyon e*

prosekisyon sa bann tel kalite krim. An Avril sa lannen, Minister pou Zafer Entern ti etabli en *Secretariat* pou Trafik Imen.

Sa ti ganny fer an *accordance* avek sa *Act*. Sa *Secretariat* i ganny dirize par Mrs Ina Laporte, koman Direkter.

Avan etablisman sa *secretariat*, PS Linda William-Melanie ti diriz *National TIP Committee*. Koman son *Chairperson*, ti pe donn tou zefor posibil pou esey konbat sa lalit kont sa krim.

Sa lannen, Sesel i fyer ki son pozisyon lo lalis trafik imen in amelyore, sorti lo *Tier 2 watch list* pou vin lo *Tier 2*. Sesel in fer gran progre dan lenplimantasyon bann mezir kot i konsern prosekisyon e konviksyon ki'n relye avek trafik imen.

Par egzanp, lannen 2020 ti annan 1 prosekisyon konpare avek 12 dan lannen 2021. Konviksyon ti 3 sa lannen, konpare avek 0 dan lannen 2020.

Sa pa vedir ki ka trafik imen in ogmante, i zis montre ki nou pli *proactive* ki avan. Le 30 Zilyet ti Lazournen Mondyal Kont Trafik Imen e pou komemor sa Lazournen enportan, nou Sekretarya

Trafik Imen in lans en *hotline*, limero 114 - 114.

Sa *hotline* i pou aprezan fer li posibil pou dimoun kapab raport bann ka trafik imen, ou menm bann ka sispe.

Nou'n osi met bann poster kot Biro Imigrasyon *Customer Service*, ki baze lo *Ground Floor, Independence House*, pou sansibiliz manm piblik lo sa size. Sa lalit i espesyalman bezwen korporasyon tou bann Departman Gouvernman e bann NGOs.

I enportan pou tou Departman ki annan en rol pou zwe dan sa konba trafik imen, par egzanp Lapolis, Imigrasyon, Lanplwa, Lenstitisyon Drwa Imen e bann NGOs, zot konpran e apresye limit bann lareg e regilasyon zot departman respektif.

Sa i a kapab permet ki *TIP Sekretarya* i akonpli son lobzektif e manda avek efikasite.

Krim trafik imen ki pli komen, se eksplwatasyon travayer imigran, me nou pe osi dekouver eksplwatasyon seksyel kont zanfan e menm adilt.

Sesel i *reaffirm* lenportans sa konvansyon *United Nations* ki in sinyen;-

*'Commercial Universal ratification of the united nations*

*convention against transnational organized crime and the protocol to prevent, suppress and punish trafficking in persons, especially against women and children.'*

Sa i mon rapor pou Lasanble. Mersi Mr Speaker, si zot annan okenn kestyon, mon la ek Mrs Laporte pou nou kapab asiste zot. Mersi Mr Speaker.

### **MR SPEAKER**

Mersi. Annefe, Minis, wi, si nou pou annan kestyon pou Mrs Laporte, mon krwar nou pou bezwen pas dan Komite parey *Standing Order* i dir dan sa seksyon.

So a la mezir ki nou a pran kestyon pou Minis, e si i annan kestyon ki al pou Mrs Laporte nou a kapab *defer* li pou en peryod ki nou a kapab pas dan Komite.

Mon ava envit entervansyon bann Manm dan prosedir labitid pou kestyon. Onorab, lekel ki laba. Onorab Woodcock.

### **HON WAVEL WOODCOCK**

Mersi Mr Speaker. Bonzour Minis avek ou delegasyon. En kestyon ki mon annan, kot i konsern sa 2021 *Trafficking In Person Report*, kot Sesel wi nou ganny *upgrade*

sorti lo *Tier 2 watch list* pou vin lo *Tier 2*.

Mon pe get bann, sa rapor la devan mwan. Zisteman sa rapor ler ti sorti, ti'n dir poudir en Sekretarya pa ti ankor ganny etabli, la nou fek etabli enn *as of April*.

E i annan lezot defayans ki zot in fer resorti, kot zot dir poudir ki Gouvernman pa'n *implement its standard operating procedures for victim identification and referral of each victim assistance mechanism*.

Aprè en *case* osi ki'n ganny fer sorti, se ki napa en *care facility* pou ankadre sa bann viktim. *Let's say* parey i annan bann ka kot, nou'n war dan lepase, kot i annan bann etranze ki'n ganny *mistreated* par bann anplwayer Sesel.

Me selman napa en landrwa pou anmas sa bann dimoun pou ankadre zot. Alor en pti pe lo en pe sa bann defayans ki'n ganny fer sorti dan sa rapor.

Ki zot pou fer pou zot *improve* lo la? E plizoumwèn ki enn de bann desizyon ki zot pou fer en pti pe pli imedya, pou *improve* nou pozisyon lo sa *watch list*? Mersi bokou.

### **MR SPEAKER**

Mersi Onorab. Minis. *Point of order* wi. Onorab Pillay wi.

**HON SEBASTIEN PILLAY**

Mersi Mr Speaker. Mr Speaker mon krwar i ava pli, i ava pli *prudent* pou nou ganny en Mosyon *to resolve into a Committee of the Whole House* avan ki ou pran bann kestyon.

Akoz i pou inevitableman annan nesesite pou teknisyen reponn kestyon, anba 38(2) Mr Speaker.

**MR SPEAKER**

Wi. Anfen, mon krwar.

**HON SEBASTIEN PILLAY**

I depan lo ou. Mon krwar, mon krwar i pou fer plis sans.

**MR SPEAKER**

Ou annan en pwen. Akoz Minis i kapab touzour li osi i reponn kestyon dan Staz Komite si i nesese. Eski i annan okenn lobzeksyon lo la sorti kot Lasanble?

Akoz si, mon krwar Onorab Pillay si napa obzeksyon nou kapab fer sa ki ou pe dir. Onorab *LGB* ou pwen lo la.

**HON BERNARD GEORGES**

Mersi Mr Speaker. Mr Speaker mon konpran Onorab *Leader* Lopozisyon. Mon ti'n

konpran ou, poudir ki si napa okenn kestyon ki pou vin pou Mrs Laporte, dan sa ka nou pa pou bezwen al dan Komite e Minis ava dil avek sa bann kestyon.

Me se *only if there is a question for Mrs Laporte* ki nou bezwen al dan Staz Komite. Me *to avoid* okenn problem, *it's probably best* ki nou al dan Staz Komite la.

**MR SPEAKER**

Nou al dan Komite. Wi

**HON BERNARD GEORGES**

E avek ou permisyon alor, mon Mosyon se ki sa Lasanble i *resolve* pou antre en *Committee of the Whole House* pou nou demann kestyon Minis. E si posib ou si i nesese avek Mrs Laporte ki pe akonpany li. Mersi.

**MR SPEAKER**

Mersi. Mosyon a ganny segonde. Wi Onorab Woodcock.

**HON SANDY ARISSOL**

Bonzour Mr Speaker, bonzour Minis avek Mrs Laporte, bonzour tou Manm. Mosyon i ganny segonde Mr Speaker.

**MR SPEAKER**

Mersi. Nou a vote pou sa Mosyon silvouple. Bann ki an faver? Mersi. Okenn Manm ki kont? Bon lo Mosyon pou pas dan Komite, 23 Manm in vot pour, 0 kont e 9 abstansyon.

Serzan mon avan demann ou pou nou pas dan Staz Komite silvouple. Minis ou a kapab prosede avek repons pou Onorab Woodcock.

### **MINISTER ERROL FONSEKA**

Mersi Mr Speaker. Mersi Onorab pou ou keston. Onorab sa bann lalis ki ou'n mansyonnen la, preski tousala nou'n konplet. I annan en *area* ki vreman pou pran en bon pe letan pou konplet.

I - ou konnen nou Sekretarya zis pou redonn zot en pti pe *background*. Nou Sekretarya i pe diriz sa.

Me selman *the* konesans en lenportans e mannyer pou detekte sa bann tel ka, nou bezwen annan korperasyon, pa zis Lapolis, Imigrasyon, *Customs*, bann dimoun ki resevwar dimoun par egzant Lanplwa.

Nou osi bezwen bann dimoun parey dan Lopital, bann ners ki konpran sa. Laplipar i konpran sa. Bann *teachers*, bann dimoun ki ansarz zanfan, *daycare*, tou bann zafer koumsa.

E nou *UNODC* i anvi war nou pe aranz bann *training*. E sa i en keksoz primordyal ki zot bezwen vwar nou pe fer. E sa lo sa bout ki nou pa ankor *fully in march* lo la.

Me selman nou'n komans fer en pe *training* lo bann *Task Force* ki pou travay pou al, pou travay dan zot Departman. So nou pe fer progre lo la. Me selman nou annan en kantite larout pou arive. Mersi Mr Speaker.

### **MR SPEAKER**

Mersi. Onorab Cosgrow.

### **HON WALLACE COSGROW**

Mersi Mr Speaker. Bonzour Mr Speaker, bonzour Minis. Bonzour Mrs Laporte. Bonzour tou Manm Onorab. Minis ti annan en Komite *Trafficking In Persons* avan Sekretarya i ganny kree.

Eski Minis i kapab dir nou ki pou arive ek Komite, ki laform Komite pou pran anvi ki la i annan en Sekretarya. E en Sekretarya normalman i tonm anba Minister.

Epi Minis i kapab dir nou, eski bann *case* ki nou'n nonmen taler, ki'n ganny prosekite sa lannen, eski i bann nouvo *case*, ouswa eski i bann ka ki ti pe ganny *investigate over* en peryod letan? E ki sa

lannen zot in nobou kapab anmenn an prosekisyon? Mersi bokou Minis.

**MR SPEAKER**

Mersi Onorab. Minis.

**MINISTER ERROL FONSEKA**

Mersi Onorab pou ou kestyon. *Ok*, ou kestyon lo *TIP Committee*, e la mon bezwen salye *PS Melanie* ki'n travay byen serye. Mon krwar i ti en nespes *stalwart* lo sa size.

E, me selman problem ki sa Komite, ti'n mank sa Sekretarya. Sa Sekretarya li menm li ki *coordinate* sa - Komite ti dil ek bann ka pou ler dimoun i vin kot zot anba *PS Melanie*, ti ed zot omwen posib ki zot ti kapab fer.

Me la nou pe al dan *prosecution*. So ti annan en kantite sa bann sityasyon ki nou pe al for dan *prosecution* la. E sanmenm la, ou pe war, nou pe ganny sa bann rezilta. E sa i ganny fer par Sekretarya.

So sa i *the role of the Sekretarya*. Me Komite i egziste e i *reports to the secretariat*. Selman nou, nou pe fer en keksoz en pti pe pli konplet la. So nou pe ganny sa bann rezilta ki nou pe gannyen.

E byensir nou remersye bann dimoun ki pe ed nou dan

tou nou bann diferan *NGOs* lo la. Mersi Mr Speaker.

**MR SPEAKER**

Mersi. Onorab Cosgrow.

**HON WALLACE COSGROW**

Mersi Mr Speaker. Mr Speaker i annan sa dezyenm bout ki mon'n demann *regarding* bann *cases* ki ozordi dan prosekisyon.

*Are they new cases*, ouswa zot bann *cases* ki'n la, ki'n ganny *investigate*, e ki finalman in ariv lo en staz prosekisyon? Mersi.

**MR SPEAKER**

Mersi Onorab. Minis.

**MINISTER ERROL FONSEKA**

Onorab sa bann *cases* ti la, selman pa ti a pe ganny *fulfill*. So *we've taken up* e nou'n *execute*. Mersi.

**MR SPEAKER**

*Thank you*. Onorab Adelaide.

**HON FRANCOIS ADELAIDE**

Bonzour Mr Speaker. Bonzour Minis. Bonzour Mrs Ina e tou Manm Lasanble e dimoun ki a lekout. Mr Speaker sa topik *human trafficking* i en topik ki i en pe sansib. E vi ki mwan koman *Vice-Chairman* lo Defans avek Sekirite, i enportan

ki bann Manm ler zot demann zot kestyon.

Si i annan bann kestyon ki vremen pertinan ki Minis pa kapab reponn. I enportan ki zot konsilte zot Manm lo *Caucus Security and Defence Committee*.

E nou, nou a fer le neseler pou zot ganny bann larepons ki zot annan. Akoz pa tou keksoz ki nou kapab koz devan lo televizyon la. E akoz petet i kapab anmenn bokou bann douler pou bann lezot dimoun.

*So please* annou *stick* lo kestyon ki direkteman en pe lo sa topik ki nou pe koze. Me selman detay silvouple, annou pa tro al ladan.

Petet mwan mon kestyon pou Minis, se ki, Minis, in regards to *human trafficking*, tou kou nou get sa laspe kot nou pe ale nou pe al, par egzantp nou'n tande i annan sa bann zafer drog.

Kot nou pe donn en dimoun, e petet pou en sonm larzan. Apre ler sa sonm larzan i fini, sa dimoun i tournen. E i al pli lwen ki sa.

E petet nou kapab donn larzan, me nou pe sakrifye en lekor, sa dimoun i kapab pa tournen. E i ganny servi koman en bouke tanzantan pou ou ganny larzan, ganny larzan.

Petet eksplik en pti gin la popilasyon.

Akoz ki i vremen enportan pou nou pa antre dan sa pratik. Akoz *once* ki nou *committed*, apre sa keksoz i pa vin parey. E nou trouve ki nou perdi en lavi e sa dimoun i kapab zanmen retournen.

### **MR SPEAKER**

Mersi. Minis.

### **MINISTER ERROL FONSEKA**

Onorab mersi pou ou kestyon. E mon kontan ou'n *set the scene* en pti gin lo ki bann keksoz ki nou kapab koz lo la. Me ou konnen, sa size *human trafficking* la, i enportan ki tou fanmir i konpran en pti gin.

Pa en pti gin, i konpran ki pe arive dan nou latmosfer, dan nou klima ozordi ki keksoz ki pa ti abitye arive, ki pe arive dan nou Sesel.

Me an menm tan nou bezwen konpran osi ki nou pa bezwen donn nide dimoun pou servi sa bann sityasyon. So sa balans *of* lenformasyon deor, nou bezwen sansibiliz dimoun, sansibiliz bann *teachers*, sansibiliz bann *carers*, pou konpran sa bann zafer.

Wi, me i enportan ki nou diskre osi lo serten size. Lo lo kestyon pertinan ki ou pe koz lo

bann *hostage takers*. Mwan mon krwar mon pa pou al tro lo la.

Zis mon pou dir, sa *slide* ki nou ti war, sa pti *video* ki nou ti vwar, i ase pou fer sa ka ki nou pa devret fer sa ek nou frer. Mwan mon krwar tou se la, laplipar Seselwa in vwar sa.

E nou pe travay serye lo sa bann size. *Obviously* serten keksoz i *restricted*. Me mon kontan ou'n fer apre sorti e mon ti a kontan zis *again* fer dimoun konpran ki sa bann keksoz serye. Nou bezwen fer sir ki, zot pa ganny tante pou al ladan.

E zot bezwen endik zot bann zanfan lo la. Ou konnen, en ponnyen bann zenn manrmay ganny enfliyanse fasilman. So nou bezwen bann paran la pe koz en pti pe plis lo la. Mersi Mr Speaker.

### **MR SPEAKER**

Mersi. Onorab Esparon.

### **HON REGINA ESPARON**

Mersi Mr Speaker. Bonzour Minis ek Mrs Laporte. Mr Speaker mon ti ava anvi zis klarifye avek Minis oubyen Mrs Laporte, parski trafik imen i en *two-way traffic* sa. Ou konpran mwan? Prezan nou annan sa bann ki lokal isi.

E nou annan parey Minis fek dir, bann dimoun ki ganny

anvoy deor pou *human trafficking*. Nou annan osi Minis, dan lepase nou'n annan bann dimoun ki'n vini dan bann *flight* spesyal avek en kantite dimoun.

Kot nou'n tande poudir i annan bann madanm zot pe fer trafik imen avek. Eski sa departman i pou dil avek tou sa bann sa. Oubyen i annan serten ziridiksyon pou li *operate*? Mersi.

### **MR SPEAKER**

Mersi. Minis.

### **MINISTER ERROL FONSEKA**

Mersi Onorab pou ou kestyon. I annan *crime* ki ganny detekte par *Customs officer*. Sanmenm, son responsabilite i pou sansibiliz sa bann diferan Departman pou en pti pe pli vizilan.

So en kantite sa bann ka ki ou'n koze, lo dimoun ganny anvoy isi koman diferan, pou fer diferan keksoz. Dan *Customs* ler nou *train* nou bann *Customs officer* zot fer *profiling* e zot pe regarde lo la.

E prosekisyon i ganny pran Lapolis natirelman. Me i pa zis en louvraz Sekretarya sa. Sekretarya i la pou fer tou dimoun konpran sa menas, konpran ki mannyer dan ki fason i kapab ganny prezante



devan zot, devan zot diferan louvraz.

So sa i son louvraz pou fer sa bann diferan Departman ki resevwar sa bann trafik kapab detekte. *So detection* i enportan e *prosecution* i normally Lapolis. Mersi Mr Speaker. *I hope* mon'n reponn ou kestyon.

### **MR SPEAKER**

Mersi Minis. Onorab Labrosse.

### **HON RICHARD LABROSSE**

Bonzour. Mersi Mr Speaker. Bonzour Minis, bonzour tou dimoun ki a lekout e bonzour tou koleg Manm. Minis mon'n ekout ou rapor, byen enteresan bomaten.

Me selman ki'n vin dan mwan ler mon ti pe regard, ler nou pe regard trafik imen par egzant dan Sesel li menm. I annan en *NGO* ki mon krwar zot in fer en louvraz vreman remarkab dan sa travay.

Zot osi zot in anmenn bann *case* mon krwar devan pou ganny zize. So mon kestyon la pou ou Minis, avek sa nouvo lapros, nouvo fason fer, nouvo Gouvernman, ki zot lapros zot pe pran konsernan bann groupman sosyete sivil dan sa lalit kont trafik imen?

E apre mon dezyenm kestyon, ler nou pe koz sansibilizasyon osi, mon pa'n

tro tann ou met en pti pe plis parey lo bann zanfan en pti pe pli zenn, parey dan segonder, menm kekfwa dan primer.

So la ankor, ki lapros zot pe fer pou sansibiliz plis nou bann zenn, kwa trafik imen pou zot osi konmans ganny sa keksoz byen zenn dan zot lespri. Mersi Mr Speaker.

### **MR SPEAKER**

Mersi Onorab. Minis.

### **MINISTER ERROL FONSEKA**

Mersi Onorab pou ou kestyon. Byensir bann *NGOs* nou'n travay seryezman ek zot. *Human Rights, ARID, you know, Employment, Union.*

So i kolaborasyon ek sa bann diferan Departman i pe mars byen. Ou kestyon lo bann zenn manrmay, *the teachers*, Ou konnen, nou, nou louvraz nou en pti Sekretarya.

So nou fer sir ki nou train dimoun pou fer sa louvraz pou nou. Savedir dan sa ou bezwen *target* sa bann manrmay zot menm, nou pou al ver *teachers*. Ou konpran mwan?

Bann dimoun ki ansarz la, i pou pli fasil pou nou fer sa. Akoz nou napa sa-nou napa sa kapasite pou penetre dan tou sa bann Departman. So sanmenm sa nou stratezi.

Nou, nou rod bann, nou *headhunt* bann dimoun ki kapab *train*. Nou, nou *train* zot apre zot a *train*, zot a fer sa loubraz zot menm. So sanmenm sa nou stratezi lo sa fason. Mersi Mr Speaker.

**MR SPEAKER**

Mersi. Onorab Vidot.

**HON AUDREY VIDOT**

Mersi Mr Speaker. Bonzour Mr Speaker, Minis ek ou delegasyon ek tou dimoun ki pe a lekout.

Minis, mon konnen lepase ti annan bann striktir ki ti egziste dan bann diferan Departman Gouvernman, espesyalman lo kote lazenes kot ti annan bann *peer educators*.

E bann *peer educators* ti tous pros avek bann zenn. An term pou pli kapab annan sa lapros pou pas zot bann danze ki egziste otour zot kategori laz.

Letan ou pe koz lo sa laspe ledikasyon, petet atraver sa Sekretarya, nou konnen poudir Bidze 2022 pe vini, petet an term, menm si ou pe dir pou *train* bann *teachers*, mon santi ki i enportan osi ki i annan bann lenstitisyon skoler kot i annan bann *peer educators* ki bann lekol i kapab idantifye.

Ki osi kapab angaz zot pou zot kapab *attend* bann

*training* parey. Sa i a permet, akoz parey nou dir, bann zenn i toultan rod enn ki dan son kategori laz, parfwa ki kapab alez pou li koz avek.

E i enportan ki sa i ganny konsidere. E pou ed zot dan sa ledikasyon, akoz prenon kont ki menm si nou en pti pei, nou vilnerab en kantite.

E nou'n vwar lepase bann *case* kot nou bann zenn fiy ek garson pe ganny servi pou larzan.

So i enportan ki zot osi zot ganny *train* ki i kapab prepar zot pou idantifye e kapab vin lavwa pou anmenn, pou idantifye kote sa bann zanfan pe ganny targete, sa bann group laz, e annan plis sa ledikasyon ki dekoul dan sa group laz. Mersi Minis.

**MR SPEAKER**

Mersi Onorab. Minis.

**MINISTER ERROL FONSEKA**

Mersi Onorab pou ou kestyon ek sizesyon. Ma les Mrs Laporte eksplik en pti gin nou *Awareness program* lo sa bann size ki pli okouran ki mwan. Mersi.

**MR SPEAKER**

Mersi. Mrs Laporte.

**DIRECTOR OF THE  
TRAFFICKING IN PERSON  
INA LAPORTE**

Bonzour Mr Speaker, Manm Lasanble e piblik a lekout. Wi nou annan en *Awareness program* ki nou'n komanse *from* le 30 Zilyet. E nou an diskisyon avek en group ki apel *Crime Watch Seychelles*.

En group ki byen aktiv lo *Facebook*, pou asiste avek sa, *to sensitize* dimoun. E osi i annan en plan pou nou al dan lekol. E osi akoz *Trafficking In Person*, nou Sekretarya nou pe, en pti pe pli for lo prevansyon.

Alor i enportan ki wi nou *reach* bann zenn dimoun *through* bann *Educational Institution* pou kapab fer sa prevansyon. So i en keksoz lo nou lalis.

E, osi si mon ti kapab mansyonnen poudir nou annan en *Special Task Force* e sa *Special Task Force* ki osi i pou an diskisyon kwa ki nou pou fer an plis pou *awareness*.

**MR SPEAKER**

Mersi. Wi Onorab Vidot, oule *follow-up*. Mikro silvouple Mrs Laporte.

**HON AUDREY VIDOT**

Yes, petet Mr Speaker zis en pti sizesyon. Nou ti ava swete dan sa bann program

*awareness* osi si zot ti kapab dekoul li lo nivo lokal. Kot petet atraver Ladministrasyon Distrik, kekfw, vi ki zot travay pre avek bann *Council* lekol.

Ti ava byen ki i annan bann program ki zot kapab enkli pou ganny bann *educators* ki zot pou *train*, ki kapab osi sansibiliz plis nou bann zenn lo nivo lokal. Mersi.

**MR SPEAKER**

Mersi. Mrs Laport son sizesyon in ganny note? Mersi. Onorab Aglae.

**HON EGBERT AGLAE**

Mersi Mr Speaker. Bonzour Minis ek Mrs Laporte. Minis sa size *human trafficking* i en size ki serye e ki annan bokou latansyon mondyal konsernan sa bann kalite aktivite.

Akoz i pa zis pran en dimoun deplas li. Me i annan bann aktivite ilegal ki swiv apre. Minis baze lo sa, mon ti a kontan, vi ki Sesel osi i form parti Nasyon Ini, anba protokol anba *UNODC* pou nou kot i konsern *human trafficking*.

Eski petet ou kapab dir nou de lavan - akoz sa sityasyon ki Sesel i pa'n neserman sa kantite serye. Me nou bezwen protez sa kalite

aktivite ki i pa vin en keksoz ki pou detri.

Lo kote kad legal, vi ki nou bann Lezislater, eski bann *legal framework* zot satisfè ki i ase azour, ki anmenn ase proteksyon pou kours bann endividi?

E dezyenman, vi ki zot pe mazin re ankadre fason vwar sa *human trafficking*. Eski kot i konsern en *reporting system*, - ler mon pe koz en *reporting system*, mon pe koz kot i ava annan bann endividi ki kapab vini, *flag* bann konsern ki zot sispèkte i *human trafficking*, dan en fason vreman profesyonnel.

Ganny resevwar san ganny osi pou lenformasyon i bezwen ganny devwale kot i sorti. Eski zot pe mazin etabli en laliny kominikasyon ki dimoun i kapab vin devan, denons bann aktivite osi, dan en fason ki profesyonnel. Mersi.

### **MR SPEAKER**

Mersi. Minis.

### **MINISTER ERROL FONSEKA**

Mersi Onorab pou ou kestyon. Lo kestyon *legal framework* mon krwar nou annan ase. E zis pou fer referans, sa i en size ki *CJ* i pres

ek son leker osi, in ed nou en kantite lo sa *area*.

So sa nou *ok*. Mon ti a kontan demann Mrs Laporte pou koz en pti gin lo lot bout, lo *flagging professional reception*, apre bann kominikasyon ki nou annan an mars. Mrs Laporte.

### **MR SPEAKER**

Mersi. Mrs Laporte.

### **DIRECTOR OF THE TRAFFICKING IN PERSON INA LAPORTE**

Permet mwan koz en pti kou lo sa *legal framework*. Le 6 ziskan le 8 Zilyet, *UNODC* ti vin donn nou en *training* zisteman pou gete si nou *legal framework* i azour.

E osi menm avan *UNODC* i arive, *Attorney General's Office* in konmans en konsiltasyon, pou gete si zot pe propoze pou anmenn *the witness protection* dan sa *Trafficking In Person Act*. So son *legal framework* wi i pe ganny regarde.

*In regards to* en *reporting system*, sa *hotline* i en *hotline* ki ler ou *call* ou pa neserman bezwen donn ou non.

Pou annan bann *key information* ki pou ganny demande. E zisteman i pou nou kolekte data pou war konbyen *call* nou gannyen pou sa kalite rapor. E *then the referral to*

*these calls, i ava ganny fer to respective department.*

Akoz ou pou war ennler petet sa ki en dimoun i krwar en *Trafficking in Person crime* i *actually* petet zis en *employment crime* ki ou kapab ganny adrese kot Lanplwa.

**MR SPEAKER**

Mersi. Wi Onorab Aglae klarifikasyon. Mikro silvouple.

**HON EGBERT AGLAE**

Mersi Mrs Laporte. Mon ti a kontan petet demann ou, zot relasyon travay, sirtou avek Imigrasyon, Minister Lanplwa.

Akoz souvandfwa dan konteks Sesel mon pe koze la, bann keksoz ki ganny *flag* i lye avek serten *GOP* ki ganny donner, serten etranze ki pou antre premyerman.

E apre lentansyon ki zot ti pe vin fer i sanze. So eski zot annan en lantant konversasyon avek sa 2 Departman pou kapab osi fer zot travay pli fasil. Mersi.

**MR SPEAKER**

Mersi. Minis. Mrs Laporte wi.

**DIRECTOR OF THE TRAFFICKING IN PERSON INA LAPORTE**

*Ok, sa National Trafficking In Person Committee son*

reprizantan se *PS Imigrasyon, PS Lanplwa*, en reprizantan *from, Foreign Affairs.*

Alor zot, i annan sa kordinasyon pou konnen ki pe arive lo sa size. Me *additionally* sa *Special Task Force* i konpri Lapolis pou *investigation*, Lanplwa, Imigrasyon e *Social Services.*

So i pou annan sa kordinasyon, *the Special Task Force* 1 son *induction* i konmans ozordi. *So the way forward is*, wi, nou pou annan sa kordinasyon.

**MR SPEAKER**

Mersi Onorab. Onorab Michel Roucou.

**HON MICHEL ROUCOU**

Mersi Mr Chair. Minis bonzour. Mrs Ina bonzour. Bonzour spesyal pou tou zabitan Mont Fleuri. Minis eski zot pe travay lo en bon sistenm *profiling?*

Akoz nou vwar poudir se ki i annan bokou bann etranze ki ler zot vin travay isi parey Onorab Aglae in dir, ki apre zot tant pou sanze, zot ganny pou zot marye osi tou isi, e ki nou konn en pti pe zot *background.*

Apre mon dezyenm pwen i, nou annan bokou Seselwa ki ennler zot tant pou krwar bann pozisyon travay aletranze lo

nenport ki *website*, ki zot ale, ki nou pou fer sir ki zot pa pe met zot lavi an danze.

Ki ler zot ariv laba, zot war zot dan en sityasyon, ki apre demen pei li menm li i bezwen war li al rod en fason pou dil ek sa sityasyon.

E mon trwazyenm pwen Minis, ki mon dernyen pwen, i lo kote bann travayer zot menm zot. Sirtou espesyalman Imigrasyon, ki nou bezwen fer sir poudir napa okenn zot ki pe *get involve*, les zot ganny antrennen dan sa bann aktivite. Mersi.

### **MR SPEAKER**

Mersi Onorab. Minis.

### **MINISTER ERROL FONSEKA**

Mersi Onorab pou ou kestryon. Sa bann *areas* ki ou'n koz lo la, parey ou'n fek koz lo bann travayer ki akt koman bann *agent*, apre i komans fer *trafficking*.

Zot konn zot bann prop sitwayen e zot *act* koman en dimoun ki sa bann dimoun i bezwen vin *through* zot, apre i vin en ponnyen *trafficking* ladan. Nou'n annan bann ka koumsa.

Sa bann ka osi i kapab, Imigrasyon. *Trafficking* i la, i pe swiv tou keksoz. Selman Imigrasyon osi i annan son rol,

Lapolis i annan son rol, en kantite sa bann *Law Enforcement Area* zot *aware of* sa bann zafer.

Sa bann *profiling* ki ou'n koz lo la. Nou annan *SIS* menm lo la osi. Diferan, diferan dimoun ki i pe vin isi, pa zis pou travay li, i pe vin isi pou ouver en *racket*.

Ou konnen, en *racket* pou fer en lot kalite *extortion* parmi bann travayer. So tousala i bann *Police matters as well*. So tou nou bann *agencies* i *coordinate* lo la.

E ou kapab ganny bann ka kot i annan *trafficking*, ki annan *drug* ladan, ki annan diferan bout. *Prostitution*, en kantite zafer ladan. So i vremen serye sa bann *areas* ki nou pe dil lo la.

Ki *again* parey mon dir, ti napa dan Sesel, konmela i annan. Mersi Mr Speaker.

### **MR SPEAKER**

Mersi. Onorab Bistoquet.

### **HON ROSIE BISTOQUET**

Mersi Mr Speaker. Bonzour Mr Speaker. Bonzour Minis avek Mrs Ina. Bonzour tou bann Onorab. Minis dapre sa rapor 2020 *Trafficking Person Report Seychelles*, i annan 11 priyorite

rekomandasyon priyorite ki'n ganny etabli anba la.

E sa i plizoumwen baze lo proteksyon, proseksyon avek prevansyon. Mwan mon ti oule demann Minis, e parmi ladan i annan en tabli en *shelter* dedye pou bann viktim ki ganny oprese par sa sityasyon.

Mon ti oule demann Minis, eski ou Minister i deza annan en plan stratejik ki in bidzete, pou annan bann program efektiv pou elimin trafik imen dan Sesel. Mersi.

### **MR SPEAKER**

Mersi Onorab.

### **MINISTER ERROL FONSEKA**

Mersi Onorab pou ou kestyon. *In fact* mon a pas ek Mrs Laporte. Akoz nou'n fer en bon pti pe louvraz lo la. Selman i a donn nou an detay. Mersi Mr Speaker.

### **MR SPEAKER**

Mrs Laporte wi.

### **DIRECTOR OF THE TRAFFICKING IN PERSON INA LAPORTE**

An sa ki konsern *shelter*, nou'n angaze depi Avril avek *Roman Catholic Church Committee*. I annan en *understanding* (pa an ekrir a se moman) - ki zot pou donn nou

en *shelter* kot *Good Shepherd Church*.

Sa *building* in ariv trwa kar. E nou pou annan 2 lasanm ladan ki pou pran 4 dimoun dan sak lasanm. Enn sa *unit* i pou *female*, enn i pou *male*.

Me nou war poudir plis viktim trafik imen pou le moman i *male*. So petet nou a servi tou lede. Osi legliz in ofer nou kot Sant *d'Accueil La Rosière* e osi en batiman deryer kot Dr Albert ti ete Mont Fleuri.

Zot in ofer nou en landrwa tanporer pou *shelter* ziska ler nou ava ganny sa *permanent establishment* kot *Good Shepherd's Church*.

### **MR SPEAKER**

Mersi. Mersi Mrs Laporte. Onorab Pillay.

### **HON SEBASTIEN PILLAY**

Mersi Mr Speaker. Mr Speaker ler mon pe ekout Minis, i annan en keksoz ki vin dan mon lespri, i annan diferan *threshold* or diferan kategori sa size *trafficking in person*. I annan size *sexual exploitation*, ou annan size zanfan ki ganny trafik.

*But then there is this issue of foreign workers* ki vin travay Sesel. *And I think* si nou regard bann aktyalite, sa, *this is one of*

*the main areas where* Sesel i toultan ganny *picked on*.

Akoz se sa ki soulev bann konplent. Mon osi *aware* ki'n annan bann *case* ki'n al Ankour e in annan bann konviksyon lo la.

So an relasyon avek bann pei kot nou pe *allow* bann Seselwa ki dan biznes, oubyen okenn konpanyen ki dan biznes Sesel, pou al rod bann travayer etranze, eski Minister in remark okenn lensidan, resortisan serten pei i mont plis dan bann ka ki konsern *Trafficking in Person?*

Oubyen sa i en keksoz en pe zeneral, ou pa pou kapab dir poudir bann ki sorti dan en tel pei i mont en pe plis e lezot pa mont en pe plis?

E si larepons pou mon premye kestyon i wi, i annan en morso dan Lalwa kot Minister Zafer Entern e Minister Zafer Etranzer i bezwen diskite pou regard serten eleman Polisi.

Eski zot pe annan sa diskisyon pou ki bann akter, bann dimoun ki dan diferan sekter, ki al rod sa bann travayer i pran konsyans sa sityasyon?

Aprè dezyenmman, dezyenmman Mr Speaker, i osi annan konsern kot, e la mon pe koz dan, mon oule koz dan en

fason ki tou dimoun i konpran mwan.

Ki ler nou al rod serten travayer ki sorti dan serten pei, ki annan serten kalite kiltir e zot vin Sesel. Sa bann dimoun i vin avek en serten kalite fason viv ki apre ler zot asimil dan *mainstream* sosyete Seselwa zot kree serten problem.

E enn bann keksoz ki mon santi pe arive osi, e i konsern lo size larelizyon. So petet si ou kapab reponn sa 2 kestyon, *and then* mon ava anmenn sa trwazyenm kestyon lo en pwen, i pa pou long sa trwazyenm kestyon Mr Speaker, si ou a permet mwan.

### **MR SPEAKER**

Mersi. Wi Minis.

### **MINISTER ERROL FONSEKA**

Mersi Onorab Pillay pou ou kestyon. Wi, premyerman pou premye bout, bann *Bangladeshi* ti vreman, bann *main characters* ki ti a pe ganny *trafficking in persons*. Me selman sa pa vedir i zis zot.

En kantite sa bann *trafficking in persons* zis i arive ler, par ler ek bann pti kontrakter osi i arive. Ki letan zot les, zot oule servi en dimoun pou fer - mon konpran *multitasking* i enportan.



Me i annan en limit lo ki kantite ou kapab abiz lo en dimoun. E parfwà zot ganny servi dan en fason tou keksoz, sa enn keksoz i bezwen konplet.

So i arive sa, e problem m i ler sa i arive, zot met sitan presyon lo sa bann dimoun, ki sa bann dimoun i zisteman per e i pa kapab fer nanryen. Zot paspor i ganny retire ek zot e la zot ganny *trap*.

Me pou *avoid* tousala, nou kot Imigrasyon nou'n antre dan bann, ankouraz bann *MOU* ek bann diferan pei. *In fact Bangladesh* i annan *MOU* avek pou fer sir ki i annan serten prosedir avan dimoun i vin isi.

Ki bann Lazans ki nou servi dan sa bann pei ki ganny tyeke byen par sa Lanbasad. E osi nou pe fer enn pou *Sri Lanka* ek *High Commission Sri Lanka*.

So sa i fason ki nou kapab kontrol en pti pe plis, pou angaz ek sa bann diferan pei e annan bann serten *MOUs* ek zot pou fer sir ki *employment* i ganny *well regulated* dan en fason.

*Otherwise* si ou pou ganny bann *cowboys* ki pou pran sa louvraz zot menm e zot met presyon lo sa bann dimoun.

Lo kestyon ki mannyer zot viv *and all that*, mon pa konnen si sa i vin dan *trafficking*. Me sa en swa ki ler ou pe rod travayer,

ou bezwen pran konsiderasyon ki mannyer ou pou dil ek sa sityasyon.

Mon pa konnen si sa i annan en lefe lo *actual trafficking itself*. Mersi Mr Speaker. *Unless* Mrs Laporte ou annan en keksoz ou pe al dir lo la.

### **MR SPEAKER**

Wi, Mrs Laporte ou oule adres sa

### **DIRECTOR OF THE TRAFFICKING IN PERSON INA LAPORTE**

Dapre *statistics* nou war poudir bann *statistic* sorti 2018 *to now*, nou war poudir bann *Bangladeshi* i pli komen to be *victim of trafficking person*. Me osi i annan en bon poursantaz *Nepalese* osi e *Kenyan*s.

An sa ki konsern sa bann *MOU* avek *the respective country* i-nou konnen poudir an korporasyon avek Imigrasyon, ki nou'n konpran poudir petet *the due diligence* i bezwen en pti pe plis pou sa bann *migrant workers* ki pe antre Sesel. Sa i pou tonm dan sa *prevention measures*.

### **MR SPEAKER**

Mersi. Wi ou annan ou trwazyenm kestyon Onorab Pillay.

**HON SEBASTIEN PILLAY**

Mersi Mr Speaker. Mr Speaker ler nou regard Lalwa, Lalwa i dir ek nou koumsa poudir i annan bann *aggravating circumstances* ki vin avek sa size *trafficking in person*.

E da Lalwa i dir ou bann diferan kondisyon ki enkli *financial promise* eksetera. Mon kestyon an relasyon avek Minis mannyer sa bann dimoun i viv i se ki dan serten koutim oubyen dan serten kiltir, avan ki en *migrate worker* i vini dan serten pei, zot regard sa kiltir. Akoz parfwa i difisil pou zot adapte dan en lot kiltir, ou konpran?

E sa ki mon ti pe met devan se eski nou, nou pe fer en travay pou asire ki *not to* - mon pa pou anpes bann konpanyen oubyen bann akter dan lendistri *or* dan bann akter ekonomik pou al rod *migrate workers*. Pa sa ki mon lentansyon.

Me mon lentansyon se ki i bezwen annan en ledikasyon lo si ou pran *migrant workers from* sa pei, *there is a high risk* ki ou pou annan sa sityasyon kot ou pou ganny en *case* ki dimoun pe *claim* tretman *and then* keksoz i al anba *Trafficking in Person Act*.

Sa ti mon pwen vizavi kiltir. E lanfaz ki mon ti le

mete, mon ti dir mon annan en trwazyenm kestyon se eski, in annan bokou konsern Sesel vizavi ki mannyer i antre ladan, se ki se Seselwa apre ki *end-up* ganny *traffic* atraver en dimoun ki sorti dan en lot kiltir.

E in annan sa konsern in ganny eksprimen par plizyer dimoun, sirtou par egzanp an relasyon avek size bann Paster aletranze ki vin Sesel.

E i annan bann madanm Seselwa ki *end-up* kit Sesel al reste dan sa bann lezot pei. *And then* ou tande poudir tretman ki zot pe gannyen pa sa bon tretman. I annan dimoun ki ganny vole.

So vwala kot mon ti pe fer li antre Mr Speaker. Mersi.

**MR SPEAKER**

Wi Minis ou annan en komanter lo la.

**MINISTER ERROL FONSEKA**

Wi Mr Speaker. Yes, Onorab mon konpran ou ki ou pe dir. E sa *to be honest* ek ou sa i en keksoz toulezour nou pe *deal*, ek sa dan *Immigration*. Sa bann bout ki ou'n koz lo la, la ek en lentansyon ler in ariv isi i fer en lot zafer. *So it's an ongoing battle*.

E ki nou pe sey - *really* nou annan bann fason en pti pe plis *strict* si nou vwar serten

*custom* ouswa serten group dimoun ki sorti serten landrwa manner zot vini ler zot vin isi, i ed nou dan nou *profiling*.

E nou *profile* sa en kantite lo *Immigration side*. E parfwa pa neserman konman en dimoun i vin isi akoz i kapab benefisye lo 3 mwan *visitors permit*, ki nou donn li 3 mwan.

Nou tyeke, nou *follow-up*. Parler nou donn zot en sans pou raport ek nou, nou bezwen kot zot reste par egzantp.

Parler zot fer kapab donn en deklarasyon ki paret i *ok* kot Imigrasyon zot vwar i *ok* zot *process* sa dimoun selman nou pa tro *happy*. So nou donn zot en letan ki apre detrwa zour zot nou pran zot *passport* nou'n tenir.

So nou pou fer en ponnyen kontrol lo la akoz i vre dek ki zot ariv dan pei zot annan serten *network* ki zot kapab fer en kantite keksoz. So *profiling* i enportan. E Imigrasyon osi i zwe en gran rol pou sa.

So mon konpran ou ki ou ti pe dir *earlier* e dan sa ka definitivman *it's on ongoing battle* parey mon dir. Mrs Laport ou annan keksoz ou anvi dir lo la?

**DIRECTOR OF THE TRAFFICKING IN PERSON INA LAPORTE**

Wi mon ti ava kontan dir poudir i annan en *draft guideline* ki'n ganny drafte, e pou se moman i avek PS Imigrasyon kot in devlop en seri kestyon pou *profiling for border control*.

So sa i pou en mezir *again* pou prevansyon, pou donn sa pti eleman *training* pou *Trafficking in Person* kot *entry point of Imigrasyon*. Mersi.

**MR SPEAKER**

Mersi. Bon ava pran dernyen kestyon Onorab Labonte, wi *yes* ki *point of order*?

**HON GERVAIS HENRIE**

Wi Mr Speaker, mon krwar ki nou bezwen mon pe get *Order 61 (d)* en pe plis lesplikasyon lo *statement* ki *Leader* Lopozisyon in fer. Mon krwar i ase serye sa ki in dir kot in sit par egzantp bann Paster etranze ki vini e risk ki bann madanm i ganny *traffic*.

Mon krwar *either* konman konmsi konman en lenstisyon si enportan dan son pozisyon *either* donn en pe plis leksplikasyon lo sa size *or* raport avek Lotorite, si vreman i annan en sa bann ka, akoz sa i *it's alarming if it is true*. So mon ti le zis lev sa pwen Mr Speaker. Mersi.

**MR SPEAKER**

Mersi, me nou pa pran sa *point of order*. Mon ava envit *Leader* Lopoziyon i annan en ka pou *follow-up*, i ava kapab *follow-up* avek Minis. Onorab Labonte.

### **HON ANDY LABONTE**

Mersi Mr Speaker. Bonzour Minis avek Mrs Laport. Bonzour tou dimoun a lekout.

Mr Speaker mon annan de pti kestyon. Mon premye kestyon i baze petet ler ki'n fer prezantasyon mon pe gete lo kote proaktiv. Ler mon pe dir proaktiv dan plas ki nou esper konplent vin kot nou, ki nou pe mazin fer pou nou petet annan en pe vizit dan sa landrwa.

Akoz ki nou pe vwar se ki i annan en bon pe sa bann dimoun ki vin isi, me solman zot pa pe ganny zot saler zot. Petet zot ganny zis sa manze me toultan i apre 3 mwan 4 mwan 6 mwan ki nou konnen ki sa bann dimoun pa pe ganny peye ditou.

E apre lo kote *after care* petet ler zot al dan zot *once* ki nou vwar poudir i en trafik imen, sa bann dimoun i ganny retournen dan zot pei;- vi ki zot *Boss* i deza en etranze oubyen lakonpanyen etranze zot fanmir laba i ganny viktimize.

Vi ki i en lorganizasyon enternasyonal ki nou travay avek ki nou pe fer pou nou fer

sir ki menm dan zot pei zot fanmir i *safe* oubyen zot ler zot retourn dan zot pei?

Apre en lot pti pwen *in regards to* drog ler nou pe koz lo drog - mon pa konnen si i tonm ladan me selman en keksoz ki nou pe remarke, se ki i annan bokou bann manrmay ;ki viktim drog.

*Nowadays* dan Sesel se ki i annan sa bann dimoun ki nou apel zot bann *Big Boss* zot fer sa bann manrmay travay me selman ler pou peye sa bann manrmay zot pa sa manrmay pa resevwar larzan. Zot fors sa bann manrmay pou resevwar drog e donn zot saler.

So ki nou pe sey fer pou nou elimin osi sa bann pratik parey? Mersi.

### **MR SPEAKER**

Mersi, Minis.

### **MINISTER ERROL FONSEKA**

Mersi Mr Speaker. Mon ava pas sa premye de kestyon avek Mrs Laport apre mon ava reponn dernyen.

### **MR SPEAKER**

Mrs Laport wi.

### **DIRECTOR OF THE TRAFFICKING IN PERSON INA LAPORTE**

Konsernan sa *Special taskforce* ki'n ganny kree, i annan en dan son manda pou li fer *ad hoc* site *visit*. Si nou annan en *tip* lo en konpanyen sa *force* i kapab fer son vizit.

Osi mon krwar sa ki Onorab pe dir an konsernan larzan, i dan *trafficking* i apel *debt bondage*. I annan sa i enportan note poudir *Trafficking in Person* i en krim ki nou bezwen fer atansyon kwa ki *Trafficking in Person*, kwa ki en lot kalite krim.

*Through* nou bann *educational* ki nou pe gannyen *through UNDOC* e nou pe osi fer *e-learning by the way*, mon krwar nou menm nou, nou pou vreman kapab konpran ki mannye nou pou *mitigate risk of* sa kalite krim. Mersi.

### **MR SPEAKER**

Minis ou pou reponn dernyen?

### **MINISTER ERROL FONSEKA**

Wi zis pou reponn ou kestasyon lo sa bann zenn manrmay ki ganny servi, dan par en kontroler ki pe kontrol drog pou servi sa bann zenn manrmay.

An tou leka sanmenm sa problemn la nou pe *deal* ek li an tou. *I mean* sa en rezilta pou bann problemn drog sa. So *victimization* lo sa bann *area*

toultan nou pe demande *victim* nou pe oubliye lekel ki *victim* parler.

Mon ti fer resorti sa dernyen fwa nou bezwen konpran ki bann viktim drog i relye partou, zenn manrmay, bann pti manrmay lo *scooter*, bann manrmay ki napa nanryen pou fer, i annan bann fanmir.

So nou bezwen vreman konpran ler nou pe fer nou bann louvraz kont drog, analiz byen lekel bann viktim. E mwan mon pou kontinyen travay for lo la aköz zot kapab vwar sa problemn ki mannyer i *spill out* kot lo diferan *part* nou kominote.

*So again* nou a pran sa lokazyon pou demann tou zot sipor dan Lasanble lo sa bann louvraz ki nou pe fer, aköz i enportan pou a gran transformasyon dan nou pei ki nou bezwen. Mersi Mr Speaker.

### **MR SPEAKER**

Mersi. Onorab Pillay wi. Onorab Pillay ou sipoze. *Point of order*, ou anvi adres pwen, silvouple mon ti'n determinen pou fini sa sesyon 10er, so fer li vit silvouple.

### **HON SEBASTIEN PILLAY**

Mon pou fer li vit. Ou konnen *Chairman Standing Orders* in

*raise en point of order* ler mon'n demann Minis en kestyon.

En *similar question* in ganny demande ou pa *raise en point of order*. Ou bezwen annan en standar. Ou konpran? So ou'n demande ki si i annan en alegasyon ki ganny fer nou met sa devan Minis.

Ki mon pou fer e fer parey ler ou Manm osi i demann kestyon! Pa lev ou lanmen koumsa! Ou konpran? Konmsi ennler mon krwar poudir letan zot in ariv dan Gouvernman zot in bliye poudir letan nou Lasanble koumsa, nou pe koz lo en size serye pou pei la, ou pa kapab zis swazir. Annan moral mon frer, *come-on?*

### **MR SPEAKER**

Mersi-mersi Onorab Pillay nou pa pou al pli lwen avek sa *point of order*. Parey mon'n dir si Onorab Pillay i annan lenformasyon ki anvi i kapab kominik avek Minis oubyen avek Mrs Laporte lo sa size. Zisteman sa *unit* in ouver pou ekout lenformasyon e rapor sorti kot piblik.

Avek sa mon ava dir bann Manm mersi pou kestyon e Minis mersi pou son *statement* ek ou bann klarifikasyon ki in donner. Mersi bokou Minis ek Mrs Laport e mon ava swet zot bonn zournen.

### ***(MINISTER FONSEKA AND HIS DELEGATION WAS EXCUSED FROM THE HOUSE)***

### **MR SPEAKER**

Mersi nou avans lo bann Mosyon ki lo nou *Order Paper* e mon ava envit Onorab William pou prezant son Mosyon. Nou ava repas dan Lasanble silvouple. Onorab William.

### **HON WAVEN WILLIAM**

Mersi Mr Speaker. Bonzour tou dimoun ki a lekout. Mr Speaker avan ki mon al lo sa Mosyon, permet mon fer sa pti komanter silvouple.

Mr Speaker, lo non distrik Grand Anse Mahé e mwan menm mon oule remerci ou e Sekretarya pou sa *token* lapresyasyon ki mon ti gannyen yer. Mon osi remerci Bondye pou sa lafors e kouraz pou kontinyen persevere menm letan i difisil.

Finalman mon pa pou kapab pa remerci sitwayen distrik Grand Anse Mahé pou zot soutyen sipor e konfyans pou fer mwan vin zot reprezantan isi.

Ki Bondye i kontinyen beni nou pei nou distrik e nou Lasanble Nasyonal. Mersi.

Mr Speaker, voyaz *Lady Esme* in long me omwen nou'n reisi arive ek sa Mosyon ek sa kargezon kendrik ver nou bann zil elwanye. (*laughter*)

Mr Speaker sa Mosyon i lir *comme* swivan: Prenon kont vites devlopman lo Mahé e bann zil pros, pou satisfè demann lespas pou biznes, later rezidansyel e lagrikiltir, sa Lasanble i demann Gouvernman pou revwar lafason ki nou bann zil pe ganny zere.

Dan en fason pou kree ankor plis devlopman soutenab lo serten sa bann zil ki annan potansyel.

E mon ava osi azoute "ki i posib."

Mr Speaker o debi menm mon anvi ki Lasanble i tenir kont sa bann mo e bout fraz swivan;- pou met zot dan kontèks lespri par deryer sa Mosyon dan son laspe devlopman soutenab lo serten sa bann zil , e ki i annan potansyel atraver en lapros responsab me pa enn foupamal.

Mr Speaker konsyan sa laspe frazilite, konservasyon e soustenabilite son biodiversite e leko sistenm maritim.

Mr Speaker mon remersye Bondye ki'n beni nou ek sa 115 zoli zil inik konman nou

teritwar dan sa lespas maritim 1.4 ekek milyon kilo met kare.

Mr Speaker sa 115 zil i propriyete Sesel, ki tou zanfan Seselwa i annan par ladan e devret ganny tou loportinite pou rezouir atraver diferan lentere posib.

Pou bokou lannen nou bann zil in ganny zere par lakonpanyen devlopman zil *IDC*. Nou konsyan nou listwar e akòz in sa fason fer pou en bon pe lannen. Mon felisit *IDC* e son tim pou sa bon travay spesyalman Mr Glenn Savy in vreman pasyonnen ek son travay konman *CEO, IDC*.

Mon ava dir ki'n touzour fer son mye pou sofgard soustenabilite e proteksyon bann zil elwanye.

Pou sa alor lo lapar pep Seselwa mon dir ou mersi, nou osi konsyan ki annan detrwa zenn ki pe ganny *train* pou pran larelev. Menm si serten kous popilasyon pe dir "Mr Savy out" mon senserman krwar ki nouvo administrasyon devret servi son konpetans konesans e leksperyans parmi lezot endividi pou konsey avek gidans.

Andotmo Mr Speaker, annou montre lapresyasyon e valoriz abilite nou bann eksper lokal anver tranzisyon avek sa ki zenn.

Mr Speaker pou ranforsi pwen rezondet Mosyon, permet mon tous lo serten ekstre dan manifesto *LDS 2020* - en dat ki pou reste grave dan lespri Seselwa. Parey le 5 Zen 1977 bokou ti soke aköz zot pa ti le krwar ki'n arive finalman!

Mr Speaker i enportan refer manifesto pou ede konpran kwa konteks e vizyon nou bann Dirizan ver sa misyon enportan ki sa mazorite ki'n tik anler, e sa pep konpran aköz se manifesto *LDS* ki'n ganny swazir olye lezot.

Mon pou sit ekstre vizyon *Leader* nou parti Mr Roger Mancienne ki ozordi Speaker Lasanble Nasyonal. Mon site,

“Nou slogan konpanyi i donn en rezimen an bref dan en sel fraz, ‘Nou misyon pou Sesel.’ Nou anvi donn sak nou bann sitwayen garanti ki zot annan en plas e en par dan sa pei i pou zot, pou konstri e benefisyè a travers sa ki i ofer.

Nou deklarasyon lo linite Nasyonal, bonn gouvènan loportinite lazistis zot ganny ankadre dan sa fraz i ou pei. Mon anvi ki ou pran li pou ou. Sa i demande ki ou vin responsab e pare pou deservi sa pei aköz letan en keksoz i pou ou, ou bezwen pran ka avek. Protez li e fer li vin pli meyer posib.

Nou pou anmenn en nouvo konmansman ek en Gouvènanman baze lo laverite, latransparans, responsab, rann kont, rekonsilyasyon e linite Nasyonal. Nou pou fer li pou pei.” Fen sitasyon Mr Speaker.

Mr Speaker byen koze i fer byen konpran. Mon pou osi sit en lot ekstre dan bann manifesto ki nou kandida Prezidansyel ti partaz son vizyon sa se Msye Wavel John Charles Ramkalawan, ki ozordi Prezidan.

Kot bokou dan lepase ti dir *zanmen* i pou mont *State House!* Mon site “ I pou en Gouvènanman baze lo pran desizyon e fer aksyon. Nou pou bouz ek determinasyon, pou sirmont bann difikilte e anmenn en nouvo lelan loportinite.

Prenon kont Sesel i apel pou tou son zanfan. E ki lavenir nou pei i dan nou lanmen ozordi, se nek ansanm ki nou pou fer Sesel vin pou tou son zanfan” Fen sitasyon Mr Speaker.

Mr Speaker pandan sa 43an prezizeman apre miltiparti in annan sa lenterè ki'n ogmante parmi kous popilasyon anver devlopman nou bann zil elwanye.

Seselwa i rekonnèt rol enportan ki *IDC* in zwe. E ankor



pe zwe dan zesyon sa bann zil elwanye. Sa lanfaz osi ki pe ganny mete lo proteksyon sa laspe biodiversite e leko sistenm, *zone* kotyer maritim bann zil elwanye.

Seselwa i note bann lesey *IDC* dilon bann lannen dan plizyer fason, proze dan domenn lagrikiltir ek tourizm i annan ki'n *fail* e i annan ki'n reisi ziska ozordi.

Mr Speaker anba ansyen Gouvernman, sa proaktiv volonte politik pa ti neserman la lo en baz konsistans. Sa zefor ekstra pou transform nou bann resours brit dan term valer azoute pa'n vizib e dezirab.

*IDC* pe seye li tousel. Me lo en baz selektif. E la menm ozordi *IDC* in osi redinamiz en diversifikasyon son lapros e lentere.

Ek sa sanzman Gouvernman le 25 Oktob 2020, sa dezir in vin pli aparan parmi endividi e group Seselwa dan sekter prive. Kot ekspektasyon se kas monopoli *IDC* e ouver sa posibilite devlopman ek endividi e group dan sekter prive ki serye.

Par egzanp mon konn plizyer endividi ki anvi investir dan lagrikiltir e lezot servis agrikol. Mon konn dezir serten

group ki anvi lwe en zil pou devlope.

Mon osi konn plizyer zenn profesyonnel ki anvi lans dan plizyer kominikasyon, servis sirveyans, maritim an servan teknolozi modern, sa leskiz i tro ser ouswa pou annan labi, ouswa koze ki pa pou fezab. Ozordi par tenir delo.

Mr Speaker progre dan diferan kalite teknolozi avanse e ki pou kontinyen evolye ek letan i en realite. Pe efas sa bann diferan krwayans negativ we baryer teknik lepase. Sa lepok an ver mize listwar.

Mr Speaker mon aprann ki serten lapros in deza ganny fer ek serten group fermye pou investir dan lagrikiltir lo bann zil elwanye. In annan serten mal konprenezon i e malantandi metod e fason fer. Sa pa devret lafen dimoun.

Mon rekomande ki sa diskisyon i kontinyen e i ganny elarzi pou otan investiser Seselwa konekte, pou ariv lo bann desizyon komen ver lapros e prosesis devlopman soutenab.

Mr Speaker si nou pa fer li ansanm pa espekte *Mauricien* ouswa *Malgas* in fer li pou nou, pou nanryen. Zot kapab vini me zot pou redwir nou reveni akoz zot pou bezwen pran zot profi e al avek kot zot.

Eski sa i benefisyé? E profitab pou nou Mr Speaker?

Mr Speaker Eleksyon 2016 anba sok 15 lo 10 en Komite Zil ti ganny dirize par *Leader* Lopozisyon sa letan e ki ozordi Prezidan ki ou a krwar i ti pe prepar son semen pou vin Prezidan atraver bann tel demars e lapros.

Sa Komite ti konsernen e anvi konn leta e potansyel nou bann zil elwanye. Serten vizit in ganny fer lo serten sa bann zil zot rapor lobzervasyon e rekomandasyon i lo rikord e i enteresan. Ki azout levidans ver zistifikasyon sa Mosyon ozordi.

Mr Speaker mon osi resevwar en dokiman sorti kot *Manager* Relasyon Piblik e Kominikasyon *IDC*.

Sa dokiman i donn lenformasyon lo aktivite ki *IDC* pe fer, lenformasyon lo lafason lakonpanyen devlopman zil i ete e zot plan devlopman, targete 2018 - 2023 ki ankor an progre.

Kontreraman ek lepase ozordi *IDC* i ganny gouvènen par en *Board*. Sa Mosyon i tonm byen akòz i reste zis 2an pou sa program letan i ganny evalye. Deba lo sa Mosyon pou sirman apòrt plizyer bann pwen valab.

I ava azout valer dan evalyasyon sa model apre 2023. I kler ki serten aksyon e desizyon pou bezwen ganny pran pou kas sa monopoli *IDC*, vin avek nouvo stratezi ver maksimiz rannman lo nou bann resours natirel, e valoriz partisipasyon nou bann antreprenè lokal.

Mr Speaker monopoli sa lepok ti neser annan. Baze lo konportman imen Mr Speaker *IDC* pa devret santi zot rol menase ek sa deba. E panse ki sa se mannev pou ferm *IDC* a lavenir. Ouswa zot vwar sa Mosyon pa fer sans e pa relevan lefe ki zot pe deza egzekut en model devlopman zil elwanye.

Sa model pa ase transparan e bokou sa bann sitwayen spesyalman bann ki anvi investir pa vwar sa model enkliziv. I baze lo zis en vizyon e en plan *IDC*, sa se persepsyon la deor Mr Speaker. Se ki sa fason fer i zis dan lavantaz *IDC* ver monopoliz devlopman nou bann zil elwanye.

Mr Speaker mon toultan ki *advocate* ki fitir devlopman ekonomik Sesel i lo son bann zil elwanye. Apre miltiparti plizyer Lasanble presedan mon rapel ti pe koz lo en staz plizyer baz lapès e peser lo bann zil elwanye, pa'n ganny

enplimante parey espekte pou plizyer rezon.

Enn ki pez for se kou pou enstal e mentenir sa bann baz. Lot eleman se sirveyans aktivite leksplwatasyon imen dan en fason iresponsab lo nou bann zil elwanye, tel parey touy torti, anmas dizef, touy zwazo.

Mr Speaker *IDC* bezwen reste sa gardyen e donn gidans lo ki zil, kwa e konman aktivite ekonomik i ganny fer e furni en gid lo *the do's and don'ts*, zisteman pou asir sa eleman proteksyon i ganny mentenir.

Mr Speaker, avek en det R8milyon lo mon latet ki tou sitwayen rezidan Sesel ki vivan e anviron R750milyon det par distrik nesosite pou agrandi e diversifye nou baz ekonomik pou re pey sa bann det i *the need of the hour*.

Mr Speaker kot bann larzan bal maske pe pran letan pou ganny lapis pou ranmase, lensertitid lo dirasyon pandemik *COVID* ek son bann nouvo varyan, lanbargo endirek lo mouvman tasyon viziter etranze an deor zot pei, pou anpes degradasyon larises e osi anpes propagasyon sa viris globalman.

Ek sa lensertitid osi pou ganny pou reganny remet lo en lalis nwanr ankor, malgre ki Lasanble pe pas lamannman

Lalwa pou konvenk *OECD* pou re blansir stati Sesel.

Mr Speaker nou bann zil elwanye e nou delo teritoryal pou reste nou *cash cow* konmdir *Anglais*, ki tou Seselwa ava kapab rezouir zot larises.

Se vreman sa partenarya piblik ek sekter prive ki byen sible e armonize dan sa zefor konzwent lenvestisman pou kree ankor plis larises dan nou pei.

Defi *the Ease of Doing Business* dan Sesel i ankor en batay - en batay ki si nou pa konpran li i pou restrikte plizyer Seselwa ki anvi bouz devan.

I demann regard tou mayon dan sa lasenn pa an izolasyon me dan sa lasenn servis pou ranforsi mayon ki fay e koup tou sa bann nen ki 43an in anpay nou. Osi lontan ki bann akter klasifye konman fasilitater zot donn priyorite zis rekiper larzan, zot kredi olye kree sa kondisyon ki biznes i reste dan en lanvironnman soutenab ler sa biznes ki ti pou prometan i *fail*, pa krwar ki zis sa endividi ki *fail*, me Sesel osi ki *fail* Mr Speaker.

E i grat sa sans pou ranforsi son rezilyans. Fasilitater pa'n realize ki son vre rol konman fasilitater pa neserman aret zis en bout

semen. O kontrer devret *all the way* ziska letan biznes i *up and running* pou tou benefisyé Mr Speaker.

Mr Speaker ki fe bokou dimoun demande eski rol fasiliter i 25poursan, 50poursan, 75poursan ouswa 100poursan? Pou ed sa biznes reisi pou Sesel lo en baz ka par ka potansyel pou reisi.

Mr Speaker sa i sirman en analiz enportan ki nouvo ladministrasyon bezwen fer, pou anmenn en diferans dan a demars ki size en lot deba dan lavenir pros.

Mr Speaker tou i permetab anba lesyel keston se eski size sa Mosyon i benefisyab? Eski deba lo sa Mosyon pou konstruktif e anmenn kontribisyon pozitiv? Larepons pou reste ek sa Lasanble serye ki'n pouse an gran mazorite pou sanzman.

Mr Speaker mon langazman serye se anmenn size devan sa Lasanble, pou asire ki sa nouvo Gouvernman i fer tou ki neser ki wi sa lelan pou loportinite ki manifesto *LDS* in refer lo la Seselwa pa zis reve, pa zis tandé, pa zis tann koze, pa zis tann rakonte me eksperyans li osi.

Sa Mosyon pe viz ver sa lobzektif Mr Speaker. A sa pwen permet mon donn en pti

revi lo bann zil elwanye kalite aktivite ki ti fer lontan e lo lakonpanyen par lakonpanyen devlopman zil *IDC*, ki zer devlopman zil elwanye pare rikord ti ete sa letan.

Sa Lakonpanyen ti ganny etabli an 1980 pou kree sa striktir pou permet devlopman ekonomik sa bann zil elwanye, ki tonm anba li. I annan 13 zil ki tonm ki ganny kategorize konman zil elwanye tel parey Alphonse, Assumption, Coëtivy, Cosmoledo, Desnoeufs, De Roche, Farquhar, Marie Louise, Platte, Poivre, Providence, Remire, parmi Silhouette en zil pros ki osi tonm anba *IDC* Mr Speaker.

Mr Speaker zistwar rikorde ki lontan mazorite sa bann zil elwanye, ti pou fer serten mazorite sa bann zil ti pe fer serten devlopman ekonomik ozordi serten plis ki oparavan ki annan potansyel.

Nou pou vwar par egzanp Alphonse ki enkli Atoll, Bijoutier e Saint Francois ti tir gwano, leksplwatasyon lavyann torti e son lakok, eksplwatasyon bann kokiy pou perl, ti annan en pe aktivite lagrikiltir an term prodiksyon koko legim elevaz poul.

Ozordi i annan en lotel konpri plizyer *chalet* kot viziter i ale pou rezouir *fishing fly fishing*.

Assumption i pli gran zil parmi bann zil elwanye apre Aldabra. Aktivite ekonomik sa lepok ki ti pran plas laba sete eksplwatasyon gwano depi lannen an 1925 a 1945 i prezimen ki ant 160 mil tonn gwano in ganny retire.

Sa zil i osi enportan pou fasilite akse Aldabra akoz i annan *Airport*.

Atove aktivite ti konmans ek lapas prodiksyon lagrikol tel parey legim, koko. Gwano osi ti ganny eksplwate la, e in ganny estimen ki ver 1960 anviron 70 mil tonn ti annan en 6 *chalet* konstri par *IDC*.

Akoz lavi maritim lakot zil Astove in ganny dekrir konman eksepsyonnel par plonzer etranze pou son rises e bote Mr Speaker.

Coëtivy i ganny regarde konman pli gro zil koray parmi bann zil elwanye. Mon anvi azoute ki mon annan serten atasman ek zil Coëtivy Mr Speaker, akoz se laba ki mon ti konmans mon karyer avek *IDC* ant 1995 a 1998 e travay lo bann zil elwanye pou anviron 4an dan lagrikiltir, ki ti enkli Desroches ek Silhouette.

Mon'n ganny sans vizite enn de sa bann zil elwanye. Mon'n parfwa ranplas reziser ki desann Mahé pou konze. Mon karyer ti fini lo zil Silhouette an 1989, kot mon ti retourn travay Grand Anse Mahé dan lagrikiltir *Manager* Stasyon Resers. Konman zofisye ekstansyon *Acting Manager (EFAD)* e Minister devlopman Nasyonal.

Bann sekans inoubliyab Coëtivy se foutbol dan Dimans ek bann solda ki ti antisip osi avek bann rebel ti ganny anvoye pou egzil e laba Coëtivy.

Lesey premye *batch* etidyan *NYS* atraver en *Scheme* pou ankouraz bann zenn pou vin travay lo bann zil in osi pran plas Mr Speaker lo Coëtivy.

Coëtivy ti renonmen pou son kopra ti annan en elevaz zannimo, prodiksyon legim e fri, ti annan aktivite lapas ti deza annan aktivite lelevaz kanmaron. Ozordi aktivite prodiksyon sarbon e lanbalaz ganny fer enkli meb parmi lezot;

Lezot aktivite agrikol lo en plan komersyal pe ganny konsidere ki pou benefis Sesel parmi lezot.

Cosmoledo in ganny rikorde ki ti annan serten aktivite agrikol parey elevaz kabri e prodiksyon koko e

legim, ti osi annan en eksplwatasyon torti mer parmi son bann pti zil elwanye. I renonmen pou lapes *fly fishing* e zot dir ki bon kalite pwason e gro pwason tel parey ton zonn, *pitbull* parmi lezot i annan potansyel pou touris osi.

Zil Desnoeufs i ganny regarde konman en sanktyer pou bann koloni *sooty tern* parmi lezot.

I ganny abite zis letan sezon dizef zwazo i konmanse depi Me ziska Out. Pou anviron 4 mwan kot koleksyon dizef i ganny fer lo detrwa sa bann zil elwanye. En tyer zil pa ganny touse me rezerve pou fitir prodiksyon dan en fason soutenab.

*IDC* i Fondasyon *Island Conservation Society* a ler aktyel pe fer en resansman lo sa popilasyon zwazo.

Desroches i pli gran zil parmi group Amirante koni li konman *Wood Island* lo plan maritim bann *Anglais*.

1935 letan zil ti ganny abite, plant sed ti ganny plante pou furni dibwa, lenerzi, e sarbon. 1880 kopra ti vin aktivite lekonomi prominan. Lagrikiltir in annan potansyel parey elevaz zannimo ozordi i annan en lotel ase deliks parmi serten *chalet* ki ganny lwe ek serten pwen son lakot bato

krwazyer i kapab antre Mr Speaker.

Akse i kapab par bato e avyon se pas ki mark mon zil Desroches, se travay bann prizonyen ti ganny anvoye pou reform e konplet zot santans. Mon rapel sekans kot olye 6er diswar gard atak prizonyen dan prizon, me se prizonyen ki tak gard Mr Speaker.

Farquhar i pli vre *atoll* Sesel ki konpri 10 pti zil nor e sid ki form parti 95 pousan later. 3 zil konn li konman Marnas zil Depoz, zil Dimilye. E lapen, ban disab e golet i trouve dan sid.

Koko e kopra, lagrikiltir e lapes, i annan potansyel e aktivite avek aktivite touris. Akse i par bato e avyon. Siklonn Fontala apre 2016 ti aplati tou. Me rekonstriksyon in ganny fer e kot premye group viziter ti ale an 2017. Serten parti *zone* kotyer sa zil pe ganny dezinyen konman *zone* proteze.

Marie Louise sa zil ti annan prodiksyon koko ti deza annan en program pou bann droger. Ozordi anba en Lagreman ek *IDC* ek Sosyete Konservasyon Zil (*ICS*.)

Zil Platte 54 ektar later ti ganny servi konman en kwen karantenn an 1835 e pli tar sa linisyativ abandonnen. An

1840 bwadou ti ganny eksplwate ziska ventyenm syek *IDC* ti ganny konstri en *guest house* 4 lasanm laba.

Poivre i en Atoll ki konpri 3 zil elwanye, zil Poivre, zil Du Sud, e Florentin avek en sirfas 33 mil 322 ektar later.

*IDC* in konstri i annan plan pou fer devlopman touristik. Li osi serten pwen pe ganny dezinyen konman *zone* proteze.

Mr Speaker zil Providence ki tonm dan group zil Farquhar i annan 157 ekstra sirfas. E ban Providence i annan 71 ektar e dinamik an term transformasyon natirel pou enkli plizyer lezot pti zil satelit ti ganny rikorde ki Providence aktivite tel parey lapas kopra e lakok torti ti ganny eksplwate.

Kopra ti ganny prodwir ziska 2006 siklonn ti frap sa zil e detri plis ki 60poursan pye koko. Napa zabitan laba i annan potansyel pou devlopman touristik e lapas. I ganny rekonnèt ki en destinasyon enkrwayab ki pa ankor ganny eksplwate dan liniver par bann syantis e serser biolozik maritim e ekolozik.

Zil Remire i annan zis 27 ektar later. Dan en lespas ti annan eksplwatasyon gwano. Ti annan serten aktivite agrikol tel konman plantasyon koko. I

annan *airstrip* e i annan *guest house* laba.

Fodre dir ki serten nou bann *leaders* ti kontan al pas letan lwazir laba e pou refleksyon. Zil pros Silhouette ki annan 1995 ektar later trwazyenm pli gran zil dan group zil granitik. E senkyenm parmi kategori bann zil pros Sesel.

I osi konpri dezyenm montanny pli o Sesel, ki apel Montagne Dauban byen koni atraver fanmir Dauban ki ti propriyeter sa zil pou 100an.

Henrie Deauban ti vann zil ek en group *Francais* e Gouvernman Sesel ti re aste sa zil an 1983 e deza 3an avan mon zwenn *IDC*. Zil Silhouette i renonmen pou son bann aktivite agrikol tel parey bannann sen zak, balye fatak, balye zig, kopra, zannannan, lerouy, mayok, zoranz, zerof, lavanniy parmi lezot.

Dan lannen 1987 elevaz zannimo e prodiksyon lagrikiltir ti pran en lot nivo ensi ki lapas, kot bann fasilite modern tel parey *cold store*, *store*, laferm modern pou elevaz pou dizef e lavyann pork, parmi lezot.

Mr Speaker ti annan en sizesyon pou fer *aqua culture* e potansyel i ankor la. Pli tar baze lo bann eksper lanvironnman dan

konservasyon, ti annan en lot revizyon dan zesyon sa zil pou gard li soutenab, kot *ICS* ti antre.

An 1987 dan en lot kotyer maritim ti ganny nonmen koman en landrwa proteze.

Mr Speaker kot 93poursan sirfas zil i anba proteksyon bann moman inoubliyab zil *Silhouette* se travers montanny pou al Grand Barbe pou al kot i annan kwen ki apel 'Rann Davans.' E ler ou fini atraver sa montanny Mr Speaker ou dir, "mwan ki zonn!"

Mr Speaker prezan mon pou koz lo fonksyon *IDC* ozordi an term kalite servis e aktivite ki tonm dan son responsabilite konman sa lantite devlopman zil elwanye *comme* swivan;

*IDC* i ofer servis transportasyon anmer bann zil elwanye. Zer zenerasyon elektrisite distribisyon osi zer zesyon delo e distribisyon.

Administre *sewage* e fasilite tretman zeneral e desarz e mentenir servis telekominikasyon.

Konstri e mentenir lenfrastruktir lo zil elwanye, furni stok manze esansyel;-stoke e fasilite en servis *retail*.

Fer provizyon pou servis medikal, mentenir lord e lape e plan dirzans zil elwanye.

Fer provizyon pou transpor zofisye Gouvernman lo zil elwanye.

Fer provizyon pou lenfrastruktir sosyal. E angaze dan aktivite agrikol. Finalman siport program konservasyon e proteksyon bann diferan partener konservasyon.

Mr Speaker i enportan mansyonnen ki ozordi in evolue konpare avek 1988 - 23an pase a mon konesans. *IDC* ozordi i annan bann lezot lakonpanyen asosye ek li tel parey, *Green Island Construction Company*, *Green Tea Investment Company* e *Green Oak Investment Company*.

Sa bann diferan aktivite ki ganny ofer par son bann konpanyen asosye i byen plase pou *IDC* ozordi. Pou zwe sa rol, pou dinamiz e fasilite devlopman pou plis diversifikasyon dan aktivite ekonomik nou bann zil dan en fason soutenab parey Mosyon pe demande.

Dan edisyon piblikasyon *Lazans Nouvel Sesel* ki ti sorti 18 Septanm 2019 en lartik anba tit "*IDC* i annan plan pou ogmant prodiksyon lavanniy e zonnnyon *Sesel*."

Apartir ki lavanniy e zonnnyon, prodiksyon lavyann kabri, ogmant plantasyon koko



pou asiste bann pti antreprenner lokal.

Mr Speaker atraver en diskisyon avek Sef Egzekitiv IDC, Mr Glenn Savy mon'n aprann ki zot annan serten plan anbisye dan prodiksyon pou marse lokal tel ki;- lavyann poul, manze zannimo, prodwir pti poul pou marse lokal e osi lenstalasyon son prop labatwar o nivo.

I enteresan, eksitan, sepandan mon santi ki serten sa bann proze ti kapab envit sektor prive pou partisipe Mr Speaker.

I annan sa loportinite pou lezot akter antre apard ki zis IDC egzekit devlopman dan Sesel. Par lefe ki IDC ozordi i annan konesans dan konstri enstal lenfrastruktir debaz lo bann zil elwanye, tel parey lenerzi soler, *Airport*, delo potab, anmas e tret bann desarz, enkli mwayen transportasyon, i byen ekipe an partenarya avek Gouvernman konman fasiliter, pou karg lanmen antreprenner e investiser Seselwa dan Sektor Lapes, *mariculture*, *tourism*, transportasyon, telekominikasyon, lagrikiltir, fabrikasyon, servis lasante spesyalize e *spa* o nivo parmi lezot servis aktivite lwazir o nivo, ki target bann *niche*

*market* parey nou dir Mr Speaker.

I bezwen annan serten zil kot nouvo konblaz pou konekte bann bout zil ansanm, kapab ganny fer pou fer plis lespas pou nou bann zenn ki pe reve ganny sa loportinite.

Pou kas sa baryer teknik e vye *mindset* ver devlopman soutenab byen organize e planifye an servan teknolozi modern.

Mon reste espire ek bokou lespwar aköz atraver bann tel ratifikasyon Rapòr Komers ek kontinan *L'Afrique* parmi lezot par Lasanble Nasyonal, pe ofer Sesel antreprenner Seselwa plis akse ek nouvo marse, pou vann e aste direk ek sours materyo brit.

Paz 29 manifesto *LDS* dernyen paragraf lo nou bann zil elwanye i dir mon site " Nou bann zil elwanye zot reprezant en gran parti nou teritwar e sirfas later. Nou pou entegre zot dan en plan devlopman Nasyonal. Lagrikiltir a kote lezot sektor, tel parey *tourism* e lapes." Fen sitasyon Mr Speaker.

Gouvernman konman fasiliter, ki son dezir se met divan anba lezel Seselwa pou les li anvole, devret profit lo sa divan sanzman e sa vandswet ki

lo mitan pou fasilite antreprenè  
Seselwa pou *take-off*.

Sa Mosyon i pe demann en revizyon dan sanz fason fer, pe demann en nouvo lapros, pe *channel* Egzekitiv pou *think bigger!* Pa zis *think outside the box* me pou viv *outside the box* sirtou ek pandemik COVID ki'n rin kof nou pei, e an plis par move zesyon fon piblik an 2020 par ansyen Gouvernman.

Sa Mosyon i annan son merit. Sa Mosyon pe avans devan laspirasyon Seselwa e sa Mosyon pe demann Gouvernman ki'n deklare ki i pou en Gouvernman "*desizyon e aksyon*", mon repete - mon repete, "*desizyon e aksyon.*" Me pa en Gouvernman 'demen tanto!' I pa en Gouvernman 'apre.'

Epi ouswa '*pli tar.*' Pou azir ki Seselwa *ownership* dan son pei. Seselwa i pare pou sa defi a kote sa Gouvernman ki aksyon e pran desizyon. Annou konmanse ek en proze pilot ki ava ganny evalye e adapte dan lespri sa manifesto ki son bann laspirasyon e dezir, pa ava reste zis mo lo papye, me sipote par en volonte politik ver pran desizyon e aksyon. *Yes we can!* Ki pli gran laprev ki rezilta le 25 Oktob Mr Speake? Annou pa grat sa sans. Mersi.

**(APPLAUSE)**

**MR SPEAKER**

Mersi Onorab William avan nou kontinyen avek deba mon krwar mon bezwen ganny segonnman pou sa Mosyon Onorab Esparon.

**HON REGINA ESPARON**

Mersi Mr Speaker. Mon segonn Mosyon. E ou ava permet mon dir detruwa mo letan nou retournen. Mon mazine nou pre pou pran *break* la.

**MR SPEAKER**

Bon i lemoman ki nou kapab pran en poz e nou ava retournen 11er 5 pou kontinyen deba. Mersi.

**(BREAK)**

**MR SPEAKER**

Byen nou ava pran deba lo Mosyon e nou ava konmans avek Onorab Esparon.

**HON REGINA ESPARON**

Mersi Mr Speaker. permet mon dir de mo an sipor sa Mosyon table par Onorab William pou demann Gouvernman pou revwar lafason ki bann zil elwane pe ganny zere dan en fason pou kree plis loportinite pou plis devlopman soutenab lo bann zil ki annan potansyel.

Mr Speaker vizyon sa nouvo Gouvernman i osi sa vizyon ki Lasosyasyon Fermye dan lepase ti annan anba *Chairman* Mr Serge Benstrong ki en zabitan Glacis, ki en zabitan North East Point distrik Glacis ki mon'n ganny sans koz avek.

Kot enn zot lobzektif mazer sete pouvwar plis devlopman lagrikiltir ki soutenab lo bann zil elwanye. En topik ki osi ganny ekrir dan manifesto *LDS* koleksyon 2020 sa parti ki mon reprezante isi dan sa Lasanble.

An dizan sa mon osi kapab dir ki sa pa'n posib e pa'n zanmen ganny materyalize sa lepok kot lasosyasyon in mank siport e in napa sa volonte politik de lapar Gouvernman 'SPUP/SPPF/Lepep ki ozordi i US, pou bokou rezon.

Annou get enn de. Ti annan sa konpetisyon direk ant lorganizasyon paraetatik parey *STC* e prodikter lokal. E dan en fason ou en lot sa in dekouraz zot. Lafason ki bann zil ti pe ganny zere pa ti donn sa loportinite pou plis devlopman agrikol parmi nenport ki endividi.

Akoz tou ti ganny kontrole par *IDC* e i ankor annan sa monopoli lo nou bann zil elwanye. En monopoli Mr

Speaker ki fodre kase si nou anvi bouz devan, pou kree sa loportinite.

Bokou fermye ki ti pe deza plante ti rankontre difikilte. E i annan menm ki ti degoute e arete. E ozordi menm sa travayer ki plante i plant en pti keksoz lo zil elwanye, i ganny difikilte pou li anvoy pou son fanmir. E menm desann avek ler son lartik i fini. Bokou fwa zot bezwen fer li dan kasyet.

Avek konsekans lenportasyon fermye elevaz zannimo ti forse abandonn zot biznes, ler pri lavyann enporte ti vin an konpetisyon ek sa ki zot ti pe prodwir lokalman. Kot ti pou kout pli bonmarse ki sa ti zot pe prodwi. Menm si sa kalite pa ti ot kalite.

Bokou fwa ou'n tann dir bann lavyann ki'n ganny pikir oubyen legim ki ti met bokou langre, ki nou menm ki pe konsonmen, nou pa ni konnen ki lefe i annan lo nou lasante.

Konpetisyon later e bann lezot sekter lekonomi, pa ti donn okenn lankourazman. Sa bann ki ti anvi konmanse ou sa ki ti anvi lans dan sekter lagrikiltir oubyen elevaz zannimo. Akoz later lagrikiltir ti ganny partaze antre dalon.

E bokou ti ganny met lo en *waiting list*, pou kantite letan. Sa ki ti annan lentere ti menm

ganny defavorize e dan lezot ka kot teren ti bon, Gouvernman ti pran pou fer lot keksoz avek. Zis an pasan Mr Speaker en legzanp tipik kot lekòl Au Cap ti ganny konstri ozordi, i lo en morso later kot aktivite lagrikiltir ti pe ganny fer.

L'Amitie Praslin kot ti zot in donn permisyon pou fer lotel pre kot i annan en laferm, en morso later ki ti ava'n kapab fer lagrikiltir lo la. Apre ou tann bann konplent ki touris pa kapab santi loder laferm.

Tandis ki fermye ti ganny anvoye pou al plant anpandan dan montanny dan kap ros. Kot napa lenfrastriktir e kot pa tou kalite prodwir ki pouse. Ou ava plant mayok, zannannann bannann me ou pa pou kapab plant bred, leti, brenzel ek lezot bann prodwir ki pous vitman pou ou ganny ou dipen toulezour.

Mr Speaker annou get en kou sityasyon lo bann zil ki size sa Mosyon devan nou anmennen par Onorab William. Ki pe demann Gouvernman pou vey nou bann zil ki annan potansyel, avek dimoun ki enterese pou lagrikiltir e osi elevaz zannimo.

I evidan ki malgre fermye ti ava kontan angaz li lo en program devlopman lagrikiltir lo bann zil elwanye, ozordi bann

zil pe ganny administre i napa sa debousman.

Akoz lamazorite sa bann zil elwanye ki annan sa potansyel pou devlop en program serye lo kote agrikol ou elevaz zannimo parey Coetivy, Alphonse, Remire, Astove, Farquhar, Marie Louise pou nonm enn de pe ganny administre par *IDC*.

E prenon kont ki *IDC* i annan son prop regilasyon e kontrol, i fer ki napa sa louvertir pou ki fermye i antre pou prodwir.

Parey loter Mosyon in fer nou konpran, e - de plis avek sistenm santralizasyon par nasyonalizasyon bann biznes ti napa inovasyon pou Gouvernman fer en prodiksyon lokal ki soutenab e dirab, aköz zot ti pe get zis en kote.

Dan lepase Seselwa ki ti annan zil prive sa ti ganny arase avek zot. E an rezilta sa ti annan en mankman konpetisyon pou pous biznes pli devan. I annan zil parey Remire ki annan sa potansyel ti ganny eksplwate pou prodwir zis pou bann msye.

E i ti osi ganny servi pou plezir sa ki ti annan kontrol e monopoli. E nou bann travayer Seselwa ki'n travay lo sa bann zil i rakonte, bokou ki mannyer bann gro msye ti annan bann i

anmenn bann pti poul lo sa bann zil pou plimen dan *weekend*;- pa pou prodiksyon lavyann me pou zot prop plezir personnel.

Bokou keksoz in pase lo zil Remire. Sa ki pa ankor mor i rakonte. E sa ki annan zorey i ekoute.

Pran parey Farquhar ki sitye dan sid was, 8 mil 357 kilo met kare, ki malgre in ganny tape avek siklonn tanzantan i annan potansyel ki lagrikiltir e lapas. Lagrikiltir e lapas. Legim parey tomat, Mai, patat, piman ek brenzel i bann ki kapab ganny prodwir.

E menm prodiksyon dimyel ki posib laba. I menm annan potansyel pou sonny zannimo konpare bef kabri e lezot. Ile Desroches malgre i ptipti e i 4mil 027 kilo met kare. I pe prodwir pou son konsonmasyon touristik konmela.

Me i ti osi kapab agrandi son kapasite e kalite prodiksyon pou lo en pli gran lanplè, pou konsonmasyon lezot kous popilasyon. Kantmenm i annan bann letablisman touristik laba.

Alphonse en lot zil parey Desroches i annan e devlopman touristik. Anviron 400 mil kilo met sid was ek Mahé e i etale lo

en siperfisi ki 1.7 71 kilo met kare. Osi *manage* par IDC.

An se moman Alphonse i enn bann zil ki pe atir touris presizeman pou *fly fishing*.

Me parkont Alphonse i osi annan kapasite prodwir sitan bokou parey tomat, gro piman, zariko, eksetera.

Me si nou oule zil i prodwir kapasite maksimonm, fodre ki en sistenm i ganny met an plas ki bann viv ki sa an zil elwanye pe prodwi i ariv kot popilasyon dan en bon leta e a en pri rezonnab. Malgre bann defi an term mendev e transpor.

I kapab fer ki pri eleve. E si i annan sa lentere ki mon garanti, se la kot Gouvernman i antre regarde kwa ki kapab fer pou ed bann ferme ki deside antre dan en program serye pou devlop sa bann zil ki annan sa potansyel, pou epanouir.

Mr Speaker Astove e lontan ti prodwir lerouy, mon ti pe koz ek Ton Pol *weekend* kot in rakont mwan ki mannyer zot ti plant lerouy dan transe.

Nou osi annan zil parey Ile Du Sud, Poivre e Marie Louise, ki renonmen pou son lapen. I osi annan potansyel lagrikiltir limon, zoranz lapofin, ti vin byen laba.

Nou konnen ki tousala pa posib san mendev. Alor nou

bezwen met an plas bann program ki pou atir Seselwa, ki annan sa lentere dan lagrikiltir pou sezi sa loportinite pou devlop bann zil elwanye.

Sa i kapab atraver Lanplwa oubyen atraver lenvestisman. Mr Speaker ozordi ler ou get en senp keksoz parey dile koko, nou en pei tropikal, kot koko i pous an abandon lo bann zil partou. Selman ler nou pas dan magazen nou vwar dile koko ki'n ganny enporte sorti *Sri Lanka*.

Nou bezwen konsonm nou, nou bezwen kestyon nou lekor e demande aköz Sesel pa kapab fer son prop dile koko? Mon rapel ti deza annan en lizin Anse Royale, ki ti fer dile koko *Arome de Losean Endyen*. Eski nou pa kapab ankouraz en prodikter lokal pou fer en lizin dan sa menm laliny lo nou bann zil elwanye, e antre dan leksportasyon? Olye ki nou pe enporte.

E mon konnen ki si Mahé i annan dimoun ki pe fer prodwir koko, e pe vann lo en *small scale*. E la mon mazin Edna ek Allen Moustache dan distrik Glacis ki pe prepar koko rape e met lo marse lokal.

Mr Speaker mon plis ki sir si ti annan en louvertir lo zil pou fer sa, konman en biznes

bokou plis dimoun enkli lafanmir Moustache sorti Glacis, ti pou enterese pou lans zot dan en tel biznes lo en pli gran lanpler.

Nou osi bezwen dir ki parfwa bann akt voras e ser dimoun in anmenn sa dekourazman e dimoun pa reste angaze. Dimoun in anmenn sa dekourazman pou dimoun reste angaze dan zot biznes. Aköz Gouvernman lepase ek latitud dominasyon lo bann zil in pini en ser dimoun olye lav zot lanmen met divan anba zot lezel pou zot ariv pli lwen.

Me parkont Mr Speaker plan sa nouvo Gouvernman parey in ganny dekrir dan son manifesto se pou vwar sekter lagrikiltir evolue e pou en lot dimansyon lo nou bann zil elwanye.

E an vi ki Sesel i en pei ki ganny idantifye bokou zil Koralin ki annan potansyel pou devlopman dan bokou lezot domenn.

Mon vwar ki sa Mosyon ki pe demande pou revwar lafason ki bann zil elwanye pe ganny zere, i ava kapab ouver en laport pou donn plis loportinite pou nou bann dimoun lokal, konmans fer demars pou angaz zot dan biznes prodiksyon lokal

lo nivo lagrikiltir ou elevaz zannimo.

E lezot e parey e pran en zil parey Ile Denis oubyen Bird Island ki ozordi zot preski otovizan e sa i akoz zot dan lanmen prive.

E zot pe ganny *manage* preski antyerman par bann Seselwa ki pe byen zer sa bann zil elwanye.

Ozordi zot pe prodwir depi legim lavyann, dizef zot prop delo e kot i annan plis zot menm furni lavyann dan bann lotel ki annan lyen avek zot parey *Carana Hotel* e lavyann i de ot kalite.

Silhouette Mr Speaker i en zil ki nou'n pas en pe letan laba dan lepase. Ti pe konmans lans li dan prodiksyon agrikol e osi *livestock*.

Mon rapel sitan kantite poul ki ti pe ganny eksporte pou lavyann Mahé tou le semenn. 10 a 12mil. Lo Silhouette ti sonny bef kabri, denn, zot ti menm esey sonny mouton me pa ti vin tro byen e zot ti Coetivy.

E ler mon koz lo Silhouette mon mazine e remersye sa bann Seselwa ki'n travay en kantite lo nou bann zil elwanye. Bann natif ki ankor laba ozordi. Bann dimoun parey Modestine, Bar, Suzanne e lezot. Mon ti ava kontan remersye zot.

E lo lot kote plantasyon zot pa ti mal fer. E lo kote plantasyon zot pa ti mal fer, ti annan bred, leti, kokonm, mai, zironmon eksetera.

Lerouy osi i annan landrwa ki ti vin byen, pwason sale ek zourit. I osi bann spesyalite ki zil ti kapab prodwir an abandon. S

E sa ti pou osi kapab ouver en loportinite pou nou kapab eksplor li lokalman e menm enternasyonalman.

Be ki nou'n vwar? Zot in prefere donn priorite landrwa pou konstri lotel. Me malgre sa i pa Silhouette ki sitye nor was ek Mahé kantmenm i napa en *airstrip*, i nou trwazyenm pli gran zil i ankor annan sa potansyel pou lagrikiltir.

E menm kapab ganny eksplwate pou. Par lefe ki i annan sa biodiversite e dezyenm montanny pli o, e lezot sit ki ganny proteze anba konservasyon. E la kot nou fek pas Lalwa *Flora and Fauna* de semenn pase, Silhouette i osi annan plant e bann lespes rar;-sirtou dan zarden maron ki ganny klasifye konman *virgin forest* i enn ki merit ganny proteze.

Me i enportan ki Lotorite konsernen i konn balans sa laspe konservasyon e laspe devlopman, dan bann lezot

bout sa zil parey Grand Barbe, Anse Mondon e Anse Laskar ki ti ava kapab ganny servi pou plante e sonny zannimo.

Tandis ki La Passe i a rezerve pou devlopman touristik e lezot aktivite lwazir. Sa i zis en legzanp Mr Speaker. e mon asir ou ki lo lezot zil osi i kapab balans sa diversifikasyon sours lekonomi, parske sitan bokou zil ki deza en resours i mank loportinite. I mank loportinite inovasyon, lenvestisman e Polisi ki kapab ankadre byen bann proze agrikol lo bann zil vizavi bann lezot devlopman.

E par sa Mr Speaker i enportan poudir ki en lot keksoz ki pou kree sa louvertir, se ki ler *IDC* i sanz son bann Polisi i fer en letid pou vwar kwa ki pli soutenab e antre partenarya avek fermye atraver lasosyasyon, e Minister Lagrikiltir, pou zot kapab reviv prodiksyon lokal lo bann zil elwanye, sirtou zil elwanye ki annan sa potansyel.

Mr Speaker sa diversifikasyon i kapab ganny eksplwate pou fer pei vin plis soutenab.

Nou bezwen osi dir ki kantite Polisi ki *IDC* in met an plas ki fer bokou ditor akoz i ti pe get keksoz dan son lentere e kot nou in napa sa enklivite

oubyen lobzektif kler ki benefis popilasyon.

Par egzanp nou kapab vwar ki Lasosyasyon Fermye pa'n zanmen antre *en jeu* avek *IDC*, akoz i pa'n zanmen kree lespas oubyen etabli okenn partenarya avek bann fermye atraver lasosyasyon dan lepase.

Mr Speaker pou kapab fer devlopman lo bann zil fermye i osi bezwen sipor bann lorganizasyon enternasyonal.

Mr Speaker an 2005 Lasosyasyon Fermye ti anrezistre e vin en aktiv *members* sa lorganizasyon ki apel *SACO - South African Confederation of Agricultural Union*.

Kot zot i ganny bokou sipor pou devlopman kapasite e en institutionalisation e pledwaye. Me lo kote lokal zot pa ti ganny ase sipor pou konplimant sa ki sa lorganizasyon ti pe donn zot.

Zot ti tre vokal e an rezilta sa zot ti gete konman en oponan. E sa ti anmenn en ladversite akoz Gouvernman ti pe siprim zot lavwa. E dan sa demars Mr Speaker, partenarya e Lakor enternasyonal pou osi enportan.

Nou bezwen fer resorti ki Sesel i annan kapasite lokal pou li prodwi, pou zwenn demann ki bann ki bezwen - zis



en legzanp akoz an 2008 prodiksyon lokal pou poul ek lavyann koson ti 85poursan - lenportasyon ti zis 15poursan.

Alor Mr Speaker, pli gro defi dan lagrikiltir e *livestock* se resours mende. Kot ozordi fermye ki serye i oblize demann ek Minister lanplwa *GOP* travayer etranze.

Parski bokou nou zenn ki ti ava kapab pe fer sa louvraz e ganny en saler dan prodiksyon lokal lo zil elwanye, i plito pe fini zot letan lo gento.

E zot plizoumwen pe rekolte e vann sa ki zot pa'n plante dan plantasyon dimoun.

Mon kapab dir ki wi i posib pou lans en lagrikiltir lo zil si Gouvernman *IDC* i revwar tou bann kriter pou ankouraz fermye pou kapab koup lo lenportasyon. E vwar ki kalite prodwir ki pe ganny enporte, ki kapab ganny prodwir lo nou bann zil elwanye.

Sa ti osi donn louvraz enn sa zenn ki ozordi pe trennen lo gento e anmenn reveni e deviz pou nou pei.

Met bann kondisyon kler ki pou ankouraz zenn fermye devlope e enterese eksplwat [potansyel lo nou bann zil elwanye. E non pa bann kondisyon ki pou anpay li e dekouraz li.

Ankouraz fermye pou kree bann pti lantrepriz korporativ ou lakonpanyen pou plante lo bann zil ki ava annan ki annan potansyel. Ozordi sa pandemik in donn nou en leson. In fer nou konpran sa ki nou pa kapab met tou nou dizef dan en sel panyen.

La dan sa letan enseren i ti pou byen si nou ti otosifizan dan serten prodwir agrikol kot nou pa ti a voudre nou pa ti pe bezwen pe servi deviz pou enporte.

An konklizyon Mr Speaker, mon oule fer sa bann pwen swivan;- premyerman, kot *IDC* i bezwen fleksib pou donn loportinite sa ki anvi envesti kapab fasilman fer li.

Dezyenmman, Lekol Lagrikiltir i bezwen vin pli atiran pou ki i prodwir bann zenn de kalite, ki reste dan lemonn lagrikiltir. Dan menm lenstans nou lans en lapel pou Liniversite Sesel konsider grandi *curriculum*, pou donn posibilite nou zenn ki anvi vin sa spesyalis dan lagrikiltir kapab fer li.

Trwazyenmman, nou bezwen donn menm lankourazman nou bann Seselwa ki deza dan lagrikiltir lo nou bann zil elwanye, parey nou pou donn sa bann etranze.

Katriyenmman, Minister Lagrikiltir ansanm avek Minister Lanplwa i bezwen met an plas en program soutenab pou ki bann etranze i vin Sesel dan domenn lagrikiltir, i en program kot i partaz son lekspertiz avek bann Seselwa. Kot nou pa vwar sa enn ki lo *GOP* pou plante i dan konpetisyon ek Seselwa kot lavant i konsernen.

E kot i vreman pe partaz sa lekspertiz e konesans ek en Seselwa ki a lafen son Kontra en Seselwa i benefisye e i kapab pran larelev. Mr Speaker avek sa de mo mon remersye ou.

### **MR SPEAKER**

Mersi Onorab. Onorab Samynadin.

### **HON KELLY SAMYNADIN**

Mersi Speaker. bonzour tou mon bann koleg Onorab. Mr Speaker liv *La Genese* sapit 1 verse 28 ler Bondye ti fini kree zong a son limaz i ti dir avek zot;-

*Soyez fécond, multipliez-vous, remplissez la terre et soumettez-la. Dominez sur les poissons de la mer, sur les oiseaux du ciel et sur tous les animaux qui fourmillent sur la terre.”*

Sesel i en groupman 115 zil e sa larsipel i konpri en

lespas Zone Ekonomik Eksklizif ki pran environ 1.3 milyon met kare. Dan ki 455 kilo met kare kouver par later.

Mr Speaker Sesel i vreman sanse, par lefe ki nou erit sa gran later ek losean. Kreater in donn nou later, ek lespes zannimo, pou eksplwate.

Me eski nou pe itiliz sa siperfisi sifizaman? Malgre sa lakantite zil ki nou annan selman kat ladan ki pli peple an gran devlopman konsiderab. E sa i Mahé, Praslin, La Digue e Silhouette parey nou tou nou konnen.

I annan ankor ki nou annan devlopman lotel, oubyen bann sant konservasyon e prezervasyon lanatir sirtou nou bann zil elwanye. E mon krwar ki sa bann tel aktivite i merit kontinyen, an vi ki zot ede promouvwar devlopman soutenab e garanti krwasans ekonomi pei.

Mr Speaker dan mon letan lanfans mon'n tann koz lo laferm kanmaron lo zil elwanye, elevasyon poul lo Silhouette, prodiksyon koko, salezon pwason, elevaz kabri parey Onorab William in mansyonnen pli boner.

Me apre mon'n nepli tann koz lo ankor. Letan ki mon'n konsilte serten dimoun ki annan bann souvenir ase sa

lepok, zot ti dir mon ki sa letan Sesel ti annan prosperite.

Lavi lo zil ti gou e pei ti devlope. Kestyon ki mon pe demande, set akoz ki nou'n met a lafen avek tousala. Mr Speaker mon pe aport mon siport ver sa Mosyon premyerman akoz mon ti ava voudre ki nou pei i le konn vre prosperite.

Nou bezwen rod tou mwayen ki nou kapab pou ki ekonomikman nou kapab zener plis larzan.

COVID in servi konman en lesen e mon pa krwar ki nou devret sibir ankor bokou pli grav pou nou reazir. Nou bezwen rod bann alternativ pli proaktiv konman en pep, pou nou kapab sirviv e aret depan lo bann pei eksteryer.

Dezyenmman mon ti ava kontan vwar plis loportinite lanplwa pou nou bann zenn. Ozordi dan Au Cap later pou agrikilter in konmans limite, an vi ki lespas pou lozman i reste touzour en priyorite.

Mr Speaker la i ava en loportinite pou nou bann zenn ki enterese dan sa sekter, pou zot ganny sans pou epanouir. Parey nou Prezidan in dir annou met divan anba lezel nou bann zenn. E sa i en parol ki mon senserman krwar ladan.

Mr Speaker la ki laz retreat pe al ogmante parey nou fek anonse resaman, mon krwar ki i ti ava en bon moman *pourquoi pas* pou envit nou bann dimoun ki annan leksperyans lavi lo zil elwanye, ki ankor kapab byensir pou retournen e transmet zot lekspertiz ek leksperyans avek nou bann zenn;- pou ki an retour zot osi zot ava kapab pran larelev e garanti lavenir lavi lo zil elwanye.

Nou pei i vreman ris an term resours e potansyel pou devlop an term resours e potansyel pou devlopman i remarkab.

Nou devret pe kontinyelman eksplwat li, tout an aplikan bann soutenab pou en tel demars i kapab e asir prosperite pei pandan bokou lannen ki pe vini.

Mr Speaker Bondye pa ti fer kreasyon pou ki lemonn i ariv a son lafen, me ki kapab reste touzour an egzistans e se nou ki devret pe garanti sa pou nou bann fitir zenerasyon demen.

Pou konklir, mon ti ava voudre montre mon lapresyasyon anver mon bann konpatriyot ki ankor krwar dan lavi lo zil elwanye.

Ki'n pran sa *challenge* pou al viv en tel leksperyans. Mon

lev mon sapo anver zot e mon oule fer zot konnen ki mon mazin zot e nou rekonnèt travay e sakrifis ki zot pe fer, pou ede a prodiktivite ek garanti krwasans ekonomik pei.

E mon pe ankouraz bann frer ek ser pou konsider en tel leksperyans. De lot kote mon ti ava kontan demann avek bann anplwayer, pou nou valoriz nou bann travayer.

Malgre ki nou souvan tann dir Seselwa pa anvi travay, me i annan bokou zot later ki anvi annan en karyer, fer bann sakrifis ki signifikan, pou asir en bon lavenir pou zot fanmir, akoz sa i pou permet zot met en pti sou de kote, afen ki zot bann proze personnel i ava kapab materyalize.

E mon konnen ki en kantite sirtou nou bann zenn pou anvi kal viv e travay lo nou bann zil elwanye. Annou donn zot sans pou epanouir me non pa abiz lo zot kouraz akoz nou pa pou kapab toultan pe depan lo etranze pou fer nou pti pei marse. Ekonomikman i pa zeneralman profitab.

Mon konvenki ki si Gouvernman i kree bann louvertir pou biznes, e incentives atiran kot lanplwa i konsernen, nou pou reisi kapab kree bann lespas lo nou bann zil ki profitab e ki pou dir

depandan bokou lannen a lavenir.

Avek lavolonte konman en pti pei, nou pou akonpli bokou parey gran ekriven *Français* i dir "*vouloir c'est pouvoir.*" Avek sa Mr Speaker mon pe konfirm mon siport. Mersi.

### **MR SPEAKER**

Mersi Onorab. Onorab Porice.

### **HON DOYACE PORICE**

Mersi Mr Speaker. Bonzour Mr Speaker. Bonzour mon bann koleg *MNA*.

Mon kontribisyon pou sa Mosyon se mon santi ki Minister Lagrikiltir i devret revwar sa *National development Plan* e vwar ki kantite later ki'n ganny *allocate* e ki kantite ki vremen pe ganny servi pou prodiksyon agrikol.

Mr Speaker later dan nou pei i enn nou resours ki tre limite. Ler later i ganny donner pou lagrikiltir i bezwen servi li pou lagrikiltir. Non pa pou lezot biznes ki pou afekte nou lagrikiltir lo nou bann zil elwanye.

Par egzanp lo nou zil Praslin i annan detrwa fermye ki ti dan aktivite sonny koson, ki'n vwar zot oblize arete. Akoz Gouvernman oparavan ti war i *ok* pou otoriz konstriksyon en letablisman touristik lanmenm

obor kot mon vwar ti vremen mal.

Mr Speaker *money talks* kot fermye i bezwen aret sonny koson. Ler nou pas lo blok ozordi nou pe vwar zis zerb zonnyon ek tantan ki pe pouse . Kan lontan se nou Pralinwaz ki ti sarz bato avek prodwi lagrikiltir pou anvoy Mahé.

Osi bann dimoun lo lezot zil ler zot vin vakans ou vwar zot ek zot gro sak ouswa bwat karton pe anmenn kot zot e sa ti vremen enteresan.

Mon analiz se ler Gouvernman i revwar sa *National Development Plan*, vwar si zot kapab donn en pe later ki'n ganny *allocate* pou lagrikiltir, lo bann zil prensipal ki pa pe ganny devlope. Pou transfer sa bann later pou rezidansyel parey nou konnen ki napa ase later pou fer lakaz lo nou 3 zil prensipal.

E nou annan bokou demann. Me nou annan ase later lo nou bann zil elwanye, alor annou servi sa bann later pou lagrikiltir. Sa Mr Speaker i ava fer ki nou pou rezourd sa problem konfli lentere.

Kot ler Zak i anvoy fer *guest house* Pol i le sonny koson e Mary Jane i oule son *bedsitters* lanmenm obor kanmarad. Sa i pou anmenn plis devlopman lo tou nivo. Par egzanp si

lamazorite nou prodiksyon lagrikiltir lo nou zil elwanye i vremen soutenab, alor sa i pou fer ki nou bezwen devlop nou Sekter Transpor lo Later e osi lo Lanmer kot i ava anmenn plis lanplwa lo nou zil elwanye.

Mr Speaker mon konpran ki Minister Lagrikiltir in deza en kantite kot i konsern konsesyon egzanpsyon lo *tax*, bann *lease* ase favorab, me nou bezwen vwar fason ki ganny zere par nou bann fermye.

Pou fini mon enplor avek sa bann fermye ki pe ganny sa bann benefis pou pas en pe avek nou konometer atraver zot bann pri zot agrikol. E osi annou prodwir plis diferan kalite, pou ki nou tou nou ava kapab zouir sa pli bon prodwi pou nou lasante.

E ki nou ava aret enport sa kalite prodwi e met lanmen ansanm pou fer lagrikiltir avanse lo nou zil Sesel. Avek sa kontribisyon mon sipor sa Mosyon ki'n ganny anmennen par Onorab Waven. Mersi.

### **MR SPEAKER**

Mersi Onorab. Onorab Labonte.

### **HON ANDY LABONTE**

Mersi Mr Speaker. Mr Speaker mon pa pou long. Me selman mon pou bezwen donn sa sipor

sa Mosyon. E mon santi mon oblize pou mon dir de mo lo la pou la senp rezon ki akoz mon'n deza travay lo en zil alor mon konnen ki savedir lavi zil elwanye.

Donk loter Mosyon ler in koze in koz lo devlopman soutenab, alor i enportan ki ler ki nou pe fer bann devlopman lo nou zil elwanye, nou pran kont tou laspe menm ki i annan serten zil ki annan devlopman touristik lo la, mon santi ki malgre touris i en ozordi pa pe anmenn bokou larzan, me par egzanp lo Desroches - Desroches kot mon konnen ki nou ti annan en lavi zil kot li i ti pli zou mwen lo kote lavi ekonomi ler nou pe koz lavi zil vilaz i ti pli zou mwen lekonomi kot nou ti an larmoni avek nou bout touristik.

E la mon mazine kot nou ti mazorite nou bann prodwir ki nou kapab kiltiv li lokalman nou ti ganny li lo zil elwanye. Menm nou *sewage* elektrisite, delo e tousala nou ti ganny li direkteman lo zil elwanye.

E la i fer mon mazin ler ki lotel Mosyon in dir, nou bezwen annan lapresyasyon e rekonesan gratitud ver *IDC* en bon travay.

Sa i vreman enportan, me i osi enportan pou nou fer konpran ki ler nou ganny

responsabilite pou nou dir diriz en bout en lorganizasyon, ki merit en lot benefis pou nou pei, pou nou dimoun, pou nou Seselwa nou pa abize osi. Nou plizoumwen fer li ki i dan lentere nou pep. E nou pa pran li pou nou byen personnel akoz mon krwar poudir sa i vreman enportan.

Aprè mon krwar poudir i fer *IDC* mazin travay petet an kolaborasyon avek - la mon pe mazin *APDAR*, ki i annan en program kot nou ed bann manrmay ki lo viktim eroin.

Me sa program i pa vreman *methadone* i plizoumwen *symptomatic detox*. E i annan bokou sa bann marmay ki ler zot in antre lo sa program, zot santi ki zot pa oule reste dan sa lanvironnman kot zot ganny lenfliyans drog.

So i enportan ki zot sorti, zot al aryer kot zot kapab fer zot lavi, an menm tan ki zot latizann e zot a osi kapab kontribye kot zot pe kapab plante, sonny zannimo prezan ava anmenn en reveni pou zot fanmir e pou kominote an zeneral.

Alor se pou se la rezon ki mon krwar poudir sa Mosyon i vreman en Mosyon ki enportan. E parey loter Mosyon ankor enn fwa in dir se ki rezilta 15 lo 10, ki ti kapab kree sa Komite ki'n

al vizit zil ki finalman rezilta 15 lo 10 i ti sorti 9 lo 16. E la ozordi nou'n vwar nou nou'n ganny nou en mazorite 20 lo 6 avek.

En bann Mosyon parey i pou ed nou ki petet ankor dan 5an nou pou vwar poudir *LDS* i pou'n fini *take over* sa Lasanble an zeneral, akoz nou pep pou vwar poudir vreman nou pe travay dan lentere nou pep.

Alor i enportan ki ler nou met bann Mosyon nou pran kont nou pep an zeneral nou pa zis ziz zot nou plito nou pran zot, zot anmenn zot *alongside* avek nou pou fer sir ki nou bouz devan pou benefis nou pei

Avek sa detrwa pti mo Mr Speaker mon pou dir mon pou siport sa Mosyon e i enportan ki nou kontinyen get dan sa direksyon. Mersi Mr Speaker.

### **MR SPEAKER**

Mersi Onorab. Onorab Bistoquet.

### **HON ROSIE BISTOQUET**

Mersi Mr Speaker. Parey loter Mosyon in eksplike bomaten, mwan lo mon bout mon santi ki sekirite alimanter i relye avek sa target sa anba diferan endikater sible ou devlopman soutenab ki nou dir *sustainable development goal*.

E sa mon krwar sa si in ganny dedye 2016 a 2030 e on krwar si Sesel i bouz li la mon krwar nou kapab *attain* en keksoz anba sa lagreman k i nou'n fer.

E sa nou konnen ti ganny dedye par Nasyon Ini pou ki lemonn antye i aplik tou son bann edikater an antye pou devlopman en pep.

E an menm tan pou amelyor sekirite alimanter nou popilasyon ki par egzanp isi Sesel pou fer sir ki tou dimoun i ganny en ladyet balanse.

Anba sa programm ouswa sa Lagreman so gouvrenans i sipoze i baze lo en baz ki solid ekitab e soutenab. Sa i devret ganny fer atraver diferan kalite lenformasyon ki kredib e model e soutenab avek bann teknolozi dan lagrikiltir, ki esansyel pou benefis pou en popilasyon.

Isi Sesel malgre nou annan en pti popilasyon nou ankor pa ankor depann lo nou lekor. Nou ankor pe depan lo lezot pei. Nou pa *self-sufficient* e an menm tan nou pa ankor kapab prodwi manze pou tou nou pep.

Nou enport laplipar nou komodite depi diri ziska zonnyon sorti aletranze pou nou popilasyon, pou li kapab ganny en ladyet balanse. Sesel osi dapre ti annan en rapor ki ti

ganny servi sorti par *FAO*, ki nou ti trouve poudir sorti an Out 2017 - 72poursan manze Sesel i konsonmen i enporte.

E sa i vedir ki en kantite manze ki Sesel i enporte. Parey lavyann koson mil tonn i ganny enporte zis 500 tonn ki ganny prodwir isi Sesel. E sa ki nou'n trouve poudir sel keksoz ki Sesel i tonm lo la se prodiksyon se prodiksyon dizef.

Ler mon dizef mon dir dizef poul. Sa i vedir ki nou bezwen balans sa lakantite ki nou prodwir ek sa lakantite ki nou pe enporte.

Mr Speaker lontan dan mon zenn tan mon rapel laplipar zil ti ganny devlope avek prodiksyon gro manze par egzant patat, mayok, lerouy, legim. Kot i konsern legim mon rapel zironmon sorti Praslin e lezot zil ti annan bred e lezot. E osi sa ki mon rapel se ki nou ti annan nou pa ti aste fri zoranz laboutik.

Laplipar landrwa lo zil tou e sirtou lakaz Sesel ti annan bann fri par egzant zoranz, zoranz mazanbik, bigarad pou nou ganny nou *vitamin c* e sa ankor mazin ponm zako, gouyav, zak i sirtou en lakaz dan lakour.

Sak lakour i ti annan en pti park koson kot zot ti ganny touye lavey lannen nou ti

prodwir poul e nou konnen ti annan nou poul lokal avek dizef ki i annan ase bann vitamin ladan.

Mon mazine osi ki poul ti ganny sonnyen lo zil parey taler mon bann lezot koleg in dir e ti ganny anmenn Mahé.

Konmela nou bezwen aste poul sorti aletranze avek en ta kemikal ladan, e osi sa ki nou mazine lavyann kabri lavyann ki tre ser. Pou ou manz en kare kabri ou pou bezwen enport aste kabri ki'n ganny enporte me lontan laplipar nou, nou lavyann kabri ti sorti lo zil tousala in fini mon bann zanmi. Mon krwar nou bezwen refer nou lespri pou en prodiksyon soutenab.

Mr Speaker malgre son fre e dan abondans isi Sesel, me sa i pa ase pou asire ki Seselwa touris ki vizit nou pei e osi lezot dimoun ki reste Sesel, zot ganny en ladyet balanse, ouswa ekitab avek ki napa kemikal ladan ouswa parey ki nou apel *organic*.

Me nou bann zil ti prodwir pwason sale pou met bann valer azoute dan nou pla Kreol, ki en pe rar konmela pwason sale i vann sitan ser.

Mr Speaker sa ki nou'n trouve vi ki Sesel i pa *self-efficient* e mon krwar nou bezwen sirtou kot i konsern



lagrikiltir, laplipar nou bann latet ki ti annan bann planter lo la ferme, tousala in ganny vann avek bann dimoun endividi, ouswa sa later in ganny devlope pou donn lakaz nou bann dimoun ki ankor nou bann zabitan ankor pe esper en lakaz pou zot reste ladan.

Alors Mr Speaker mon pa pou long mon pou siport sa Mosyon pou ki nou zil i ganny devlope, pou asir sekirite alimanter pou nou pei e siport devlopman soutenab nou pep. E an menm tan donn plis lanplwa nou bann zenn pou antre dan en karyer ki prometan. Mersi Mr Speaker.

**MR SPEAKER**

Mersi. Onorab Woodcock.

**MR SPEAKER**

Mersi. Mersi Onorab. Onorab Woodcock.

**HON WAVEL WOODCOCK**

Mersi Mr Speaker. Mr Speaker pou bokou lannen, bann zil Sesel, sirtou bann zil dan Amirantes ek bann zil elwanye, ti plito pou bann elit. Pou bann Prens avek bann Prens.

Nou'n vwar dan lepase kot serten zil in ganny servi koman bann zil prive. Sa ki *villa* in ganny fer lo la, Sef al vakans lo

la. La ozordi nou'n vwar sa bann *villa* i an rin.

E biznes lo zil ti plizoumwen bann menm dimoun ki'n benefisyé, avek bann biznes lo sa bann zil elwanye, sirtou lo bann zil elwanye.

E sete bann fanmir ek dalon, bann Prezidan lepase, bann manm Lafanmir Rwayal ki ou kapab dir ki'n plito, epanouir e ganny plizyer loportinite pou investir. Menm ouver bann biznes ki ozordi zot in fer bokou kapital.

Gouvernman avan, presedan *US/PL/SPUP*, pa'n ankouraz Seselwa pou investir lo bann zil elwanye. E dan lepase nou'n tann zot koz bokou lo, *MSMEs, micro small menm bann medium enterprise*. In koz lo la labous plen. Me le kestyon ki bokou Seselwa pe demande ozordi, se konbyen Seselwa ki'n vreman ganny sa loportinite al fer biznes lo zil elwanye, lo bann zil elwanye.

Ki nou'n vwar Mr Speaker, se *toute* le kontré. Kot nou'n vwar bann gro lakonpanyen ki'n ganny formen avek plizyer, plizyer, bann dalon. Ki enkli menm bann ki annan lentere dan *IDC*, ki'n annan monopoli lo plizyer zil elwanye.

Bann lakonpanyen ki'n ganny soutire par Gouvernman

presedan ;- parey mon a mansyonn enn *Corvina Investment Company Ltd.* E menm lakonpanyen ki annan *shares* dan lotel, lo plizyer zil parey Alphonse. Nou'n vwar dan lepase, lo bann diferan *website*, bann *advert* lo zil e nou okouran poudir, parey nou vwar bann Sidafriken kot in mont lo zil zot in fer bann pti diferan kalite biznes, *fly fishing*.

Me se toultan enn ou de gro pwason ki'n kapab fer sa bann kalite biznes lo sa bann zil dan lepase. Nou'n vwar dan lepase kot ler Seselwa zot, zot in sey mont lo zil i annan bokou Seselwa ki'n ganny fer taye lo plizyer zil elwanye, aköz zot pa annan drwa monte lo sa bann zil aköz sa bann zil i annan bann msye, bann gro msye ek bann gro madanm.

E nou Gouvernman, nouvo Gouvernman anba direksyon Prezidan Ramkalawan pe met plis lanfaz lo lenvestisman lo bann zil elwanye.

E ankouraz Seselwa pou investir lo sa bann zil elwanye. Sirtou dan domenn parey bann Manm ki'n koze avan mwan in tous lo la. Domenn lagrikiltir lo lelevasyon zannimo. I annan plizyer Onorab ki'n koz longman lo la, dan lo *aquaculture*.

E osi mon krwar Onorab Labonte in osi mansyonn *tourism*, sirtou *eco-tourism*. Bann keksoz ki nou kapab met plis lanfaz. Envestir ladan e ankouraz, *facilitate* bann Seselwa pou zot kapab antre dan sa bann diferan lenvestisman, ki pou ed nou pei, pou anmenn plis reveni Sesel.

E osi fer nou, nou lagrikiltir pli soutenab. Ki olye nou pe depan lo lenportasyon nou kapab pe prodwi nou bann keksoz fri ek legim e lezot lavyann, parey i annan ki Onorab Bistoquet in koz lo lavyann koson. Bann lezot kek, lavyann ki nou kapab konsonmen dan nou pei.

Parey mon'n dir olye ki nou pe depan lo lenportasyon sa bann keksoz sorti dan bann pei etranze. En lot keksoz ki Gouvernman i kapab konsidere. Gouvernman i kapab konsider, *lease* later avek Seselwa pou investir.

Nou'n vwar dan lepase lo plizyer zil elwanye dan Amirantes, menm en bann pli pros kot bann zil in ganny *lease* pou preski nanryen. I annan zil ki'n ganny *lease* pou R1 pou 99an. I annan bann lotel ki'n antre ki'n pa'n pey preski gran zafer.

Me selman le kestyon ki ou demande sa lekel sa bann dimoun ki'n investir atraver sa bann lotel ki'n antre ki'n vin investir lo nou bann zil pou fer lotel, lo bann zil dan bann lannen pase anba Gouvernman presedan.

Me ler nou pe dir ki nou bezwen ankouraz investiser lokal, nou bezwen pran kont ki i pou bezwen bann investiser serye. Ki annan en bon proze. Me pou sa arive, kontrent ki mon prezimen bokou dimoun pe fer fas avek, e i pou fer fas avek se fasilite kredi.

Wi mon konpran sityasyon ki nou ladan ozordi, sityasyon *COVID* ki afekte nou non selman ki en kriz lasante me selman osi i en kriz ekonomik.

Gouvernman mon prezimen i pou bezwen donn en serten lasistans pou fer provizyon kapital atraver *loans*, ouswa menm bann Labank Komersyal osi bann fasilite kredi *loan* pou Seselwa kapab ganny sa kapital pou fer sa bann investisman lo sa bann zil elwanye.

Sa i tou bann keksoz ki Gouvernman bezwen pran konsiderasyon. Tout an prenon kont ki ozordi nou pe sey sorti dan en kriz ekonomik ki nou ladan.

E en keksoz ki nou tou nou konnen, ki'n ganny fer resorti a plizyer repriz dan lepase par plizyer Minis e bann dimoun dan Gouvernman, se kou deplasman pou al lo zil.

Kou karbiran i vremen, vremen eleve. E pou bann dimoun ki pe al investir lo zil i kout zot en kantite larzan, e sa en keksoz. Yer ti annan en kestyon lo sibvansyon kou *fuel*, pou bann diferan bato, menm bann bato kargo *schooners* eksetera.

E mon santi poudir pou investir lo zil definitivman i pou annan posibilite ki Gouvernman pou bezwen antre pou sibvansyonn kou karbiran, pou sa bann deplasman pou al lo bann zil akoz nou konnen i kout en kantite larzan.

Tousala i bann keksoz ki pou bezwen ganny pran an konsiderasyon, si nou pou ouver bann zil pou bann investiser lokal pou al lo la, pou zot fer bann devlopman, bann diferan lenvestisman e biznes.

Me en keksoz ki mon santi ki kapab ed devlopman e ankouraz lenvestisman, se i enportan ki nou osi les lezot lakonpanyen aeryen, bann lezot *airline* antre pou fer *flight* lo zil elwanye. Nou pa kapab zis, i pa kapab zis *IDC* ouswa *Zil Air* ki kapab fer *flight* lo bann zil

elwanye, bann zil dan Amirantes e bann zil elwanye.

Sirtou bann zil elwanye. E le keston ki bokou dimoun pe demande se ki akoz ki *Air Seychelles*, *Air Seychelles* menm pa kapab fer *flight* lo bann zil elwanye. *Air Seychelles* napa drwa fer *flight* lo bann zil elwanye.

E si sa ti posib Seselwa ti ava ganny plis akse avek sa bann zil . E mon'n al fer resers e mon'n aprann poudir dan lepase ti annan en Polisi kot lontan *IDC* ti napa drwa fer bann vol, Mahé/Praslin, zil pros. E *Air Seychelles* ti napa dwa fer bann zot lo bann Zil elwanye.

Me resaman mon'n aprann poudir *IDC* ozordi zour i pe fer *flight* Mahé Praslin. Me *still Air Seychelles* napa drwa fer *flight* vol pou al lo bann zil elwanye, ki sa ti pou ede pou donn akse nou pep avek sa bann zil elwanye.

En lot keksoz ki petet nou ti kapab konsidere i annan bokou krwazyer ki vin Sesel e zot fer bokou milyon. Akoz ki nou Sesel nou pa kapab ankouraz bann biznesmenn lokal pou antre dan biznes annan bann pti bato krwazyer, bann pti bato krwazyer lokal pou fer letour dan nou losean.

Nou annan en gran *EEZ* e sa i osi i kapab vin en form reveni ki i kapab anmenn parey mon pe dir en bon larzan dan nou pei. E i annan Seselwa ki kapab investir dan sa bann keksoz.

Ou konnen nou vwar plizyer bann lakonpanyen parey lakonpanyen, mon a donn en egzantp *Dream Yacht*, ki Sesel ti Sesel la ozordi i annan brans partou dan lemonn. Zot dan biznes *yacht*, akoz ki ozordi nou Sesel parey bann pei pli pre avek nou?

Parey ou pou get bann pei parey Maldives ou pou get bann lezot pei menm *Maurice*, ou vwar bann dimoun pe sorti dan zot pei, pe fer *investment* dan bann lezot pei.

Zot in fer bokou larzan. Tandis ki Sesel, ou plizoumwen vwar bann etranze ki antre Sesel ki devlop bann *Five Star hotel*, ouswa ki antre dan bann biznes parey *yachting*, parey nou vwar *Dream Yacht* parey mon'n koz lo la e lezot ankor.

Ki ozordi nou annan bokou etranze ki i milyonner akoz zot bann investisman ki zot in fer lo zot bann zil, parey Maldives zot in fer bann Maldivyen in fer lenvestisman avek bann zil otour zot.

Me nou Sesel nou pa'n ganny sa loportinite pou fer sa,

akoz in toultan kot i konsern nou bann zil la, in annan en kontrol lo la kot zis 2 ou 3 dimoun parey mon'n dir, bann elit, bann Prens ek Prensés, bann Lafanmir Rwayal se zot ki'n annan sa monopoli.

Bann lakonpanyen zis enn ou de dimoun vreman, ki'n *enjoy* ki'n rezouir dan nou bann zil elwanye.

E mwan mon santi ki i annan bokou potansyel pou devlop nou bann zil elwanye, nou bann zil elwanye. E i annan bokou loportinite pou Seselwa kapab investir, antre dan sa bann zil e fer bann devlopman ki pou benefisyé nou pei *as a whole*.

E alor sa Mosyon ki Onorab Waven William in anmennen ozordi. I en Mosyon ki nou pou konsider li vreman serye e nou bezwen ouver nou bann zil pou ki tou nou bann frer ek Seselwa, osi i kapab benefisyé avek sa resours ki Bondye in donn nou. Avek sa de mo mon dir ou mersi Mr Speaker.

**(APPLAUSE)**

**MR SPEAKER**

Mersi Onorab. Onorab Bastienne.

**HON DESHEILA BASTIENNE**

Mersi Mr Speaker. Bonn apre midi Mr Speaker. Bonn apre midi tou Onorab e bonn apre midi tou dimoun a lekout.

Mr Speaker, letan nou pe pran kont sa Mosyon lo devlopman nou bann zil elwanye, parey loter Mosyon i kontan fer referans, dan nou manifesto 2020 i tous bokou lo plan devlopman lo bann zil elwanye, ki pou ede anmenn en gran kontribisyon dan lekonomi nou pei.

Mr Speaker anba sa bann tit swivan dan sa manifesto *LDS* tel ki;- *Building a new economy, Top fisheries industry,*

*Expand commercial viability of crops and livestock;-*

*Using our inter islands integrate them into a national plan for agricultural development,* tousala i montre nou ki nou bann zil i annan en gran par pou zwe ladan.

Mr Speaker i tre e tre enportan ki nou ankouraz devlopman kontinyel lo nou bann zil dan en pli gran lanpler, pou nou asir konsonmasyon alimanter kontinyel. E osi anmenn travay pou bokou nou pep atraver partisipasyon lezot akter prive akote *IDC*.

Mr Speaker dan lannen '60 mon ti ankor zanfan, lafanmir Oredy ki form parti

mon fanmir ti kit Mahé e al travay lo Ile Aux Vaches, ozordi apele Bird Island anba *management* Mr Robert Delorie e osi en nonmen Mr Guy Savy.

Mr Speaker malgre mon ti ankor zanfan tou le mwan nou ti resevwar legim, fri, pwason sale tou kalite ek lavyann sorti kot zot lo zil .

Sa i montre nou ki laplipar nou bann zil ti pe prodwi legim, fri, pwason ek lavyann byen lontan. Kot menm Mr Speaker, nou tou konnen ki lavyann torti sa letan ti en delikates ki ti desann Mahé tanzantan e ti vann lo bazar Victoria.

Mr Speaker, bokou dimoun ti swazir pou al travay lo zil pou plizyer rezon, ki ti konpri partisipasyon dan prodwi agrikol nou pei. En fason pou arive fer en *savings*, an menm tan pou serten ki ti zis anvi en sanzman en lavi trankilite.

E osi serten ki ti pe pas dan difikilte pou ganny en landrwa reste. Alor pou zot al lo zil ti zot sel rekour. Mr Speaker sa ti osi ede, pou ganny bokou travayer pou ouver lagrikiltir lo zil e pou agrandi prodiksyon dan tou domenn.

Avek en varyete fri, legim, lavyann, ki ti ganny entrodwir lo diferan zil elwanye. Sa ti fer ki prodwi agrikol lokalman ti

vin en sikse kot dan lannen '80 ti annan en lesey lo prodiksyon ponmdeter ki ti fer vreman byen li osi pou en serten letan.

Mr Speaker dapre en *census* ki ti ganny fer lo prodwi lokal e dan Sesel 1978, ti prouve ki dan lespas 12mwan de tonn fri ti ganny kiltive e rikorde. E ti ganny klase koman *the main fruit types of Seychelles*.

Mr Speaker loter Mosyon in tous bokou lo letap devlopman nou bann zil ki'n fer nou santi sa kalite travay e osi sa zwa de viv ek leksitasyon ki ti egziste lo bann zil depi byen lontan.

Plis ki 250 fanmir ti anploye *full time* dan prodwi agrikol e bokou fanmir ti pe travay lo en baz *part-time* lo bann diferan zil kot parmi sa bann fanmir, serten ti menm annan letan pou okip zot prop zarden, sonny zot zannimo kot lakour, pou zot prop konsonmasyon. E zot ti menm annan zot drwa anvoy en pti kargezon kot zot fanmir Mahé.

Dan lannen '92, prodiksyon agrikol lo nou bann zil ti preski kas rikord e lenportasyon ti bese. E ankor loter Mosyon in tous sa bann zil ki ti pe fer vreman byen dan bann diferan kalite prodwi.

Ozordi nou vwar zil Coetivy pe kas rikord dan prodiksyon poul ek bef enkli dizef poul enkli lezot prodwi.

Me nou bezwen osi relev devlopman lo lezot nou bann zil elwanye, ki nou pa pe tann preski nanryen lo ki pe arive laba ozordi.

Mr Speaker, prodwi agrikol lo nou bann zil ti eksepsyonnel. Nou ti pe konsonm prodwi ki ti sen, dan en lanvironnman prop san okenn kemikal azoute.

Lo nou zil elwanye, nou ti annan, ti annan dizef poul parey lezot in mansyonnen oparavan. Mai, zepis, pwason sale, lavyann *pork*, kabri, denn kannar enkli lapen. Nou ti annan kannel, lavanniy, dipwav, delwil koko, patsouli sitronnel, dite. Tou sa bann prodwi lokal ti anmenn larises ek deviz dan nou pei.

Mr Speaker, se sa ki bann etranze i anvi goute letan zot vin Sesel. Non pa zot prodwi, ki zot konsonmen toulezour.

Zot le dekouver nou prodwi lokal ek nou prop kiltir. Avek larantre (SMB) - *Seychelles Marketing Board* ti annan en bann sanzman e la konparezon ti ganny fer ki prodwi lokal. Enport ki prodwi agrikol enporte ti kout pli bonmarse ki prodwi lokal,

malgre Gouvernman ti pe pey *tax, freight* ek lezot depans ki al avek kou lenportasyon.

Ozordi nou vwar nou pe enport tou sa komodite, kot bokou stres pe ganny mete lo deviz etranzer. Mr Speaker, mwan mon senserman krwar ki avek tou determinasyon ek konviksyon nou Gouvernman, avek tou korperasyon e sipor *IDC*. E osi avek nouvo fason fer, dan lemonn ozordi, tout an prenon kont teknolozi modern, devlopman lo nou bann zil pou re fleri.

E sa i ava ankouraz e atir bokou nou zenn ki annan sa lentere dan lagrikiltir, ouswa pe rod lans dan en biznes. Mont lo nou bann zil e al travay pou siport lekonomi nou pei e osi pou zot prop lavenir.

Mr Speaker bokou manman ozordi pe priye e pe eksprim zot dezir ki zot zanfan i a ganny sa sans pou al travay lo zil pou ede, pou ed zot sorti dan bann fleo sosyal sanz zot lavi e kontribye dan lekonomi pei.

Bann prizonnyen ki pe al lo santans kriminel, bann dimoun ki pe ganny difikilte ganny en travay akoz zot nivo ledikasyon. Travay lo zil i pa en dezoner me i pou ede elev lekonomi nou pei, ganny en saler e siport zot fanmir dan en fason.

Mr Speaker, avek sa mon pou siport sa Mosyon. E mon pou demann lezot Onorab osi pou siport sa Mosyon pou nou siport lekonomi nou pei e kree travay pou bokou nou zenn ek nou fanmir Seselwa. Mersi.

**(APPLAUSE)**

**MR SPEAKER**

Mersi Onorab. Onorab Romain.

**HON GEORGE ROMAIN**

Mersi Mr Speaker. Bonn apre midi Mr Speaker. Bonn apre midi tou bann koleg Onorab. Mr Speaker mon pou premyerman siport sa Mosyon anmennen par Onorab William, aköz mon krwar ki enn ki vreman enportan dan devlopman nou pei.

Mr Speaker, espesyalman avek larive sa pandemik COVID-19 in montre nou ki fodre nou kapab prodwir plis nou prop manze. En leson enportan ki fodre nou pa oubliye.

Nou bann zil Mr Speaker i reprezant en gran par nou teritwar. E nou merit kapab devlop zot lo maksimonm. Ki a kontribye anver prodiktivite alimanter, dan nou pei.

E sa i a ede kree bokou lanplwa espesyalman pou nou bann zenn ki enterese fer lagrikiltir. Mr Speaker ler nou

koz Sesel, nou pe koz 115 zil ; - 115 zil ki Bondye in donn nou e non-pa zis Mahé, Praslin, La Digue ek enn de lezot.

Later nou konnen ki en resours ki limite, me parkont menm si nou krwar sa i en resours limite, bokou nou bann zil i annan later an abondans. E ki merit pe ganny devlope, e ki ozordi nou kapab servi li ankor plis dan mannyer efikas pou benefis nou pei.

Mr Speaker, mon krwar ki nou'n mank sa loportinite dan lepase, pou atir nou bann Seselwa pou al fer lagrikiltir lo zil elwanye. E petet aköz dan lepase ti napa ase lenfrastruktir lo sa bann zil e ni lankourazman ki'n fer ki bokou dimoun pa'n montre sa lentere.

Ozordi Mr Speaker, i an bokou zenn ki pe rod en karyer dan lagrikiltir, e pe rod later pou kapab devlope. Dan mon distrik mon annan zenn e osi menm bann pli aze ki'n apros mwan e pe rod sa loportinite pou pa zis plante me osi fer elevaz zannimo.

Ziska ozordi zot ankor pe esper zot later Mr Speaker. Mr Speaker, sa i montre nou ki i annan demann pou en tel loportinite kot nou a kapab devlop lagrikiltir lo en pli gro nivo. Anliny avek sa ki ti ganny prononse dan nou manifesto



*LDS*. Sa ava osi redwir presyon lo bann demann later ki annan Mahé e Praslin.

Mr Speaker, me i enportan osi ler nou pe devlop lagrikiltir lo nou bann zil elwanye. Nou pe osi ede pou anmenn plis prodwi lokal avek nou popilasyon, e an retour i ava kapab koup lo lenportasyon fri, legim ek lavyann e fer nou vin pli otosifizan dan sa bann sekter.

Mon asire sa pou definitivman ede pou redwir presyon lo nou deviz etranzer, ki a kapab ganny servi pou aste lezot komodite enportan.

Mr Speaker, ler nou pe koz lo devlopman soutenab, nou bezwen definitivman enkli tou nou bann zil ki annan potansyel. Me selman mon krwar ki nou merit fer li en pe pli atiran, pou travayer konsider sa opsyon pou al travay lo zil elwanye.

Akoz zot pe kit zot fanmir deryer e sa i pa toultan fasil pou tou dimoun, Mr Speaker. Par egzant amelyor konfor lozman, fasilite kominikasyon pou pli byen kapab kominik ek fanmir e osi fasilite transpor pou monte desann lo zil merit en pe plis souvan e osi pli afordab.

En lot lankourazman petet se en *Scheme* zot avan annan en fasilite *loan* avek en lentere ki ba. Ki a kapab ganny konsidere

pou bann ki vwar zot pe lans dan sa kalite biznes enportan pou nou pei.

Mr Speaker pou konklir, mon krwar sa ki enportan se kree bann kondisyon e sa lanvironnman ideal, ki ava osi ankouraz travayer pou al lo zil elwanye. Koumsa dimoun a santi zot pli konfortab pou zot konsider sa deplasman.

Alors Mr Speaker, mon demann tou mon bann koleg Onorab pou donn zot sipor sa Mosyon. Mersi bokou Mr Speaker.

**(APPLAUSE)**

**MR SPEAKER**

Mersi. Onorab Letourdie.

**HON JANY LETOURDIE**

Mersi Mr Speaker. Bonzour tou dimoun. Alor, prenon kont vites devlopman lo Mahé e bann zil pros pou satisfere demann lespas pou fer biznes, later pou konstri lakaz e pou fer lagrikiltir, alor Mosyon Onorab William pe demann Gouvernman atraver Lasanble Nasyonal, pou met plis lanfaz lo lafason ki bann zil elwanye pe ganny zere dan en fason pou kree ankore plis loportinite pou plis devlopman soutenab e sa Mr Speaker i aplik sirtou pou bann zil ki annan sa potansyel.

Mr Speaker, dan en apersi lo Sesel, *National Marine Ecosystem Diagnosis Analysis (MEDA)* i dir ki malgre souvandfwa i ganny quote ki Sesel i annan 115 zil an tou.

Me Konstitisyon Larepublik Sesel i ilistre 155 zil e an adisyon a sa 155 zil i annan 7 lezot ki'n ganny konble e sa Ile Perseverance, Ile Aurore e Ile de Romainville, Ile Eden - (mon mazine pe dir Roche Caiman) Ile Eve, Ile du Port et Ile Soleil.

Alors an tou Sesel i kouver en total 456kilomet kare later. Me sepandan 99.97poursan i fer losean Sesel.

Mr Speaker, later Sesel i ganny divize an de kategori;- setadir later e apre later bann propriyeter prive. Selon en rapor resan sorti kot *World Bank* Sesel i parmi bann pei ki annan pli pti git poursantaz later pou fer lagrikiltir ozordi. Ansanm avek *Suriname, Greenland, Sengapour, Bahamas* ek *Norway*.

Me Mr Speaker, sa pa fer Sesel vin enferyer, akoz fodre ki nou realize ki, malgre sa pti git ki nou annan, nou pe fer nou kontribisyon anver lemonn nou osi. E alor Mr Speaker, fodre pa ki nou perdi konsantrasyon dan demars pou kontinyen ankouraz nou bann fermye e

lagrikiltir an zeneral. Sankwa sa lemonn ki nou pe viv ladan i pou perdi son kapasite pou sonny son lekor.

Dan lot kote Mr Speaker, misyon Minister Later ek Labita, se pou fasilite devlopman sosyoekonomik atraver litalizasyon ki efikas e soutenab nou later pou labita e bann lezot lenfrastruktir ki nou bezwen.

I fer sa atraver bann Polisi, lankadremman travay ek bann regilasyon ki efektiv, e osi atraver bann servis teknik ki i rann nou piblik.

An Desanm 2015 Rapor Oditer Zeneral, devan Lasanble Nasyonal e i ti ganny table le 01 Mars 2016, ti pe evalye si *MLUH* ti pe kapab zer later rezidansyel Leta, dan en fason efikas e efektiv pou en peryod depi Zanvye 2009 ziska Desanm 2014.

Lofis Oditer Zeneral i vwar ki *MLUH* pa'n kapab met en sif a bann plot later rezidansyel, akoz zot ti napa en lalis kredib bann endividi ki ti'n fer laplikasyon later. *MLUH* li i ti agree ki zot pa ti kapab fye lo sa lalis bann aplikan dan preski 90poursan bann distrik pou plizyer rezon, Mr Speaker.

Lofis Oditer Zeneral i kontinyen par dir ki i krwar i pa ti vwar okenn dokiman ki swa

long ou kourt term, par rapor a plan ki montre direksyon stratezik *MLUH* lo fason soutenab itilizasyon later rezidansyel dan Sesel.

E sa Mr Speaker, i nesese pou kapab adres bann defi vizavi demann kontinyel pou later. Pareyman Minister ti napa okenn prosedir formel ki'n ganny aprouve oubyen dokimante, ki souliny klerman bann diferan Letap dan prose pour alokasyon later, osi byen ki rol ek responsabilite sa Minister an kestyon.

Mr Speaker, *MLUH* in selman komans devlop en plan stratezik pou lilizasyon e devlopman later dan Sesel, an Zilyet 2015 e sa ti ankor dan staz draft, letan ki sa rapor ki mon pe koz lo la ti pe ganny finalize.

E an Out 2018 Departman Later ti pibliy en Polisi lo lavant later Gouvernman ek *Land Bank*. In ganny fer resorti ki Leta i annan en *fair share* li osi dan later Sesel e ki sa se sanmenm sa Minister ki responsab pour zesyon sa bann *asset* lo lapar Gouvernman.

Donk kontrandi in ganny fer resorti ki pou plizyer lannen, manm piblik in fer laplikasyon pou aste later avek Gouvernman plito avek prive,

pou zot konstrir zot bann lakaz ek lezot lenfrastruktir.

Anfen mon ti pe rod en mo mon pa'n gannyen, so si zot a kapab ed mwan. *Subsidization* in toultan reste lentansyon Gouvernman, pou kapab annan en distribisyon ekitab avek bann Seselwa. E se sa, sa faktor faktor ki'n gid sa demann dapre sa kontrandi - sibvansyonnen mersi.

Malgre plizyer sitwayen in ganny asiste Mr Speaker pou plizyer lannen, konklizyon zenerallo lefe sa lobzektif ,se ki en bon poursantaz aplikasyon pa'n kapab reisir. Alors demann pou later Mr Speaker i reste tre o.

Neseseite alors pou reviz sa Polisi, ti non selman pou asir latransparans dan distribisyon, me osi pou garanti *fairness* e rann kont dan lafason ki later i ganny distribye. Sa Polisi revize i sipoze asir en amenazman ki soutenab, me i domaz Mr Speaker ki sa in vin dan en fason dan en moman kot later aprezan in vin rar parey korn lisyen.

I domaz ki nou pa'n zer nou pti morso avek prekasyon, san mazin nou popilasyon ek devlopman ki ti pou ogmante avek en lavites enorm Mr Speaker.

Nou'n aranz Polisi nou deranz Polisi, san okenn bango pou li kapab byen morde.

Rezilta Mr Speaker, lafanmir pe kontinyen agrandi enn lo lot ;- PMC pe deklar lager avek bann sitwayen ki pe fer son pti biznes kot li dan flat. Onorab William pe anmenn ankor Mosyon e Sesel i bezwen plis lespas ankor pou li met *halfway homes*, Lopital Spesyalize, Kordgard, klinik e lekol eksetera Mr Speaker.

Mr Speaker, depi mon'n dan sizyenm Lasanble, mon pe temwanny plizyer kestyon avek Mosyon ki'n ganny anmennen zisteman pou demann Gouvernman, pou vin pli vizilan e pou azir vit lo sityasyon later dan Sesel.

E la dan sa setyenm Lasanble, kestyon ek Mosyon i vin ankor. Gouvernman in sanze e mon enplor nouvo ladministrasyon pou vreman pran sa koman enn zot bann size mazer, koman zot konversasyon Mr Speaker.

*Think tank, think big, think outside the box.* Angaz manm piblik, bann propriyeter prive, bann eksper e nou bann Pei Zanmi dan sa bann konversasyon pou nou kapab trouv meyer solisyon ki soutenab, afordab e ki pa pou osi fer ditor nou lanvironnman.

Mr Speaker, krwar mwan, i fer en lefe sagrinan oubyen mekontantman, letan sitwayen dan son distrik i vwar bann gro, gro batiman ki kontinyen pe ganny konstrir e gran, gran propriyete petet ki zis la e pa pe ganny devlope.

Me selman li i annan 10 a 30an depi ki i pe esper en pti bout later oubyen en pti lakaz, oubyen en pti landrwa pou li kapab komans son pti biznes.

Mr Speaker, en dimoun ki pa byen sosyalman parfwa i perdi lantouzyazm koman en sitwayen responsab.

Dan mon letan lanfans mon rapel sa bann prodwi, bann gro, gro kes ti vini sorti kot nou bann fanmir. (E i annan la in fini defen) zot ti anvoye pou nou isi Mahé sorti lo zil kot zot, zot ti'n la travay. Zironmon, lavyann ek pwason sale, dizef zwazo, kalipi, bannann, gato Kreol ek lezot prodwi ankor Mr Speaker, ki pa pou gat vitman. Akoz sa letan parkour bato ti long.

Nou bann fanm avek nou bann zonm Seselwa, ti vreman travay dir e prodwi agrikol pa ti manke.

Mr Speaker, ozordi ler mon vwar sa bann program 'En Lepok dan nou Listwar' mon zis ganny en santiman nostalgik e mon dir avek mon

lekor, si zis nou ti kapab ankouraz bann ki ankor annan kouraz ek determinasyon pou refer, parey zot ti fer parey lotrozour.

Avek en bon planifikasyon, avek nouvo teknolozi ki pou ranplas bokou keksoz ki ti ganny fer mannyelman a sa lepok, e avek en bon kondisyon travay ek *incentives*, mon krwar ki nou kapab atrakte bokou dimoun, sirtou bann zenn pou al travay ankor lo nou bann zil elwanye.

Mr Speaker loter Mosyon, in donn nou en bon apersi lo lakantite devlopman ki *IDC* in arive fer ek son bann zil pandan son long parkour. Alors i kler ki in kree bokou loportinite travay dan Sekter Tourizm avek Lagrikiltir.

An konklizyon Mr Speaker, lalis bann zil ki tonm anba *IDC* in ganny nonmen, me les mwan azout sa pti morso avek ki tou ansanm zot kouver en total 6925.5 ektar later. E la mon panse i ankor reste bokou potansyel e ankor en pe lespes pou nou Sekter Lagrikiltir sirviv, dan en fason efikas e dirab. E sa i a kapab koup en pe lo nou, lenportasyon.

En bon plan stratezik pou bann zil elwanye ki annan potansyel, pou devlop lagrikiltir se sa ki nou bezwen Mr

Speaker. E i devret parmi lalis priyorite sa Gouvernman *du jour*. Mr Speaker, *where there is a will there is a road!* Mersi.

**(APPLAUSE)**

**MR SPEAKER**

Mersi. Nou'n pre ou depas *regulation time*. Me Onorab Georges in endik mwan ki son lentervansyon pou kourt. Alor mon krwar avek zot konprenezon nou a prolonz en pti git e nou a termin ek sa Mosyon la. Onorab Georges.

**HON BERNARD GEORGES**

Mersi Mr Speaker. Mr Speaker mon, atraver ou kekfwa nou kapab dir avek bann Manm lo lot kote latab, si zot anvi al dezennen zot kapab ale, deza akoz i pa paret ki zot pou koze. E zot tou zot pe montre ki zot pa enterese sa Mosyon. Tousala, figir i dan zot *computer*, eksetera pa. Kekfwa zot ava en pe pli konfortab dan zot biro oubyen al dezenn en pe pli boner ozordi.

*(laughter)*

**MR SPEAKER**

Les sa pase Onorab Georges. Annou kontinyen.

**HON BERNARD GEORGES**

Mersi Mr Speaker. Mr Speaker mon ti anvi zis liber, liber zot dan zot problem. Mr Speaker, mon bezwen pran laparol malgre ki i tar. Mon ti a, akoz sa set en Mosyon tre enportan.

E nou bezwen donn li son lenportans ki i merite. Akoz mon krwar Onorab Waven William in vwar egzakteman nesosite ki tou bann Manm ki'n koze la bomaten in koz lo la, pour valoriz nou bann zil elwanye. E sanz en pe sa *mindset* ki nou koman en pep Seselwa nou ladan, ki nou teritwar i la.

E sa ki laba deor i teritwar en lot bann dimoun e i pa konsern nou. E sel keksoz ki nou, nou atraver bann refleksyon ozordi, sel keksoz ki nou, nou annan vizavi sa bann zil elwanye se en memwar botan, ler nou bann zans ti al travay laba e ler bato ti retournen i ti retourn plen avek komodite, eksetera.

E mon krwar lespri Onorab William se poudir nou dan son Mosyon. Sa i byen, me annou regard en pti pe lavenir. E regarde ki mannyer nou ava anmenn sa bann zil pou form par teritwar Sesel. Non selman zeografikman oubyen atraver en lalis dan premye *schedule* nou Konstitisyon, me annan zot par egal dan kontribisyon

ekonomik ek sosyal nou pei. Mon krwar se sa son bi e lo la mon konnen ki i pou ganny sipor Lasanble.

Mr Speaker, mon pa bezwen al dan sa ki nou ti fer ek bann zil dan lepase. Me les mwan *focus* lo en pti keksoz bomaten dan sa detrwa pti minit ki ou'n donn mwan. E sa se nou bann zil i annan plizyer vokasyon. Me nou kapab dir zot annan kat vokasyon.

Enn se en vokasyon tourizm, ki'n ganny eksplwate a fon par *IDC* e plito byen. Dezyenmman se en vokasyon, lagrikiltir, lelvaz e *cash crop* ki pa'n ganny eksplwate o maksimonm.

Trwazyenmman se en vokasyon lanvironmantal e katriyenmman set en vokasyon rezidans pour Seselwa ki anvi al reste lo bann zil elwanye.

E sa pa'n ganny touse ditou. E mon krwar dan sa Mosyon nou bezwen regard en pti pe pli lwen ki model ki *IDC* in servi. E mon zwenn avek Onorab William akoz nou'n fer letour bann zil e nou'n vwar ki mannyer, kot *IDC* in reisi, in reisi byen e nou annan bann kont *IDC* i pa bezwen en sibvansyon avek Gouvernman akoz i fer sifizaman larzan eksetera, eksetera.

Me sa i pa oule dir ki se sel model. E mon krwar sa ki Onorab Waven William pe *challenge* nou pou fer ozordi, se pou trouv en lot model devlopman pou nou bann zil elwanye. E se le kot mon ti a kontan ankouraz li e siport sa Mosyon.

Gouvernman i annan en kantite keksoz lo son latab pou lemoman pou li regarde, me nou bann zil se en keksoz ki absoliman fondamantal.

Mwan Mr Speaker, mon'n ganny en gran loportinite atraver mon lapartenans dan Komite Zil Lasanble Nasyonal pou vizit preske tou nou bann zil elwanye, pou pas letan pou etidye zot pou vwar zot bann kompleksite ek zot, zot bann keksoz ki zot kapab anmennen pour nou pei.

Mwan osi akoz mon en Manm en Board (*ICS*) - *Island Conservation Society* mon annan loportinite regilyerman pou revwar en pti pe lo kote lanvironnman ki sa ki pe pase dan sa bann zil elwanye. E mon fyer e mon annan loner poudir ki mwan mon *Chair* Fondasyon Farquhar, ki regard spesifikman lanvironnman lo Farquhar li menm.

E mon kapab dir ki sa bann zil Mr Speaker, san al dan okenn detay ki nou napa letan

pou nou al ladan, i annan en potansyel lanvironmantal enorm. Enorm.

Pa zis Aldabra. Me ler nou regard Marie-Louise ki kapab vin, ki pou vin en, en *birds sanctuary* li menm. Nou regard lo zil Ile du Sud, Farquhar ki annan en popilasyon *Red-footed booby* fou, ekstraordiner.

Mon regard bokou bann lezot zil ki annan bann keksoz ki nou pa vwar dan okenn landrwa. E nou bezwen ouver sa bann zil pou nou sitwayen. Nou pa devret les zis Manm Lasanble, oubyen en serten group dimoun kapab annan loportinite pou kapab al get sa bann zil elwanye.

Me nou tou nou bezwen kapab al *enjoy*, regard lakantite tortidmer ki annan dan lagon Cosmoledo avek dan lagon Astove. Nou bezwen kapab al ganny emerveye par koloni zwazo lo zil Gaulette, Farquhar oubyen Bird Island, oubyen Desnoeufs.

Tousala se bann keksoz ki mon krwar nou devret regard ladan. Me dan sa pti letan ki nou annan permet mwan Mr Speaker poudir, ki i annan serten zil ki kapab annan en *multi-sectoral development* e ladan nou kapab regard Coetivy parey in ganny dir. Coetivy i kapab annan lotel, i kapab

annan lagrikiltir, i kapab fer lelvaz kanmaron lo en baz, pou nou isi Sesel san bezwen. Nasyonal, se sa mo ki mon pe rode. I kapab annan en vokasyon environnmental. Assumption parey.

Assumption i kapab annan en baz militer Seselwa, natirelman. Me osi annan aköz i annan pli zoli lans dan tou nou larsipel, ki kapab osi annan en vokasyon touristik li menm, san kont lefet ki i *stepping stone* pou Aldabra.

Donk tousala se bann keksoz ki pa'n ganny fer la, me ki kapab, kapab ganny fer dan lefitir. E mon ti a kontan regard dan sa direksyon.

En lot keksoz ki avan mon konklir Mr Speaker, en lot keksoz ki mon ti a kontan vwar. E la bann Manm lo Komite Zil i konnen, ki mon'n demann sa e mon'n ganny konfirmasyon ki sa pou ganny fer, se fer en fason pou ki Seselwa i kapab non selman vizit sa bann zil a en pri abordab. I annan en *guesthouse* lo tou sa bann zil elwanye, i annan posibilite atraver *IDC* ganny loportinite pou al lo sa bann zil .

Fodre nou devlop transpor aeryen ankor plis. Sa Gouvernman i ava deside si *IDC aviation* avek *Air Seychelles* eksetera. Annou pa antre

ladan. Me loportinite i annan la pour ki plis dimoun i al vizit bann zil elwanye.

Me plis ki sa fodre ki nou kapab lo 4,5 sa bann zil e mon pe mazin Farquhar, mon pe mazin Coetivy, mon pe mazin Poivre kekfwa, fer lakaz, ki Seselwa i a kapab ale e reste ladan. Pa an permanans aköz kekfwa pa tou dimoun ki pou anvi al reste an permanans.

Me si mwan mon anvi al pas 3 mwan oubyen 1 mwan annan vakans, oubyen mon oule pas 1an. Mon oule lwe en lakaz lo en zil elwanye, mon ti devret kapab fer li - aste tou mon bann provizyon dan laboutik zil parey bann dimoun ki travay lo zil i fer. Viv mon lavi normalman epi retourn isi. Pou donn nou en loportinite, pou donn dimoun loportinite *enjoy* nou bann zil elwanye.

E finalman *cash crops*. I annan *cash crops* ki kapab ganny eksplwate ankor. Lontan nou ti fer koko lo bann zil elwanye, ozordi kekfwa nou pa kapab fer koko me nou kapab fer palmist, nou kapab fer lavanniy nou kapab fer keksoz lo en baz komersyal a *grande échelles* parey nou dir an Franse. Donk loportinite i la.

Lekonomi Ble i annan son departman, *Marine Special Plan* in donn nou atribisyon ki sa ki



nou kapab fer dan nou teritwar maren. Onorab Waven William ozordi in *dangle* devan nou posibilite annan en lekspansyon – (si mon kapab dir li koumsa) nou lavi sorti lo sa bann pti zil granitik kot nou reste la ozordi. E al dan bann lezot zil e eksplwat zot, e kapab eksplwat zot avek benefis.

Ile Denis in montre ki lagrikiltir i kapab marse, konzwentman avek tourism. Enn i mars avek lot. Zot in montre sa. Si zot, zot kapab fer Mr Speaker lezot i kapab fer.

E mon le felisit donk Onorab William pour son Mosyon ozordi. Mon ti a kontan koz bokou plis lo la, mon annan en kantite keksoz pou dir, me mon felisit li ki in donn nou loportinite pour regard en pti pe enn nou teritwar ki annan de fwa *we take for granted*.

E pou nou dir avek nou lekor sa se nou zil elwanye. Nou zil i la nou bezwen eksplwat zot, nou bezwen servi zot, nou bezwen *enjoy* zot pou nou benefis. E pou benefis bann dimoun ki pe vin apre nou. Mersi Mr Speaker.

**(APPLAUSE)**

**MR SPEAKER**

Mersi Onorab. Bon mon ava envit Onorab William pou fer son *summing-up*.

**HON WAVEN WILLIAM**

Mersi Mr Speaker. O debi menm mon ti a kontan remerisi tou bann Manm lo kote *LDS* ki'n koz e siport sa Mosyon. Mr Speaker, i osi bon ki nou met lo rikord, ki dan sizyenm Lasanble Komite Zil ti enkli osi menm *LDS* an menm tan ki Manm sorti lo kote *US*.

E mon vwar ki nou pa'n ganny zot kontribisyon vizavi sa Mosyon. Me sa i pa en problem.

E Mr Speaker, Mosyon parey tou bann Manm in dekrir, i annan son lenportans e son merit. E mwan mon ganny gide par sa bann zoli parol ki'n ganny ekrir dan manifesto.

E parey mon'n dir mon pa ti a kontan ki sa bann zoli parol i reste koman bann mo e bann fraz dan sa manifesto, me ki i ganny sa *backing support* e volonte politik pou nou kapab vremen delivre sa. E fer ki tou bann Seselwa, bann ki serye ki annan proze ki annan potansyel, ki zot kapab ganny sa sans pou al investir lo nou bann zil elwanye.

Mr Speaker, parey mon'n dir, i pa nou lentansyon dir ki *IDC* fodre i frenmen. E mon

anvi dir ki avek konpetans leksperyans ki zot in gannyen ozordi, avek tou sa letan devlopman nou vwar zot koman en akter vremen kle pou kapab donn sipor.

E ki i demande se ki nou asiz ansanm pou kapab vwar dan en fason vremen konpreansiv e dan en fason soutenab, vin avek en plan stratezik, pou nou kapab fer Sesel kree ankor plis larises ki nou a kapab siport sa bann proze sosyal ki nou anvi fer dan pei.

Mr Speaker, avek sa de pti mo ankor enn fwa, mon pou dir mersi tou bann Manm ki'n donn sipor e annou bouz devan. Mersi.

**(APPLAUSE)**

**MR SPEAKER**

Mersi Onorab. Bon prezan mon a met Mosyon devan pour vot bann Manm. Par formalite mon a relir Mosyon Onorab William, pou zot zis tenir an kont sa ki i pe propoze.

Prenon kont vites devlopman lo Mahe e bann zil pros, pou satisfere demann lespas biznes, later rezidansyel e lagrikiltir, sa Lasanble i demann Gouvernman pou ankor revwar lafason ki sa bann zil elwanye pe ganny zere. Dan

en fason pou kree ankor plis loportinite pou plis devlopman soutenab lo serten sa bann zil ki annan potansyel.

Mosyon i lir koumsa. Manm ki an faver lev lanmen silvouple. Mersi. Okenn Manm ki kont?

Lo kestyon sa Lasanble i demann Gouvernman ankor revwar lafason ki bann zil elwanye pe ganny zere, 23 Manm in vot pour, 0 kont e 7 abstansyon. Alor Mosyon in aprouve par Lasanble.

**(APPLAUSE)**

**MR SPEAKER**

Bon mersi bokou. Nou a pran poz la e nou a rezwenn 2er edmi.

**(BREAK)**

**MR SPEAKER**

Bonn apre midi tou dimoun. Bonn apre midi tou Manm Onorab. Nou a rebran travay pou apre midi avek Mosyon Onorab Gervais Henrie. Onorab.

**HON GERVAIS HENRIE**

Mersi Mr Speaker. Bonn apre midi tou dimoun. Mr Speaker, Mosyon ki mon pe table ozordi

apre midi e demann Lasanble pour siporte i lir koumsa ;-

Sa Lasanble i demann Gouvernman pou inisye en legzersis, pou etabli vre popilasyon diaspora Seselwa atraver lemonn. Rezilta en tel resansman a ede enfliyans Polisi Leta ver partisipasyon tou Seselwa atraver lemonn dan proses devlopman nasyonal a lavenir.

Mr Speaker, sa Mosyon i en lide ki depi dan sizyenm Lasanble, nou ti pe zve avek e dernyerman la nou'n table li. E alor mon krwar i annan nesesite koman en Lasanble Nasyonal nou reflexir en pti pe lo sa size. Sa tenm diaspora ki koz lo en popilasyon ki'n kit zot pei natal e etabli zot aletranze, dan en lot pei setadir ;- in sanze avek letan e i napa en definisyon egzakt.

Souvandfwa i ganny definir koman bann imigran e desandans bann imigran ki zot lidantite e zot lapartenans i ganny definir par zot leksperyans kote zot sorti orizinalman.

Serten dimoun i definir diaspora koman bann ki'n sibir deplasman fors. Bann ki ankore idantifye zot avek zot pei lorizin ler zot pe viv aletranze. Sa definisyon i non selman pu bann premye zenerasyon

imigran, me osi zot desandans otan ki zot gard en lyen avek zot pei natal.

Bann lyen i kapab kiltirel, lengwistik, istorik, relizye eksetera. En diaspora i ganny formen volonter ou envolontermen letan en dimoun i kit son pei a la resers travay, loportinite komers ouswa pou li sov konfli avek persekisyon.

Bann ki gard e mentenir en koleksyon kolektiv a zot later ansestral, i kapab tonm dan sa kategori. Bann ki kontinyen gard kontak avek zot pei lorizin parey nou dir, e bann ki gard group lanmitye e sipor pou zot bann konpatriyot ki sorti dan menm pei avek zot ;- parey nou antann ki Ostral i annan en group Sesel ki detanzantan zot zwenn Perth e anmas larzan, anvoy Sesel pou bann plizyer lakoz.

En lot faktor ou eleman sa size diaspora se *brain drain*. Sa i ler i annan en group dimoun, sirtou bann dimoun ki kalifye koman travayer ki'n byen ganny antrennen, edik e talante. I kit zot pei natal par grap e souvandfwa ler sa i arive, par deryer sa pei kot zot in kite, i kre en serten problem pou sa pei.

Me i osi annan sa ki nou apel *reverse brain drain*, kot travayer talante etranze an

retour i ranplas zot, me sa i pa neserman pwen esansyel mon prezantasyon.

Antretan dezyenm parti mon Mosyon i koz lo prosesis devlopman Nasyon a lavenir la sa konsep *brain drain*, *brain circulation* plito, ouswa *brain bank* i antre. Kot nou kapab benefisye avek talan, konesans, lekspertiz profesyonnel bann Seselwa ki'n kit pei e apre retournen.

Swa zot vin vakans, e dan vakans zot fer bann lesanz ouswa zot retourn net. Ouswa konmela avek egzistans teknolozi - anfet sa semenn i annan en dimoun Ostrali fek kontakte mwan, i dan domenn psikoloji li, i dir mwan i ou le fer ban pti sesyon. E si mon konn dimoun dan mon *constituency* ki oule swiv son bann sesyon *online*, vwala *link*.

So i annan sa bann keksoz ki nou kapab *tap into* sa bann konesans. E dan menm laliny ki nou pe koze, nou aprann yer poudir en Seselwa ki'n ganny apwente koman en lantrener en lekip par anba 23an dan *Primer League* – so, Kevin Betsy.

I bann dimoun koumsa Sesel i merit konnen zot egziste *somewhere* e detanzaot benefisye avek lekspertiz konesans e profesyonnalizm ki zot annan.

Akoz nou bezwen, e i enportan ki nou konnen konbyen Seselwa i annan an deor Sesel, kote zot ete, lekel zot, ki zot pe fer. Ki zot kalifikasyon e travay. E ki potansyel zot annan e ki mannyer nou kapab benefisye avek zot.

Nou pa pe vey zot zakasyon, me selman kwa ki nou kapab gannyen koman en nasyon e en pei. Bann *Policymakers* dan Gouvernman ozordi i bezwen annan larepons sa bann kestyon.

Sesel enn nou gran defi se koleksyon lenformasyon. Dan son larepons lo mon kestyon, lo lenplimantasyon *SDGs* yer, Minis Finans ti sit mankman lenformasyon koman defi nimeron enn dan nou pei. Si nou napa lenformasyon ki azour, nou pa pou kapab konnen egzakteman ki lenpak nou diaspora pe annan lo nou pei, e ki lenpak bann Polisi pe annan lo zot.

Ki mannyer Gouvernman i kapab etabli vre popilasyon diaspora. Kreasyon en *sit web* par egzanp ki ava ganny byen *advertise*, i en fason pou bann Seselwa volonterman devwal zot lenflasyon lo la, par ranpli en form *online*, en pe parey en resansman popilasyon.

Dezyenm, apartir lannen 2000, bokou pei atraver lemond, ler zot fer zot *census*, zot demann en kestyon spesifik avek dimoun lo zot pei lorizin. Kote ou ti ne. Lotorite Seselwa i kapab akse sa bann lenformasyon atraver relasyon diplomatik. E alors annan en lide lo kote son bann dimoun e kantite zot i ete dan sak kwen lemond.

Mon konsyan Mr Speaker, ki i annan lopoziyon vizavi zefor pou reste konekte avek diaspora. Non selman dan Sesel, me dan plizyer pei atraver lemond. Lo en kote, bann ki kont i dir ou en leta i dwatet annan lobligasyon zis lo son *tax payers*. Sa ki pe kontribye se li, lo son teritwar. Dan sa kare, mon konsernen avek zis sa ki la anndan.

Dezyenm zot dir ou, ou pa devret enterfer avek sa ki'n swazir pou sorti e ale. Zot nepli ou problemn.

Me an vi ki lemond pe pov en vilaz global, nou pli pti e konekte e kominikasyon i en eleman kle dan nou lavi kotidyen, mon santi poudir sa lyen i dwatet reste. Manm diaspora souvan i resevwar lenformasyon lo devlopman sorti dan zot pei.

Zot reste an kontak avek fanmir, avek bann paz, bann

*MDAs* e zot konn sa bann lenformasyon ki pe arive lo devlopman dan Sesel par egzantp.

Manm diaspora i donn lenformasyon lo bann diferan group e menm Gouvernman dan zot prop pei. Bann akter dan devlopman enkli Gouvernman li menm, i konsilte manm diaspora pou enform zot pli byen lo bann polisi e bann pratik lokal e bann standar enternasyonal ki pe ganny aplike.

Manm diaspora souvan i kolabor lo bann proze avek swa servis piblik, sekter prive ouswa sosyete sivil. E la mon mazin sa Profeser Cummings i sinyen, ki baze Leta Ini e ki pe travay avek *NISTI*. Alors sa i ase rezon pou konsolid sa relasyon e enteraksyon avek bann Seselwa atraver lemond.

Mon konsyan Mr Speaker, ki i annan letablisman en *Unit Diaspora* dan Minister Zafer etranzer, resaman. Me mon panse krwar ki, ki nou kapab fer, se batir lo sa ki sa *unit* ozordi i anvi fer.

Sa *unit* prensipalman mannyer mon'n konpran li dan son *set up*, se i la pou bann Seselwa aletranze reste an kontak avek Sesel par rod klarifikasyon lo plizyer size, e ganny lasistans kot i nesaser.

Si zot swazir ouswa napa nesesite kontakte sa *unit*, zanmen nou pou annan en portre kler lo lakantite Seselwa e zot desandans i annan atraver lemond e osi bann ki pe tenir en paspor Seselwa.

Wi, lo sa *sit web* Minister Zafer Etranzer i annan en *diaspora e-registration* ki ofer bann Seselwa pou soumet zot detay. Sa bann detay i partikilyerman bann detay kontak. Sa ki mon Mosyon pe demande, se pou al en pe pli an detay e ki alors ou annan en pli bon portre pli kler e azour ki nou konnen kot nou bann Seselwa i ete.

Si zot ava rapel, mon ti pe dir taler kote zot ete, ki zot pe fer, ki zot bann kalifikasyon. Ki bann domenn ki zot ladan. E sa alors i ti ava donn en pli bon portre. Akoz mon'n gete sa form, lo paz Minister Zafer Etranzer, me i bokou pli senp.

Alors parey mon ti pe dir. I posib nou demande ki nou batir lo sa linisyativ ki Minister Zafer Etranzer pe pouse. Apre tou dan en letan kot resours finansyel pei i tre limite, *pourquoi pas* ki en pe letan ki sa fasilite in la *online*, depi ler in ganny etabli, en evalyasyon i ganny fer pou avwar ki degre efektiv i ete.

E ler la, nou kapab propoz bann amelyorasyon neseser pou fer e asire ki plis lenformasyon i kapab ganny kolekte, pou benefis Gouvernman pou enfliyans son bann Polisi diaspora.

Bann lenformasyon a ede konnen lekel ki nou kapab aprobe koman bann profesyonnel dan diferan domenn. Bann teknisyen, bann konseye, investiser ou biznessmenn. Bann ki annan kontak pou fasilite bann lesanz ki ava benefisye nou koman en Nasyon e nou koman en pei.

Zot ava sezi poudir mon prezantasyon, pe plito get lavenir. Ki mannyer letan ou annan en group dimoun koman en potansyel pou devlopman, ki swa lo baz resours imen, ouswa finansyel, nou *tap into*.

E setadir ki mannyer nou kapab benefisye a lavenir. I napa naryen pou fer avek par egzansp largiman, eski sa bann dimoun i dwatet vote? Non, non, non. *Whoever* ki pe al lev sa largiman, *this Motion is nothing to do* avek-

Me zis konnen lekel sa bann Seselwa, kot zot ete e ki mannyer nou kapab *tap into* dan bann potansyel ki zot annan, e ki alors koman en pei ouswa ekonomikman nou kapab benefisye.

Alors an gro Mr Speaker, Sesel koman en pei 2021, i dwatet dan en pozisyon pou benefisye sosyo-ekonomikman, kiltirelman e dan son devlopman politik lo en baz kapasite imen finansyel e an term lide, inovasyon avek teknolozi, atraver son bann dimoun ki ankor anvi gard lyen avek Sesel koman zot pei natal.

Sertenman i merit annan plis piblisite lo sa nide e vwar kot non selman medya, me bann lofis tourizm, diplomatik ou komers atraver lemond, i merit asiste pou ki alors sa lide i ganny tou dimoun ki annan en lyen avek Sesel dan lemond, nenport landrwa kot zot ete zot konnen poudir sa pe arive e zot partisipe volonterman.

Donk, vwala lide ki mon pe propoz avek Lasanble, atraver sa Mosyon Mr Speaker, e mon swete ki zot konpran son rezon det e ki nou ganny sipor. Mersi.

### **MR SPEAKER**

Mersi, avan nou ouver deba mon ava demann segonnman pour sa Mosyon. Onorab Samynadin.

### **HON KELLY SAMYNADIN**

Mersi Mr Speaker. Mr Speaker, Mosyon in ganny segonde e

mon ti ava apresye dir de pti mo lo sa not.

### **MR SPEAKER**

Mersi Onorab pour segonnman. Ou annan laparol.

### **HON KELLY SAMYNADIN**

Mr Speaker, *sit web* Polisi pou imigrasyon. *migration policy.org* i afirmen ki bann diaspora i kapab zwe en rol enportan dan devlopman ekonomik zot pei lorizin, akoz zot kapab ede dan promosyon komers ek lenvestisman etranzer direk. Kree biznes e ankouraz devlopman lantreprenarya e osi transfer nouvo konesans ek konpetans.

Se avek sa antet ki mon'n deside anmenn mon sipor anver sa Mosyon, an vi ki dan sa nouvo normal swivan lenpak COVID-19 ki nou pe eksperyanse, kot nou trouv nou pe bezwen rod bann nouvo alternativ, pou nou kapab ede re dres nou lekonomi. Mon santi ki nou diaspora Seselwa ki ganny retrouve atraver lemond, i annan en gran lavantaz ekonomik pou nou pei.

Mr Speaker, serten pei koman Sid Afrik i kontinyelman regard bann diaspora koman en popilasyon perdi. Enn fwa ki zot in kit zot pei lorizin e en serten lezot minorite pa

enterese pou konpran bann fason ki nou kapab investir dan nou bann diaspora, ou menm pou mentenir kominikasyon regilye avek zot. E retrouv bann domenn lentere mityel pou bann kolaborasyon pratik.

Alors mon santi ki nou Gouvernman i devret servi sa loportinite dan nou konteks aktyel, kot nou retrouv nou pe bezwen ogmante nou rezerv deviz etranzer pou retrouv e itiliz nou bann diaspora ki'n disperse atraver lemonn pou investir avek nou.

Ki swa atraver bann *shares* ki zot kapab aste dan bann lakonpanyen lokal, ouswa atraver bann relasyon ou bann koneksyon ant bann prodikter, e bann konsonmater dan zot pei lorizin ek sa pei kot zot pe reste. E sa i premyerman dan domenn komers.

Dezyenmman, an sa ki konsern lenvestisman, bann diaspora i kapab ede fortman par ranforsi bann investiser ki sorti dan bann marse emerzan ou non devlope, atraver bann lyen ki'n ganny prouve pou kree devlopman larises.

E finalman bann diaspora i annan en forte dan transfer konpetans ek konesans parey mon ti'n mansyonnen o paravan. E atraver sa pratik zot souvan obtenir bann

konpetans, leksperyans e kontakte etranzer valab.

Ki an retour pou permet zot transfer tousala ver zot pei dorizin par kreasyon nou biznes ek lantreprenarya. Lantrenman ek *mentoring* bann travayer natif e osi par ranforsi bann lendistri emerzan.

An konklizyon Mr Speaker, mon santi osi ki Gouvernman i devret osi kree en lanvironnman lenvestisman ki ekitab, pou bann lenvestiser domestik, osi byen ki bann linisyativ pou nou bann Seselwa aletranze.

E byensir rezilta nou pou rekolte pli tar. Akoz i pa esansyel pou annan bann *incentive* spesyal pou bann *FDIs* e ki an rezilta sa Komite Biznes Lokal ti ganny met en kote kan se zot menm zot ki'n kontribye en kantite dan nou lekonomi pandan en kantite lannen, anba bann kondisyon difisil.

Alors nou pe met sa a latansyon nou Gouvernman, atraver bann sizesyon ki pe ganny anmennen lo sa Mosyon, pou itiliz nou bann diaspora Seselwa ki mon konnen pou benefisye nou pei e zot menm zot.

Vi ki sa pou en sours reveni pou tou lede partie an retour ed nou atenn nou bi pou



re dres nou lekonomi e ogmant nou rezerv deviz etranzer.

Vwala Mr Speaker, rezondet *pour laquelle* mon pe anmenn mon sipor pou sa Mosyon. Mersi.

**(APPLAUSE)**

**MR SPEAKER**

Mersi Onorab. Onorab Georges.

**HON BERNARD GEORGES**

Mersi Mr Speaker. Mr Speaker, sa se en size ekstrememan enteresan e mon pa kapab pa koz lo la. Akoz se en size ki'n pasyonnan dan tou son laform pandan tou mon lavi.

Son filozofi, akoz ki i annan en diaspora Seselwa, ki son grander, kote bann dimoun i ete, ki zot in *achieve*, eksetera, eksetera.

I en size pasyonnan. E de pli pasyonnan akoz dapre dir e mon mazine ki ler Mosyon i an pase e avek sa travay ki *MFA* pe fer atraver son *desk*, nou ava konn bann sif egzakt. Dapre dir en Seselwa lo 2 i viv an permanans an deor Sesel.

E si sa i vre, sa vedir ki nou popilasyon i apepre 200mil e non pa 100mil. I zis ki 100 mil ladan pa reste lo teritwar Sesel. Menm si i pa *one-to-one*,

nou konnen ki son kantite dimoun dan diaspora i gran.

Nou tou, preski dan sa Lasanble, mon sir ki nou annan en manm, mon konnen ou Mr Speaker, ou menm ou, ou annan *at least* 2 manm ou fanmir ki reste an deor Sesel. Mwan mon annan, lo 4 nou - 2 mon ser pa reste isi, pa'n reste isi pou en kantite letan.

Nou tou. Ou, laplipar nou, nou annan en dimoun ki nou konnen ki pa reste Sesel. Swa en fanmir pros, swa en fanmir en pe pli lwen. Me nou tou nou konn Seselwa partou, partou dan lemonn.

Annefe Seselwa in telman repann dan lemonn, ki i rar pou vwar en pei kot ou pa pou bat avek en Seselwa. Mon rapel Mr Speaker, apre ki mon ti'n sorti liniversite an deor Lonn e mon ti'n vin Lonn pou mwan fer mon katriyenm lannen letid Avoka, premye zour, premye zour Lonn, mon sorti dan stasyon *underground*, *Shepherds Bush*, kot mon ti rete pou sa lannen.

Premye keksoz mon fer ler mon sorti, mon tonm lo *pavement*, 2 dimoun pe vin ver mwan. E sa msye ek en madanm zot ti pe ganny en diskisyon e sa madanm i dir ek sa msye, avek en langaz en pe pli asezonnen ki mon pou servi la ozordi, "lekel ki pou montre

lekel ki mannyer pou fer pti isi la, antre ou ek mwan ?”

Mon'n soke. Tann kreol dan en lavi nouvo. Pa nenport ki Kreol, me Kreol Seselwa. *Right there* an fas e ou realize alors ki mannyer ou Nasyon in fofil en pe partou. Lonn, Lanmerik, Ostral, Moris. Bann landrwa koumsa *at least* ou a dir koumsa, ok.

Seselwa in ariv ziska *Falkland Islands*. Pa isi. Pa zis Minis Fonseka ki ti al laba pandan lager, me i annan Seselwa ki reste *Falkland Islands* e ki travay *Falkland Islands* ozordi. Ki sa ki pou anmenn en Seselwa al *Falkland Islands*?

Mon rapel enn fwa mon antre, mon ti Lonn. Mon antre *Marks & Spencer* parey nou tou nou fer ler nou annan en sans pou al aste en semiz *or whatever*, mon'n bat avek en Seselwa lo *pavement* deor, en lot apepre 3 minit pli tar lo en *floor*. E 2 lezot apepre 3 minit apre sa lo en lot *floor*. Pa bann Seselwa ki reste isi, bann Seselwa ki reste aletranze.

Donk Mr Speaker, tousala pou montre ou ki i annan Seselwa ki partou dan lemonn. E mon krwar i enportan, i enportan bokou pou nou konnen lekel sa bann dimoun,

konbyen zot i annan, ki zot in *archieve*.

Ki resours nou kapab tap avek zot parey sa 2 entervenans ki'n koz avan mwan ozordi in koze. E ki mannyer nou kapab reste koman en Nasyon an parantyer malgre ki nou annan en gran diaspora.

E nou pa tousel Mr Speaker. Nou pa tousel ladan. Tou ou laplipar bann pti leta zil i annan menm problem. Seselwa ankor nou kapab dir nou en pe partou. Morisyen kekfwa i pli, i plis diasporize ki nou. Partou kot ou ale, ou bat avek en Morisyen. Enn fwa Paris, mon pran en *taxi*. Drayver i morisyen.

Mon al dan lotel, resepsyonnis i Morisyen. Ou al sanz larzan, *cashier* i en Morisyen. Partou, partou zot in arive. Bann Zamaiken nou konnen in sorti *Jamaica* e zot in al Langleter, par egzanp.

Donk Mr Speaker, i pa selman nou. Me si bann lezot pei i fer resansman zot bann resortisan ki'n imigre, nou osi mon krwar i enportan pou nou fer sa ki pou nou. Akoz nou annan bann dimoun ekstrememan valab en pe partou dan lemonn.

Mover Mosyon in koz lo profeser Cummings, ou Dr. Cummings. Nou kapab koz lo

plizyer lezot dimoun. Mon konn *at least* en Seselwaz ki en Ziz Moris dan Lakour Siprenm Moris. Mon konn en zanmi lekol ki in travay pou en lakonpanyen, in envant en *switch*, en *computer switch* ki repann partou dan lemonn antye. Se en pti Seselwa ki ti travay lo la.

Ozordi i annan en Seselwa ki atraver dan biro *Lord Chancellor* Lonn. Donk, nou'n ariv en pe partou parey mon'n dir.

Me sa ki enportan e ki mon krwar nou pa devret bliye, se akoz ki nou bann dimoun in ale? E se sa mon krwar ki enteres mwan sertennman, me ki pou enteres Sesel an antye lo nivo istorik, kiltirel, filozofik. E i pa selman koudeta. Mon ava dir zot byen, byen vit. Malgre ki sa in zwe son par.

Me nou'n annan plizyer vag limigrasyon dan nou pei. Tel parey lezot pti leta zil e lezot pei in vwar. Mon krwar enn bann premye vag limigrasyon si nou kapab dir, ti dan bann lannen 1930 ler bokou Seselwa ti al Kenya pou rod travay. Tanzania.

Mon defen boper ti enn, *in fact* mon papa, son papa ti'n al travay laba e mon papa in ne Kenya. Donk ti annan sa premye vag bann dimoun ki ti

ale, zot zanfan ki ti ne laba. Nou ti apel zot bann *Kenya born* parey tou dimoun i konnen.

*In fact* ansyen Prezidan Faure, i enn sa bann manrmay ki son paran ti'n al travay *East Africa* pou rezon ekonomik akoz isi ti napa bokou travay.

Aprè dan bann lannen '50, '60' ti annan en tre for limigrasyon anver *L'Australie* akoz *L'Australie* ti pe ouver ekonomikman, i ti pe rod travayer e bokou Seselwa e Morisyen. Me sirtou Seselwa in ale e dapre dir ozordi i kapab annan 10mil ek 20 mil Seselwa ki reste *Lostralie* selman. E sa resansman, sa ki *mover* Mosyon pe demande i ava montre nou.

Aprè in annan dan bann lannen 1960 bokou Seselwa in al Langleter pou en keksoz ki ti apel *catering*. Langleter ti pe *recruit* bann dimoun pou al dan *catering*, pou al travay dan bann lotel, pou al travay dan bann restoran eksetera. Ozordi se bann dimoun ki sorti *Eastern Europe, Poland*, eksetera ki fer sa. Me dan bann lannen '60 bokou Seselwa in ale, bokou sa bann Seselwa pa'n tournen.

I annan bann ki'n al Bahrain, Beirut, Kuwait eksetera, bokou in retournen, me bokou pa'n retournen. E zot in reste laba. Aprè ler ti annan *tracking station*, bann Ameriken

in pran en kantite nou bann zenn fir, zot in marye avek e tousala in al reste Leta Ini e zot in fer zot fanmir laba, zot pa'n retournen.

E apre natirelman, apre le 5 Zen menm, 1977 anba politik sa ki pa kontan, leve ale, ti annan en lot vag limigrasyon pou rezon politik. E bann dimoun ki'n al an egzil e la ti annan en kantite Sid Afrik, Langleter li menm, *Canada, Montreal* in abzorb en bon pe sa bann dimoun ;- enkli pandan en peryod letan mon prop fanmir.

Se pour sa rezon ki 2 dan 4 nepli isi Sesel. E apre natirelman ti annan bann dimoun ki ale endividuelman akoz zot marye oubyen zot anvi al reste deor. Oubyen zot al etidye, zanmen zot retournen. Bann keksoz koumsa.

Tousala i fer ki Mr Speaker, nou'n annan en gran vag imigrasyon, ki fer ki ozordi nou annan en gran diaspora an deor Sesel. E mon krwar tou pei ki apel son lekor en pei, tou Nasyon ki apel son lekor en Nasyon. Tou antite legal ki annan en ziridiksyon lo en teritwar, i anvi konnen lekel son bann dimoun ki viv anndan son teritwar.

Se pour sa rezon ki i fer en *census* tanzantan, me osi lekel

son bann dimoun ki viv an deor son teritwar, pou bann rezon ki *mover* Mosyon in donneren

E mon ava azout en lot. Kekfwa en zour, kekfwa sa bann dimoun laba deor ava ganny drwa vote. E alors pou nou kapab konnen eski, eski nou pei pou al dan sa direksyon? Nou bezwen al lo baz lenformasyon.

Nou pa kapab zis pran en desizyon koman en Nasyon. Wi dimoun i devret vote oubyen non dimoun pa devret vote. San konnen kantite kompleksite e ki lefe i pou annan lo nou Nasyon si sa bann keksoz i arive.

Mon'n anvi partaz sa bann refleksyon Mr Speaker, akoz parey mon'n dir, non-selman sa i en size enteresan e pasyonnan. Akoz nou tou nou anvi konnen, ki nou, kot nou ete, akoz nou'n ale. Ki nou pe fer, ki mannyer nou kapab re nwe sa bann lyen avek bann dimoun ki'n perdi.

Re envit investiser. Pa etranze, me nou prop dimoun pou retourn dan nou pei e re angaz avek zot. Pa selman pou sa, me pa selman pou kiryozi pou konnen lekel sa bann dimoun, me osi akoz mon krwar ki en Nasyon ki pa konplet i pa pou zanmen en

nasyon ki pou kapab fer fas avek son lavenir parey i devret.

Alors Mr Speaker, i fer mwan gran plezir pou anons avek *mover* Mosyon, Onorab Gervais Henrie, Onorab elekte pou Mont Buxton ki son Mosyon pou ganny mon sipor apre midi. Mon remerisi ou Mr Speaker.

### **MR SPEAKER**

Onorab Waven William.

### **HON WAVEN WILLIAM**

Mersi Mr Speaker. Mr Speaker o debi mon pou dir ki mon pou aport mon sipor pou sa Mosyon. Mr Speaker sa Mosyon i en Mosyon ki vreman enteresan. Enteresan par lefe ki mezir ki Sesel pe pas atraver bann sanzman, sanzman fondamantal kot nou pe koz ouver ouswa kre en nouvo paz.

Sa Mosyon i annan son merit. Sa Mosyon i annan rezon pou nou debat lo li ozordi, e mon ti a kontan remerisye loter Mosyon ki'n anmenn sa size devan nou, devan Lasanble. Mr Speaker sa Mosyon i an 2 parti, i pe demann ki Gouvernman i inisye en legzersis pou etabli vre popilasyon *diaspora* Seselwa atraver lemonn, ki vreman i annan sa nesesite.

E ou a kapab dir ki mon sorti dan en fanmir kot mon

manman ti bezwen al travay *Bahrain* pou kapab sonny nou. I annan 7 nou e 3 parmi mon bann ser enn i *Canada*, enn i Lanmerik, enn i *Italy*.

E mon annan tonton e tantin ki'n mor Langleter, e mon pa konnen konbyen neve e nyes ki mon kapab annan laba deor. E pou en tel legzersis ganny fer mon krwar i tre enportan.

Mr Speaker letan nou pe vir sa nouvo paz e lavenir Sesel koman en Pti Leta Zil i enportan ki nou kapab tap dan sa bann resours ki laba deor ki nou bann sitwayen.

Mr Speaker nou Lasanble, e la mon pe refer avek manifesto *LDS* ankor pou eleksyon zeneral 2020, nou'n dir koman sa tim *LDS* nou'n dir avek Seselwa nou se ou lavwa dan Lasanble e en tim pou Sesel. E sa Mosyon Mr Speaker pe demontre ki vreman nou pe get dan en fason konpreansiv lavenir Sesel dan son devlopman, e pou fer sir ki Sesel i vreman vin pou tou son zanfan.

Mr Speaker letan mon dir Sesel vin pour tou son zanfan, i annan ki'n kapab donn diferan versyon aköz Sesel pa pou tou son zanfan, me nou pa pou al dan tou sa deba. Me i enportan ki nou regard dan nou *preamble* Konstitisyon.

Mr Speaker i ofer partisipasyon aktivman dan devlopman sosyoekonomik Sesel a tou Seselwa. I pa zis isi Sesel me osi aletranze.

Mr Speaker si ou get sapit 2 nou konstitisyon lartik 7 a 14 i donn detay klerman lo lekel e koman en endividi i ganny rekonnèt koman en Seselwa. Mr Speaker si nou al osi dan sapit 3 nou Konstitisyon i dekrir bann diferan drwa ki Seselwa, swa isi swa aletranze zot annan dan zot pei natal.

Mr Speaker ankor mon pou refer avek konstitisyon avek nou manifesto kot i dir, "Gouvernman ki mon pou gouvernen pou konsyan ki nou pa la pou zis nou tousel. Be pou nou pei e sitwayen nou pou komans en nouvo paz ek respe pou Lalwa pou lenstitisyon demokratik ki nou'n travay dir pou batir avek komitman anver lazistis e *fairness*."

Mr Speaker sa bann mo, sa bann fraz i enportan e mon vwar li dan sa Mosyon. Atraver bann diskisyon e mon'n ekout Onorab Georges Dirizan Zafer Gouvernman in dir bokou keksoz e loter Mosyon osi tou, e mon santi poudir sa deba i en deba ki vo lapenn i en Mosyon e size ki enportan pou lavenir.

Mr Speaker bokou nou ti a swete, ti a swete ki nou bann

manm fanmir ki deor ennsezour ti ava kapab trouv zot plas isi Sesel, swa koman rezidan permanan ouswa pe investir, ki a ed lekonomi Sesel. Mr Speaker me sa dan lavenir lafason ki nou pe ale mon asire ki i pou ganny realize.

Mr Speaker i enteresan osi akoz partou atraver lemonn ozordi nou pe koz en vilaz global. E sa vilaz global nou vwar Sesel koman en pti sou distrik kot ozordi sa balizaz ki nou ti pe koz lo la dan lepase, ozordi i pa tro egziste letan nou get lavansman dan teknolozi sirtou dan transportasyon.

E letan ou pe koz souvrennte osi i bann size ki dan lavenir. Mon konnen aletranze i bann size ki pe ganny tous lo la, me i enportan sirtou letan ou pe koz lo size diaspora. Mr Speaker mon pa pou dir plis ki sa, mon krwar loter Mosyon in prezant son ka devan e mwan avek sa de pti mo mon pou donn sipor sa Mosyon. Mersi.

### **MR SPEAKER**

Mersi. Onorab Philip Monthy.

### **HON PHILIP MONTHY**

Mersi Mr Speaker. Mr Speaker si ou fer en senp pti resers lo *Google* lo lavantaz ki diaspora pour en pei i kapab anmennen

ou pou ganny en levantay bann benefis ki en tel aktivite i kapab anmennen pou sa pei respektif kot sa bann dimoun i sorti.

Apard ki anvoy larzan dan zot pei lorizin, ouswa soutenir zot fanmir oubyen konstrir zot fwaye, *diaspora* i annan en gran potansyel pou devlopman *trade*, ankouraz lantreprenarya, lenvestisman e transfer bann *skills* e konesans zis pou mansyonn enn de tel parey *mover* Mosyon osi in pas lo la.

Mon rapel bann lepok kot ler en Manm en fanmir ti pe travay aletranze, mwayen kominikasyon avek sa ki ti dan pei parey nou granmoun ti dir, sete selman par en *call* enn fwa letan. Akoz ti vreman ser oubyen mwayen pli itilize sa letan sete par let ki ti pran plis ki en mwan parfwa pou ou ganny en repons.

E ou ti war sa Manm ou fanmir tou le 2an oubyen 3an ler i ti rann ou vizit. E Mr Speaker tousala in sanze ozordi avek lavansman dan teknolozi, kot nou kapab parey nou dir *at the touch of a button* kominik avek nenport ki dimoun dan preski nenport ki pei o monn.

E organiz bann rankont kot plizyer topik i kapab ganny trete e diskite e plizyer tranzaksyon i kapab ganny fer.

Dan sa *technological age* ki nou pe viv ladan i ofer sa posibilite pour ki plis i ganny fer pou rapros nou bann sitwayen ki pe viv dan en pei etranze avek zot pei natal.

Pour ki parey mon'n mansyonnen nou pei i a kapab benefisye avek bann kontribisyon pozitiv ki sa bann Seselwa ki pou en rezon ou en lot, pe vwar li pe vov dan en pei etranze i kapab anmennen pou son pei natal.

E mon santi ki la i sa moman pou ki nou komans valoriz o maksimonm kontribisyon e potansyel, nou bann ser ek frer Seselwa ki pe viv aletranze.

Mr Speaker mon osi a en moman mon lavi, mon ti war mon pe viv a travay dan en lot pei e mon aktyelman annan plizyer Manm mon fanmir ki pe viv aletranze. Mon ti emerveye pandan mon letan ki mon ti pe viv aletranze pou aprann, ki i annan Seselwa dan sa leta kot mon ti pe reste ki mon pa ti ekspekte *ok*.

Enn parmi mon pou mansyonn son non se Mr Brian Victor ki nou tou nou konn rezon, akoz i ti bezwen al imigre. E parey *mover* Mosyon in dir mon pa pou al ladan avek sa Mosyon ozordi.

Mr Speaker parey Onorab Georges in fer resorti Seselwa i partou dan tou kwen lemonn kot ou pa pou zanmen ekspekte.

Menm sa pei Lafrik kot mon pa ti zanmen ekspekte mon'n zwenn Seselwa. E zis detrwa mwan pase Mr Speaker ou pou rapel nou ti dan en *zoom meeting* avek detrwa Manm Parlman Franse e ki parmi in annan en Seselwa madanm Michel ki form parti Parlman Franse. E avek li mon mazine i annan bokou keksoz ki nou kapab aprann lo nivo parlamanter.

Avek nouvo ladministrasyon ki'n touzour met an valer nou bann frer ek ser Seselwa ki pe viv aletranze, mon santi ki la i loportinite pou Gouvernman komans mazin met an plas bann prosesis parey Mosyon pe demande.

Ki i a ede idantifye bann diferan pei kot nou bann konpatriyot Seselwa pe viv, e kre en kiltir ki a permet annan sa lesanz konesans e savwar fer pou ede dan devlopman Nasyonal nou pei.

Avek sa de pti mo Mr Speaker, mon pou aport tou mon sipor pou sa Mosyon ki mon vwar i annan lenportans imans Mosyon anmennen par Onorab Henrie. E mon

ankouraz tou lezot Manm Onorab pou fer parey. Mersi.

### **MR SPEAKER**

Mersi. Mon ava envit Onorab Henrie pou fer son larepons lo deba silvouple.

### **HON GERVAIS HENRIE**

Mersi Mr Speaker. Mon ti ava swete ki tou bann Mosyon ti pas koumsa dan Lasanble kot bokou bann kontribisyon bann pwen tre valab, *pointue* e ki nou kapab fer en deba dan lespas lerdtan edmi e met en lide devan Gouvernman pou konsidere.

Mersi tou bann entervenans. Bann pwen ki zot in fer resorti i sirtou souliny dezyenm parti Mosyon pour ki enn fwa ki nou ganny sa bann lenformasyon i ava lenfliyans Polisi pou nou kapab vwar ki mannyer vremen nou kapab benefisyen an term resours imen, finansyel, bann nide inovativ avek teknolozi sirtou dan diaspora Seselwa.

Be nou repete ki wi nou rekonnet zefor ki nouvo Gouvernman sa ladministrasyon in fer linisyativ ki in pran pou kre en *Unit Diaspora* dan Minister Zafer Etranzer ki permet bann Seselwa aletranze annan en kominikasyon direk pou okenn



bann size pertinan ki zot bezwen rod lenformasyon lo la e osi sa *diaspora e-registration*.

Me parey mon'n dir dan mon prezantasyon ozordi i en zafer ki lo sa *website* e si sa Seselwa napa volonte pou li vin devan e deklar son bann detay personnel, nou pou napa en zimaz kler lo kantite Seselwa nou annan deor.

So sa Mosyon li i pe dir avek Gouvernman fer en pe plis ankor. Savedir nou kapab servi sa komansman la, sa *unit* apre detrwa mwan ki in la, regarde fer en evalyasyon ki mannyer *response diaspora* in ete *build up* lo la, fer en pe plis piblisite.

Resanz en pe keksoz lo la pou met en pe plis lenformasyon ki zot kapab donn nou partikilyerman avek zot bann zafer kalifikasyon, landrwa kot zot pe travay, ki mannyer zot santi zot kapab kontribye dan Sesel dan diferan domenn. Ki swa dan nivo profesyonnel pou konsey bann group ou fer bann lesanz biznes;- fasilite bann lesanz biznes ouswa menm investir, sa en keksoz ki nou kapab *build up* lo la Mr Speaker.

E zis pour donn en apersi zeneral, an 2020 lannen pase setadir, ti annan 281milyon dimoun atraver lemond ki pe viv dan en pei ki pa zot pei

natal. So zot in vwar magnitud sa sityasyon imigran dan lemond. E sa sif in vremen ogmante konpare avek lannen 2000 ki ti selman 173milyon dimoun.

E ozordi pei ki son sitwayen i viv plis an deor son pei se *L'Inde* ki annan apepre 18milyon. Zis letan nou get otour nou Sesel nou kapab konpran akoz i 18milyon, *La Chine* osi, e *La Russie* osi i sa 3 pei kot son sitwayen i viv plis an deor. E bann pei ki pe akeyir dimoun plis i *Etats Unis* 51milyon zis an 2020.

*Etats Unis* i annan en kantite Seselwa. Anfet en fwa an 2011 nou ti dan en laboutik *Louisiana* nou de Ansyen Onorab Anbasader Marie-Antoinette Rose, prezan nou dan en laboutik ti annan en boug Kenya ki ti dan group i vini an tayan i dir nou i annan en madanm pe rod zot.

Prezan nou dir kwa, i annan en madanm pe rod nou, i dir wi i annan en madanm vini. Ler mon ale mon war sa madanm en madanm Mont Fleuri prezan mon dir be sanmenm lontan mon pa war ou, toultan mon ti bat ek li mon ti travay *SBC* mon bat ek li la kot *National House* pe desann, e li in ale i pe reste laba.

So i annan en kantite dimoun Seselwa *Etats Unis* parey Onorab Philip Monthy osi in fek dir nou. Lalmanny osi en kantite dimoun 61milyon e nou konnen poudir en kantite bann dimoun sorti *La Syrie* par egzanzp ki ti pe la Lalmanny apre lager.

*Arabie Saoudite* 13 milyon me *Arabie Saoudite* nou konnen i plito akoz travay, i pa en pei normalman ki dimoun pou al reste zis koumsanmenm.

*La Russie* 12milyon e Langleter kot bokou Seselwa i annan 9milyon. Me i osi annan pei ki zot toulezan la kantite dimoun ki vin kot zot i desann *Armenia* i enn *L'Inde* ki *surprisingly* li i donn plis son dimoun i ale i enn bann pei kot dimoun i vin mwens, *Pakistan* *Ukraine*, e finalman *Tanzanie*.

E si nou pou get en pti pe par egzanzp bokou ki'n entervenir in koz lo lakantite larzan ki sa bann migran i anvoy dan zot pei natal. An 2018 sa ti \$529bilyon. I monte an 2019 pou ariv 548bilyon, 2020 in desann 470bilyon e nou tou nou konnen rezon akoz. E bann pei kot larzan i al plis nou kapab devinen, nou war laliny kot bann *money changer* Sesel.

*L'Inde* \$79bilyon par an pe antre dan son lekonomi avek

dimoun ki an deor son pei - non selman pe travay me pe fer biznes. *Standing Orders* i ganny fer tou le mwan i ale *La Chine* osi parey 67bilyon, dezyenm *Mexico* 36bilyon, laplipar sa bann Dolar i sorti dan son pei vwazen *Etats Unis*, *Philippines* 34 bilyon, dan Sesel i annan bokou *Philipino*, e *L'Egypte* 29bilyon.

E *surprisingly* enn bann target *SDGs* target 7 - *SDG* 10 i koz lo sa zafer transfer larzan. I enn bann pwen kontansyon se komisyon ki bann dimoun i peye e enn bann target se pour fer desann sa bann *commission* ki pei atraver lemonn ziska 3poursan an 2030.

Donk nou vwar poudir tou sa bann lenformasyon i les nou konpran poudir i annan en konversasyon tre dinamik ki pe arive dan lemonn lo sa size diaspora atraver lemonn.

E donk Mr Speaker mon krwar i enportan ki sa Mosyon i pase pou dir avek nouvo ladministrasyon fer en zefor ankor en pe plis pou nou konnen kote nou bann Seselwa i ete, lekel zot, ki zot pe fer, ki mannyer zot kapab ed nou. E nou pou *surprise* ki kantite ki i annan.

Mwan mon'n zwenn Seselwa *Brisbane Australie*. 4 zenerasyon. Zot ti kit Sesel dan

bann lannen '60 bann Gonthier, e ler mon ti ariv laba 4 zenerasyon. Donk zot kapab mazine, me solman sa ki enteresan se ki bokou sa bann Seselwa i ankor gard en lyen avek zot pei natal, ki swa an tyer langaz zot ankor koz Kreol, zot kontan dan zot pti sega, manz bann zafer ki zot kapab ganyen ki nou abitye manze isi Sesel.

Donk mon krwar i pour enteresan si koman en pei nou sey devlop en lyen pli pre avek zot. E souvandfwa olye ki nou *rely* lo bann zafer *GOP*, nou kapab ganny nou bann prop Seselwa ki ava vini e asiste nou avek konesans e devlopman profesyonnel, ki zot in ganyen an deor Sesel e ed nou koman en Nasyon e en pei agrandi. Mersi Mr Speaker.

### **MR SPEAKER**

Mersi Onorab. Prezan mon a poz kekyon devan Lasanble pou vote. E mon a relir Mosyon pou rapel bann Manm;

Sa Lasanble i demann Gouvernman pou inisyé en legzersis pou etabli vre popilasyon diaspora Seselwa atraver lemond. Rezilta en tel resansman a ede enfliyans Polisi Leta ver partisipasyon tou Seselwa atraver lemond, dan

prosesis devlopman Nasyonal a lavenir.

Tou Manm ki an faver lev lanmen silvouple? Mersi. Okenn Manm ki kont? Mersi. Madanm Clerk. Vot lo kekyon;

Sa Lasanble i demann Gouvernman pou inisyé en legzersis pou etabli vre popilasyon diaspora Seselwa atraver lemond. In ganny 24 vot pour, 0 kont e 8 abstansyon, alor Mosyon in aprouve par Lasanble. Mersi.

Mon krwar nou'n la zis pour lerdan, me mon krwar nou kapab kontinyen si zot pa ankor tro fatige e nou a pran prosen Mosyon. E sa se Mosyon Onorab Cosgrow.

### **HON WALLACE COSGROW**

Mersi Mr Speaker. Bonn apre midi Mr Speaker. Bonn apre midi tou Manm. Mr Speaker Mosyon i lir koumsa;

*In accordance with Section 64(2) of the Interpretation and General Provisions Act this Assembly resolves that S.I. 53 of 2021 is annulled.* Mr Speaker.

### **MR SPEAKER**

Ou a koz lo Mosyon oubyen oule segonde avan?

### **HON WALLACE COSGROW**

Segonde.

**MR SPEAKER**

Nou a pran segonnman wi.  
Onorab Pillay.

**HON SEBASTIEN PILLAY**

Mr Speaker Mosyon in ganny  
segonde.

**MR SPEAKER**

Mersi. Onorab Cosgrow ou ava  
adrese.

**HON WALLACE COSGROW**

Mersi Mr Speaker. Mr Speaker  
sa Mosyon ki devan nou  
Lasanble ozordi, i enn ki pe  
demann sa Lasanble pou anil  
*S.I. 53 of 2021* e pou demann  
Gouvernman pou revwar  
lafason ki i apros sa  
egzanpsyon e bann lezot bann  
egzanpsyon ki permet bann  
Minis fer.

Sirtou an relasyon avek  
bann kondisyon lanplwa ki  
trouve dan *S.I. 34 of 1991* ek  
son bann amannman. Bann  
kondisyon lanplwa i enportan,  
akoz i permet serten proteksyon  
legal pou bann travayer e dan  
bokou ka anpes labi.

Wi Mr Speaker seksyon 4  
Lalwa Lanplwa 1995, i fer  
provizyon pou Minis fer serten  
egzanpsyon pou serten kategori  
e osi lo okenn provizyon sa  
Lalwa ki Minis i santi i bezwen  
ganny fer. E sa i normalman  
dan bann ka kot i annan en

lenpak lo en sekter, lo en group  
travayer ouswa anplwayer.

Sa mo sekter ek group i  
enportan e i lakle. I enportan  
akoz Lalwa i ganny fer pour ki  
tou i anglobe ladan. I arive  
parfwa ki konteks i sanze e i  
annan nesesite pou fer en  
serten egzanpsyon. Me sa ki tre  
enportan se ki ler nou pe fer sa  
bann egzanpsyon, nou fer li pou  
anglob mazorite posib.

Sa *S.I* ki devan Lasanble  
ozordi pe fer provizyon pou  
donn egzanpsyon de kategori  
anplwayer spesifik. Annefe en  
tre spesifik anba provizyon  
regilasyon 6(1) *S.I.34 of 1991*  
*conditions of employment*. Sa  
seksyon spesifik i regle la  
kantite *overtime* ki en travayer i  
kapab *perform* e ki son  
anplwayer i kapab demann li  
pou *perform* par mwan.

Sa de anplwayer se *Land*  
*Transport Agency Asphaltting*  
*Unit* ki en servis piblik e ki donn  
en servis esansyel pou nou  
sitwayen. I tre spesyalize e ou  
kapab tret li koman en group ou  
en sekter. Mon krwar si i annan  
en nesesite pou sa pti group  
travayer byen debrouyer zot  
devret pe kapab bouze. Me nou  
osi bezwen veye ki napa labi lo  
bann travayer.

Me i osi annan en  
lakonpanyen prive *Pilgrim*  
*Security* ki pe osi ganny

egzanpsyon sa provizyon Lalwa lo *overtime*. E sa i en egzanpsyon pou en sel lakonpanyen. Dan en sekter ki annan bokou plis lakonpanyen e ki petet pe resanti menm bezwen.

Petet ek sityasyon *COVID* i annan en nesesite. *Exemption* pe fer provizyon ki sa bann travayer i kapab *perform* ziska 100erdtan *overtime* e sa i 40 erdtan an plis ki Lalwa ti pou normalman permet.

Si nou al dan rezondet pou sa provizyon *overtime* i enn ki senp, se pour protez travayer kont *overwork* e pour annan en bon *work life balance* e osi pou anpes labi lo kote travayer.

Mr Speaker enn bann konsiderasyon kardinal dan formilasyon okenn Lalwa lanplwa se konsiltasyon triparti. Saverdir konsiltasyon Gouvernman ek travayer ouswa son reprezantan e anplwayer parey.

*Framework* i egziste ozordi pour sa se *NCCE* ki *National Consultative Committee Employment*.

Se la kot tou partener i diskite e agree. E Mr Speaker sa Lagreman sa diskisyon i enportan. Nou'n war par egzanp en Polisi ki *Cabinet* Minis ti fer sorti semenn pase, konsernan *annual leave* pou bann dimoun

ki dan *close contact COVID*. Nou'n war ki son reperkisyon apre aköz mank diskisyon.

Nou'n war ki bann lorganizasyon travayer in sorti e tou in sorti e zot in met zot mekontantman devan. Parkont i osi annan Mr Speaker en lasosyasyon sekirite ki petet zot bann lezot Manm i annan sa bezwen zot osi.

En lot pwen mon krwar ki devret, nou devret ganny fer resorti e ki mon krwar i enportan.

E ki ti size *Statement* bomaten par Minis Fonseka, i se ki Departman Lanplwa i en departman kle dan lalit kont trafik imen. Enn bann zouti kle ki zot servi pou *monitor* bann lenstans posib bann trafik imen, se bann kondisyon lanplwa. Mon santi ki ler nou donn bann egzanpsyon koumsa san *proper monitoring* nou kapab pe ouver en laport ki fer en travayer ganny abize dan sa fason.

Mon konsyan ki sa *S.I* i donn bann kondisyon. Me mon krwar ki si nou fer li dan en *framework* pou en sekter *rather than* pou zis en lakonpanyen, i riske ouver en laport tre danzere.

Alors an dizon sa, mon pou bezwen demann sa Lasanble pou pran

konsiderasyon sa bann largiman e demann Gouvernman, Minis pou revwar sa *S.I* e pour petet revwar sa egzansyon pou sa sekter an konsiltasyon avek bann partner ki i a fer sa egzansyon pli zis.

I tre enportan pou note ki avek sa Mosyon - mon pa pe anpes bann travayer sa 2 lorganizasyon ganny sa posibilite pou fer en pti pe plis saler avek *overtime*. Me mon pe senpleman met devan 2 pwen enportan, ki konsiltasyon e osi ki bann egzansyon pa ganny fer pour lorganizasyon spesifik me plito pou sekter.

E ki si i annan benefis pou gannyen ouswa proteksyon i ava vin pou mazorite be non pa pou serten.

Mr Speaker avek sa mon termin mon lentervansyon e mon ava fer mon *sum-up* apre pli tar. Mersi.

### **MR SPEAKER**

Mersi Onorab. Deba i ouver pou Lasanble. Manm ki oule entervenir. Onorab Pillay.

### **HON SEBASTIEN PILLAY**

Mersi Mr Speaker. Bonn apre midi Mr Speaker. Mr Speaker avan mon komans mon lentervansyon lo sa Mosyon petet zis donn mon permisyon pou eksprim mon senser

kondoleans avek lafanmir Nalletamby ki'n pas dan en doub *peril*.

En doub douler kot Mr Nalletamby in kot nou e apre nou'n fek tann *the passing away of* son garson Fred ki bokou nou ti konn li, ti vreman aktiv an relasyon ek lasosyasyon *NYS*. Son frer i en dimoun ki'n travay dan Gouvernman e nou tou nou konn lafanmir Nalletamby ki'n *involve* nasyonanman dan plizyer aktivite.

Lo lapar lafanmir ki'n kontakte mwan Mr Speaker mon oule osi eksprim swe ki malgre dimoun pe eksprim zot senpati, zot kondoleans, lafanmir ti ava kontan osi ki dimoun i respekte en pe zot *privacy*.

Akoz i annan dimoun ki pe *call* zot pe demann zot si i annan en lot zot manm fanmir ki dan *ICU*. E lafanmir i oule fer kler ki napa personn ki dan *ICU* e zot ti a kontan ganny serten trankilite. Sirtou ler lefe ki ou annan 2 dimoun ki'n *pass away* dan fanmir sitan close pandan sa letan. Mersi Mr Speaker.

Mr Speaker mon vin lo sa Mosyon. Sa Mosyon i pou Lasanble deside ki laliny ki nou oule pran. Mon konnen bann Manm lo lot kote in asize

bomaten in regard nou, e in annan menm lakizasyon ki si nou pa pe entervenir - (Onorab Samynadin ou'n koze bomaten mon'n ekout ou, mon'n ekout ou, so annan en pe respe)

*(Disruption)*

**MR SPEAKER**

Silvouple Onorab! Onorab Pillay! Tanzantan en Manm i dir en keksoz *off-mic*, nou pa kapab zis arete pour tou sa bann soz, silvouple zis kontinyen. E pa les sa deranz ou.

**HON SEBASTIEN PILLAY**

Ok, mersi. Mersi Mr Speaker. Mr Speaker i enportan aköz bomaten ler nou'n ekout zot, nou'n ekout deba lo premye Mosyon par egzanp nou'n vwar ki, ou'n vwar en vatevyen dan largiman me selman tou dimoun pe siport menm Mosyon.

I annan ki'n vwar poudir *IDC* in byen fer.

*(Interruption)*

**MR SPEAKER**

Silvouple! Onorab Pillay mon krwar sa ki bann Manm pe eksprimen se ki nou lo en lot Mosyon la. Mon pa pou *sensor* ou largiman, me selman ou ti'n

kapab entervenir bomaten letan ti annan sa Mosyon e ou pa'n entervenir.

So annou zis *move on* silvouple. Ou kapab striktir ou largiman ki mannyer oule. Lezot Manm *LDS* mon a demann zot en pe pasyans. Annou permet Onorab Pillay fer son largiman. Mersi.

**HON SEBASTIEN PILLAY**

Mr Speaker mon pe zis anmenn sa largiman otour sa Mosyon, pou nou kapab montre ki mannyer en Mosyon premyerman - en Mosyon li menm aköz i enportan pou Lasanble, ler i pe fer en desizyon diferans ant bann Mosyon ki nou'n swiv deba lo la bomaten.

E sa enn Mosyon, sa ki mon pe sey montre. E ler mon'n dir ki bomaten mon'n vwar ki i annan largiman ki pe siporte, i annan en bann in vini pa'n siporte, apre pa konnen kot pou ale apre nou'n annan en finisyon, ti zis pou montre ki ou annan Mosyon ki pou annan bann deba ki pou anmenn bann diverzans, dan menm dimoun ki pe siporte ki pa kler ki apre i napa en *binding effect* lo Gouvernman.

Me sa enn i pou annan en *binding effect* aköz, ler sa Mosyon pou'n, si sa Mosyon i

pase devan Lasanble, i pou annan en aksyon ki pou retir en egzansyon ki'n ganny donnen avek en lakonpanyen. So se sa ki mon pe ilistre.

Akoz par egzansyon si nou promosyon ki'n swiv apre, mwan mon'n fer li mon devwar mon'n rod lenformasyon avek Departman Etranzer ki'n dir mwan ler mon'n tann zot pe koze, ki i annan 23 Seselwa ki sorti dan diferan parti lemonn ki'n anmenn zot *queries*.

Me Departman Zafer Etranzer osi in fer kler ki bann dimoun ki pe anrezistre atraver sa *registry*, zot in demande ki zot lenformasyon i gard konfidansyel. I malere i Gouvernman LDS ki o pouvwar, me bann Manm LDS pa'n war li neser pou rod sa lenformasyon.

Me sa ki enportan *about* sa Mosyon ki Onorab Cosgrow in anmennen se ki, *the binding effect* ki i pou annan se ki ozordi Departman Lanplwa i annan sa pouvwar pou li donn en egzansyon.

E Departman Lanplwa, atraver sa egzansyon ki pou donnen, i pou permet en konpanyen pou li kapab *increase* son *overtime hours* ki i kapab donnen. E sa i riske dan en sekter ki ase konpetitiv e ki'n

ganny afekte parey tou sekter avek *COVID*, sityasyon *COVID*;-

Ki kapab ganny pran koman sa konpanyen, sa antite pe ganny li en *unfair advantage*. *Without inputting* okenn *improper motive* Mr Speaker, i kapab ganny pran koman en konpanyen ki pe ganny ofer en *unfair advantage* lo lezot konpanyen ki dan menm sekter.

E largiman fondamantal, largiman kardinal dan sa ki Onorab Cosgrow pe avanse atraver son Mosyon se ki i pe zis dir ek Lasanble, eski in annan en konsiltasyon? E propozisyon i se ki aköz ki sa loportinite sa egzansyon pa ganny *extend* pou lezot konpanyen.

I kapab i en koensidans ki sa lakonpanyen an keston i en lakonpanyen ki konekte, ki'n deza konekte avek en Minis servan dan Gouvernman, mon'n dir i kapab en koensidans. So sa ki nou pe regarde se lefe ki nou pe donn sa loportinite pou donn sa egzansyon, eski sa i al dan laliny pou fer *competition* parey Lasanble koman en antite i kontan demande ki tou konpanyen, tou bann antite i lo en *footing* egal?

I enportan sa pwen konsiltasyon aköz nou'n vwar



desizyon ki Gouvernman in pran lo konze an relasyon avek *annual leave* e *COVID*, kot nou'n tann en desizyon *Cabinet* ganny met devan. E mwan pou mon dapre mon perspektiv ler in al kot *Cabinet* savedir tou keksoz in fini ganny konsilte e *that's the final decision*.

Me en desizyon *Cabinet* i dir ou pe al re ganny konsilte. *So it's important* ki i annan sa konsiltasyon pou nou vwar ki sa sekter pa santi zot menm, ki i pou annan en *unfair advantage* ki pou ganny kree par en lakonpanyen ki pou kapab fer sa.

Apre en keksoz ki pou reste en pti pe dan pa tro kler, akoz bomaten nou'n ganny en *statement* ase serye, mon krwar ti enportan ki Minis in vin fer sa *statement*, e Minis in detay en kantite bann zefor ki zon Minister pe fer an relasyon avek *Trafficking in Persons*.

E mon krwar tou Manm in ganny loportinite pou konpran travay ki pe ganny fer par Minister Zafer Entern lo sa size. I kapab osi ganny vwar koman si ou annan bann etranze ki travay dan sa bann konpanyen. Eski sa *extension of zot bann*, *of sa bann working hours* i pa vid, oubyen i pa antre dan sa, annan en potansyel pou anmenn labi lo travayer.

Me *that's the secondary effect from* sa size konpetisyon. Mon krwar Onorab Cosgrow in fer son devwar, in *raise* en *prayer* ek Lasanble kot in war poudir in annan en *S.I* ki'n ganny mete i en regilasyon.

Yer mon ti'n *raise* en *similar prayer regarding* en *S.I* e Lasanble ti pran en desizyon pou les sa *S.I* pase.

E mon konpran i riske ganny *challenge* Ankour *I don't know* si zot pou arive. Me lefe i reste ki nou annan en lot *prayer* ki'n ganny *raise regarding an S.I*. E sa enn Mosyon li i pou *binding*.

Me Lasanble i bezwen pran son letan Manm i bezwen pran zot letan pou zot regard dan largiman ki Onorab Cosgrow in avanse.

Si zot krwar ki largiman Onorab Cosgrow i annan merit, zot a pran zot desizyon baze lo la, si zot pa krwar largiman Onorab Cosgrow in annan merit zot egalman pran zot dezinyon lo la.

E parey konstitisyon i demande si zot santi ki zot pa oule donn okenn lopinyon lo la, i pou *up to* Manm pou donn en desizyon. Parey nou Lasanble i toultan fonksyonnen ki Manm i lib pou li swa koze, swa pa koze, swa vote swa pa vote, swa vot

kont, swa vot an faver. Manm i lib pou li fer sa.

So nou'n *raise* sa *prayer*. Nou'n anmenn sa devan Lasanble nou'n alert Lasanble lo la, nou'n alert Lasanble lo bann danze potansyel annan bann kalite egzansyon.

E byensir nou, nou napa en mazorite dan Lasanble pou nou fors nou desizyon. E i pou bezwen en demann, en lapel ki nou, nou fer avek bann Manm ki dan lot kote latab pou zot pran zot desizyon.

E *whatever* desizyon ki zot pou pran nou byensir nou pou respekte. Me piblik an deor i ava zize si zot, zot in pran, si Lasanble in pran *the right decision* oubyen non.

Mon oule demann ou leskiz Mr Speaker si lo komansman petet ou pa'n konpran laliny mon largiman, oubyen laliny mon largiman in sisit serten mekontantman lo lot kote latab i pa ti mon lentansyon.

Ti plito mon lentansyon pou anmenn mon largiman *from* perspektiv pou eksplike diferans sa en Mosyon e diferans sa 2 lezot Mosyon ki'n pase. Mersi Mr Speaker.

### **MR SPEAKER**

Mersi Onorab Pillay. Nou annan lezot lentervansyon. Onorab Labonte.

### **HON ANDY LABONTE**

Mersi Mr Speaker. Mr Speaker mon pa ti pou enterfer oubyen koze, entervenir lo sa Mosyon. Me selman mon krwar i enportan, i nesaser.

Vi ki sa Mosyon in sorti kot en *ex-Minister*, en ansyen Minis ki'n deza pran sa *portfolio* pou Lanplwa. So mon krwar i konn en pe byen bann zafer lo lanplwa.

E petet i, ou konnen mon ti en pe kalkil detrwa fwa ki mannyer mon pou vote lo sa Mosyon. Me selman mon krwar mon kapab tonm lo en konklizyon.

Akoz pou mwan mon santi ki Onorab Cosgrow i pa'n donn nou sifizaman. Sirtou mwan mon pa'n *convince* pou ki rezon nou bezwen anil sa *S.I.*

Akoz i pa'n dir nou si dan lepase in annan bann presedans, ki'n ganny pran anba menm seksyon kot bann lezot biznes in, ou - in pran menm, anba menm seksyon ki zot in ganny bann egzansyon parey.

Me selman pli enportan pou mwan Mr Speaker se ki konpare avek sa 2 entervenans avan mwan, mwan mon'n

ganny elekte dan sa Lasanble e mon annan en group dimoun ki'n met mwan la pou mon koz lo zot par.

E zot in dir ek mwan poudir tou keksoz ki zot santi zot pou benefisye ladan, i enportan ki mon vot an faver akoz mon la pou reprezant zot.

E mwan mon santi ladan, i annan mon bann zabitan ki pou benefisye, akoz ler i pe koz pou zot ganny en pti mwenza an plis, an menm tan i pou pe ankouraz lezot dimoun ki anvi leve debourye, travay parey zot menm zot lo lot kote toultan zot in dir.

I annan dimoun ki pare pou travay, pou donn tou la deor. E Lalwa petet i pa ti pe permet pou zot fer en pe erdtan an plis, pou zot ganny en pe plis reveni dan sa moman difisil pou zot anmenn en pe plis larzan se zot.

E atraver sa *S.I.* mon krwar i pou donn zot sa loportinite anba Lalwa pou zot kapab anmenn en pe plis larzan kot zot.

Alor se pou sa rezon ki mwan mon krwar mon pa pou kapab siport mon koleg Onorab, Onorab Cosgrow pou *quash* sa, pou anil sa *S.I.*, akoz i pa'n vin avek ase largiman. E mon krwar i pa fonde. Mersi.

### **MR SPEAKER**

Mersi Onorab. Onorab Woodcock.

### **HON WAVEL WOODCOCK**

Mersi Mr Speaker. Mr Speaker ozordi nou pe fer fas avek, *well* nou dan en kriz ekonomik. Nou pe fer fas avek en moman ase difisil kot reveni ki pe antre kot lakaz in diminyen en pe.

E i annan bokou dimoun ki'n - akoz sa sityasyon *COVID* in perdi zot lanplwa. E i annan plizyer dimoun, e la Gouvernman pe sey fer son mye pou sa pei rekipere.

An menm tan i annan plizyer dimoun ozordi Sesel ki zot pe sey fer en pti pe an plis pou zot kapab ganny en pti mwenza *extra*.

E ler mon pe get sa *S.I.* ki pe fer *exemption* pou en dimoun, en lakonpanyen e son travayer dan sa lakonpanyen kapab fer en pti pe plis *overtime*.

Akoz dapre sa ki ganny *permitted under regulation 6(1), regulation 6(1) of the Employment Condition of Employment Regulation* i deza fer provizyon ki en dimoun i kapab travay *up to 60 hours overtime*.

Sa ki sa lamannman pe fer se pou permet en dimoun pou

fer plis ki sa *60 hours overtime* kot i kapab travay *up to 100 hours*. Me selman i annan en *misapprehension* la, ki *Leader* Lopozisyon pe sey met deor.

In sey ankadre sa lo prezantasyon *Statement* ki Minis in fer bomaten zafer *human trafficking* pou obliz dimoun, pou fors dimoun pou fer travay *extra*.

Me i paret mwan ki Onorab *Leader* Lopozisyon pa'n lir menm *S.I.* ki nou tou dan Lasanble nou'n lir. Akoz dan sa *S.I.* i fer kler *a worker shall not be obliged to perform overtime*.

E en boug ozordi li i konnen poudir sityasyon i ase serye, keksoz, pri lavi in monte e nou pe sye fer nou mye. E menm ler Gouvernman ti pe pran desizyon, desizyon pou reouver nou pei pou ankouraz touris vin Sesel, zot pa ti anvi pei i ouver.

E akoz nou'n ouver pei, ozordi lekonomi pe sey refer, i annan en pe plis travay, lanplwa pe ouver, *tourism* sekter pe releve.

E i annan dimoun ki i bezwen sa soulazman, li i santi poudir mwan mon anvi travay, mon kapab travay. E dan plizyer lakonpanyen i annan bann *managers* ki koze ek zot travayer.

Si li sa travayer i dir *ok*, i pare pou fer son *60 hours overtime* e i anvi fer en pti larzan *extra*. Alor sa lakonpanyen in demann en *exemption* pou li son travayer kapab fer son larzan atraver *40 more hours* travay pou li ganny en mwenza *extra*.

Be li si i anvi fer son travay, akoz ki nou, akoz ki en *ex-Minis* ki'n deza mon krwar si mon pa tronpe, pran *portfolio* Lanplwa, i anpes en boug ganny en pti larzan an plis pou anmenn se li kot son lakour? Mr Speaker li i *ok* li.

Li i annan son milyon larzan *forgo* ki i ti gannyen, i lo son kont, i annan tou son larzan i annan, i normal, i korek li.

Me i annan en pti malere ozordi i oule fer en pti *extra* travay pou li siport e soutenir son fanmir, en boug i vin anmenn en *S.I.* pou anpes en boug fer en pti *overtime*. Mr Speaker,

*(Disruption)*

### **HON WAVEL WOODCOCK**

... en Onorab Mr Speaker, mon a korize.

### **MR SPEAKER**

Ale-ale-ale.

**HON WAVEL WOODCOCK**

Mr Speaker.

**MR SPEAKER**

Onorab, Onorab Woodcock.

**HON WAVEL WOODCOCK**

Yes.

**MR SPEAKER**

Mon pe tande konplent sorti lot kote. I annan en pwen. Onorab Cosgrow i annan drwa anmenn en Mosyon e i annan drwa anmenn en Mosyon pou anil en *S.I.*

Mon pa krwar i byen pou ou akiz li or keksoz ki pa tro *proper* dan sa ki in fer. In anmenn son Mosyon i annan drwa anmenn son Mosyon annou pa refer sa avek son ka personnel. Silvouple kontinyen.

**HON WAVEL WOODCOCK**

Mr Speaker mon presede.

**MR SPEAKER**

En moman.

**HON WAVEL WOODCOCK**

Onorab Cosgrow pou annan son *Right to Reply* apre, i ava, mon a-

**MR SPEAKER**

Ou annan en *point of order*. Ale ki ou *point of order* Onorab Pillay.

**HON SEBASTIEN PILLAY**

Mersi Mr Speaker. Mr Speaker anba nou *Standing Orders ok*. *Order 8* Onorab Henrie, ou *Chairman Standing Order* li.

**MR SPEAKER**

Ale.

**HON SEBASTIEN PILLAY**

Apre osi nou Konstitisyon, *ok*. Speaker *is the presiding officer*. Ler ou pe *preside*, mwan ou'n aret mwan *midway* pou mon klarifye mon largiman ki mon'n fer ek ou.

Onorab i ganny sans fer tou son largiman, apre ki ou pou dir li. Sa ki nou pe demann ek ou, o moman ki i pe fer sa largiman, at least egzers sa lendepandans, pou dir ek li koumsa-

*(Disruption)*

**MR SPEAKER**

En enstan silvouple. *Order!* Wi, ale Onorab Pillay terminen.

**HON SEBASTIEN PILLAY**

Anba sa *order* se ou ki deside. Ou pa kapab, si ou desizyon se ki ler en Manm pe

koze e i pe fer son lentervansyon, ou, ou santi poudir i pe al dan en direksyon ki pa devret ale, ou devret aret li o moman ki i pe fer li parey ou'n fer ek mwan!

*(Disruption)*

**MR SPEAKER**

Silvouple-silvouple.

**HON SEBASTIEN PILLAY**

Non. Mon pa pe dir li ki pou fer.

*(Disruption)*

**MR SPEAKER**

Silvouple les Onorab Pillay fini son pwen! Silvouple terminen koumsa nou a kapab avanse.

**HON SEBASTIEN PILLAY**

Mwan mon pa pe dir Speaker ki pou fer, mon pe dir Speaker si dan en sirkonstans zot azir dan sa fason, ou bezwen azir dan menm fason dan lot sirkonstans.

Ou'n esper li fini fer sa pwen, fer en latak lo Onorab Cosgrow, mank respe pou Onorab Cosgrow, apre ki ou pou dir li.

**MR SPEAKER**

Ok, mersi.

**HON SEBASTIEN PILLAY**

Mwan mon pa'n fer sa!

**MR SPEAKER**

Mersi. Ok, petet mon'n en pe dousman pou reazir e petet akoz mon vye parey zot in akiz mwan ki mon vye-

*(laughter)*

**MR SPEAKER**

Mon aksepte, mon aksepte mon laz e mon napa okenn eskiz pou fer.

Mon a fer Onorab Pillay remarke ki li osi in fer plizyer fraz avan ki mon ti - Akoz mon pa santi poudir i byen, pou mwan zis aret en Manm dek ki mon komans soupsonn en keksoz.

Akoz mon pa la pou mon striktir largiman sa Manm mwan. Mon bezwen regarde kote i pe ale. E sel keksoz ki mon'n dir li, anmenn son largiman ver sa Mosyon ki la.

E lo kote Onorab Woodcock osi mon'n ekout li pou en pe letan. E ler mon'n santi in ler pou entervenir, mon'n entervenir. Mon pa oule pran bokou letan deba.

Alor Onorab Woodcock konpran mon pwen. Annou met ka personnel, Onorab Cosgrow de kote, son Mosyon i

*stand*, kontinyen lo ou largiman.

### **HON WAVEL WOODCOCK**

Mersi Mr Speaker. Mr Speaker apre tou sa *exemption* i zis pou lan. Nou bezwen konpran, si en boug i anvi ed son lekòr, mon pa pe, ler mon pe mansyonn en boug, mon pa pe koz lo Onorab *ex-Minister of Honorable Cosgrow*.

Mr Speaker, ou konnen ozordi la Sesel, nou pe koz *Employment Act*, e i annan bokou dimoun partou dan lemonn pe sey debourye, i annan bann ki annan zot prop biznes ki ti a kontan investir lo bann zil elwanye.

E i osi annan bann Seselwa ki pou en rezon pou en lot, kekfwà pandan bann letan persekisyon, zot in bezwen bouz aletranze parey nou'n tann Mosyon lo diaspora.

Apre ou tann Mosyon par Waven William pli boner lo lenvestisman, loportinite pou bann Seselwa al investir lo bann zil elwanye.

Me sa ki sa sagrinan Mr Speaker, *caucus* lot kote latab, zot pa'n vwar li enportan pou koz lo 2 Mosyon enportan kot i konsern nou bann ser ek frer ki pe reste aletranze e bann lenvestiser lokal, bann Seselwa

ki ti a kontan al investir lo bann zil elwanye.

Me sa ki zot war pi enportan se pou zot, zot vin *quash* en *S.I.* ki nou pe sye ed en frer ek ser Seselwa la deor. Mr Speaker zot pa konn zot priyorite e i montre poudir zot pa vreman enterese avek lentere Lepep Seselwa.

E la ozordi get ki zot oule fer? Zot oule tir manze dan labous Seselwa. E sa Mr Speaker i vreman sagrinan. Akoz sa Mr Speaker, mwan mon pa war okenn nanryen mal ek sa *S.I.* ki pe ed nou frer ek nou ser Seselwa ki pe sey leve debourye, parey zot kontan koz lo la.

Avek sa 2 mo Mr Speaker, mon pa pou kapab zanmen siport sa Mosyon pou *quash* sa *S.I!* Mersi bokou.

### **MR SPEAKER**

Mersi Onorab Woodcock. Onorab Henrie.

### **HON GERVAIS HENRIE**

Mersi Mr Speaker. Bonn apre midi ankor enn fwa tou dimoun. Mr Speaker mon'n ekout Loter Mosyon, e dan son largiman in prensipalman avans 2 pledwari avek Lasanble.

Pou dir ki i ti a prefere vwar en pti pe plis konsiltasyon

avan ki sa egzansyon ki ganny fer provizyon anba *S.I.*, e in dir nou kot napa konsiltasyon i fer lev bann kontansyon e in donn nou legzanp *COVID* avek pran konze, an ka kot bann dimoun i teste pozitiv.

E dezyenman in dir nou ki i ti ava plifere vwar ki egzansyon i ganny donnen a en sekter partikilye olye ki bann lakonpanyen endividyelman. E mon apresye son largiman ki in met devan. Me letan Dirizan Lopozisyon in pran laparol vre lentansyon i ganny soulinyen.

Dan son lentervansyon in dir poudir faver pe ganny fer aköz koneksyon e in dir koneksyon avek Gouvernman. E i kler aköz enn ant sa 2 lakonpanyen ki pe ganny egzansyon se lakonpanyen *Pilgrims* lot kote latab in toultan kestyonn pozisyon Minis Roy Fonseka avek *Pilgrim Security*.

I vre li ki ti komanse sa konpanyen. Me ler i ti vin la devan nou ti *interview* li pou li pran son pozisyon Minis, i ti deklar son lentere e i lo *verbatim* Lasanble Nasyonal pou dir ki dezormen in retir li dan zesyon *everyday management, day-to-day management* of sa konpanyen.

I en pe dezonnnet lo zot par pou kontinyen lager sa lager fay. Si sa ki zot pe fer la mon

war ki zot pe target Minis Fonseka, e zot in servi bann mo labi travayer e sa pou mwan se zot pe diskrimin kont en lakonpanyen aköz en endividi k par deryer. Zot pe diskrimin kont en lakonpanyen aköz en endividi ki par deryer.

San pran kont son travayer e lanvi volonte bann travayer pou travay en pe an plis. Mr Speaker sa *S.I.* ki en pwen kontansyon devan nou ozordi *S.I. 53 of 2021*, i pa en zafer ki sa nouvo ladministrasyon in evante, i sorti permisyon pou permet fer sa i sorti dan en *S.I.* en regilasyon ki ti ganny pibliye an 1991.

E *Clause (6)(1)* sa *S.I.* i lir koumsa; “*Notwithstanding regulation 3, a worker other than a watchman (a) may agree (b) may in exceptional circumstances be required by his employee to work for up to 60 additional hours per month or an aggregate of 15 additional hours per week.*”

Savedir sa regilasyon date depi 91 i fer provizyon ki Lalwa Lanplwa li ki ti vin an ‘95 i dir poudir ki ou annan drwa fer *overtime* ziska 60 erdtan par mwan. E li sa regilasyon i fer leksepsyon ki ou kapab fer adisyonnelman 60 erdtan ki kapab tonm ou apepre, sa 60



erdtan i par lao e sa Lalwa i permet.

Aprezan nou konnen poudir i pa premye fwa ki mon repete ki sa provizyon i ganny servi alor i pa en formil mazik sa nouvo ladministrasyon. Nou konnen poudir ti annan en *S.I., S.I. 74 of 2016* sinyen par Ansyen Minis Idith Alexander le 7 Oktob 2016 ki ti donn permisyon plizyer lakonpanyen pou fer menm zafer.

E bann lakonpanyen sa letan ki ti benefisye anba la ti annan bann travayer *SLTA* ki en Lazans Gouvernman. I ti fer provizyon pou bann drayver ki travay avek *NAC* ki en Lazans Gouvernman. Pli tar ti annan en *S.I. 26 of 2020*, ki ti sinyen par Ansyen Minis Mrs Myriam Telemaque le 17 Fevriye 2020 ki ti fer menm provizyon poi plizyer lakonpanyen.

E en lakonpanyen sekirite zis parey *Pilgrims Security, Pegasus* ti ganny permisyon pou permet son bann travayer travay ziske 80 erdtan *overtime*.

En lot antite Gouvernman ki ti ganny permisyon se *Internal Audit* ki travay kot bann travayer kot Minister Finans ziska 100 erdtan ti permet zot. Ti osi permet bann travayer administrative ziska

100 erdtan. Drayver ki ti pe travay ek bann dimoun *Internal Audit* permet zot ziska 125 erdtan.

Bann travayer lakonpanyen sekirite *Seychelles Port Authority* ziske 90 erdtan, bann drayver *Masons Travel* ziske 90 erdtan, bann drayver e mekanisyen *workshop SPTC* permet zot travay ziska 100 erdtan.

Mr Speaker mon'n osi konstate poudir ki dan sa bann letan Onorab Cosgrow ti en Minis. In en Minis depi Oktob 2016 ziska Oktob 2020. Ler *Cabinet* i permet, en Minis siny en *S.I. it's a collective responsibility!*

*(Interruption)*

**HON GERVAIS HENRIE**

Ou ti agree *back then*, e ozordi ou war i annan problemm avek!

***(APPLAUSE)***

**HON GERVAIS HENRIE**

*It's a collective responsibility. Now* son largiman ki i pe fer, son largiman ki i pe fer, mon pa dakor pou zot anil en *S.I.* akoz mon krwar fondamentalman si koman en Lasanble Nasyonal nou anvi dir avek Egzekitiv pou dir *"look* sa kalite zafer nou pa kapab kontinyen. Akoz nou

bezwen protez travayer Seselwa. Nou bezwen met zot dan koton, nou bezwen protez zot, zot pou ganny abize.”

Konnen ki nou bezwen fer? Nou bezwen sanz net Lalwa Lanplwa ou konpran? E Lalwa Lanplwa, me Minis Cosgrow in deza Minis Lanplwa li, me zanmen in deza war provizyon ti mal?

*(Interruption)*

**(APPLAUSE)**

### **HON GERVAIS HENRIE**

An prensip, i ti Minis Lanplwa depi Oktob 2016 ziske ler apre i ti ganny, ti annan en *reshuffle* Zilyet 2017 kot Lanplwa ti ganny tire avek li son portfolyo i ti ansarz zis bann zafer lendistri.

Donk pou mwan, pou mwan Mr Speaker kekfwa i annan merit vreman pou ou reflesir dan sa direksyon. Me la sa ki nou bezwen vwar ek tou sa bann *S.I.* si ou lir ki arive se ki en lakonpanyen ouswa en sekter en sel kou i fer fas avek en sityasyon.

Zot in tann mwan nonm *SPTC*, i posib ki *SPTC back then* en kantite son bann bis in ganny problem mekanik ouswa in fer aksidan kot zot ti

bezwen travay *overtime* pou remet bis lo semen pou permet rann en servis piblik. Donk i al laba kot Minister Lanplwa i demann en egzanpsyon dan en dele letan.

E se sa alor ki ou pou vwar par egzanp i annan sa bann landrwa dan sa bann egzanpsyon, zot i ganny e lan zot in ganny 3an, zot in ganny 2an. E alor i pou en peryod letan, i annan ki'n ganny 3 mwan.

Me sa ki enteresan se ki ou vwar poudir par egzanp se ki li menm li Gouvernman i donn son travayer, i donn son prop antite en egzanpsyon ziske 3an, 3an ti napa labi travayer? 3 an ti napa labi travayer?

Dan en lan ou pe vwar labi travayer. Konmsi lekel taler ki ti pe koz largiman i pa balanse, i pa akorde, me zot pa'n gete pou sa bann zistwar? E prezan tousala i pa zis donn ou koumsa la i annan en seri kondisyon ki i atase avek.

Onorab Woodcock taler in sinyal dan sa enn *S.I.* ki devan ou, i dir ou li menm si mon pe donn ki sa egzanpsyon me si x i travay ek ou e x pa oule fer, x pa kapab ganny forse! Savedir x i ganny proteze kont lavi ladan i ekrir i dir ou *“a worker shall not be obliged to perform overtime.”*

Dan bann lezot kondisyon ki ti mete, zot in dir poudir zot bezwen “*the company shall sent evidence of overtime performed to the Ministry on a monthly basis for record and monitoring purposes.*” I annan lenstans kot zot in dir ek sa lakonpanyen ki i bezwen montre son recruitment program pou asire ki sa travayer i pa toultan pe oblize fer *overtime*.

Zot dir poudir a lakonpanyen i bezwen soumet tou bann zafer an ekri, pou montre poudir sa travayer in donn son konsantman pou fer sa overtime an ekri. I annan proteksyon deza ki sa bann *S.I.* i fer provizyon, ki labi travayer ou pe koze?

Konmsi seryezman 2021 zot war poudir travayer pou ganny peze ater pou ganny forse fer *overtime* ouswa tou dimoun i anvi debrouye aköz nou tou nou pe sey fer 2 bout zwenn? Ou konpran mwan?

Alor Mr Speaker largiman pa fonde, largiman pa fonde. Selman mon ava admet *as a fair minded individual*, kekfwaw i annan merit pou asize e reget sa sityasyon dan son totalite pou dir be eski ki mannyer nou kapab amelyore lo la?

Me dan sa ka spesifik ozordi donk largiman ki loter Mosyon in anmennen poudir i ti

bezwen konsiltasyon i pa bon. Aköz sa lakonpanyen in vini so spesifikman i annan en travay la li.

So mon mazinen poudir *pilgrim* ti annan en pe travay an plis avek sityasyon *COVID*, kot zot pa kapab fer vini travayer etranze i ganny *GOP*.

Donk i pe fer fas avek son bann servis ki i bezwen rann, son travayer i pare pou travay en pe an plis i demann sa egzansyon.

Me selman sa sityasyon zis pou lan in donn li. E sa zafer egzansyon pou sekter. Petet wi, be alor i en pli gran, i en deba pou en pli gro refleksyon, pou zis demande pou anil senn la lo sa 2 rezon ki zot in donner zafer konsiltasyon avek egzansyon pou sekter.

Mon dir kareman non - kareman non mon krwar plito e *Leader* Lopozisyon ki'n fer son lentervansyon kler, pou dir zot peb target en endividi viktimiz en endividi e target en konpanyen aköz son lenplikasyon avek en endividi. Pou mwan this is *political witch hunt* e mon demann mon kote *LDS* pou nou zet anba! Mersi.

**(APPLAUSE)**

**MR SPEAKER**

Mersi. Onorab Pillay, ou pou proteste, ou annan *point of order*?

**HON SEBASTIEN PILLAY**

Wi Mr Speaker. Mr Speaker i annan en *imputation* ki'n ganny fer lo mwan. I annan en mo ki'n ganny servi dan menm fraz avek mwan, e sa mo se viktimiz.

Mon'n fer kler dan mon lentervansyon;- mon'n fer kler dan mon lentervansyon ki mon pa pe vin *impute*, mon pa nou menm konekte nou Minis ek lakonpanyen. Mon'n dir lenpresyon ou ki'n fer sa koreksyon Onorab.

So mwan mon oule ki kategorikman, kategorikman ou *withdraw* sa mo 'viktimiz' akoz mwan mon pa dan pozisyon pou viktimiz personn! Mon pa krwar dan viktimiz okenn dimoun. Mon pa krwar dan fer malis okenn dimoun.

Mon fer mon largiman parey *Standing Orders* i permet mwan, parey Konstitisyon i donn mon anba Lartik 102 "*freedom of expression*" dan Lasanble ki mon pa'n abize.

E pandan mon karyer Lasanble mwan, byen rar e preski zanmen mon'n deza ganny en let kot en dimoun in dir mwan pou li demann en *Right of Reply*. So mon ti a kontan Mr Speaker ki sa mo

'viktimize' ki'n servi dan mon non i ganny retire silvouple. Mersi Mr Speaker.

**MR SPEAKER**

Mon a permet deba kontinyen. Mon pa krwar sa mo viktimize mannyer in servi li i en lakizasyon direk lo Onorab Pillay, petet. Onorab Henrie ou'n terminen ou? *Ok*, Onorab Arissol ou ti'n lev lanmen ou oubyen? *Ok*.

**HON SANDY ARISSOL**

Mr Speaker mersi. Zisteman lo sa laliny sa ki Onorab Pillay ti dir se ki i en koensidans ki *Pilgrim* in ganny sa egzanspsyon. Sa mon'n note, se egzakteman sa mo ki i ti servi e koneksyon avek Gouvernman.

Mr Speaker ou konnen mon krwar i nou dernyen zour travay ozordi e mon krwar nou pou fini lo en bon not parske letan mon get bann *US* mon vwar poudir zot fer lapenn. Zot fer lapenn dan lesans - ou konnen parey yer nou ti vwar en pti *Subaru* pe tay deryer en Ferrari, ki zanmen in arive zwenn nou Ferrari.

E la ozordi dan sa menm Lasanble Nasyonal nou vwar en Mosyon anmennen par Onorab Cosgrow Mr Speaker, en dimoun ki ti deza dan Gouvernman - parey nou tou

nou konnen, i pa en sekre i ti deza en Minis dan Gouvernman avan.

E parey i konnen son Gouvernman in ganny en defet dan dernyen eleksyon, e la nou vwar li dan Lasanble Nasyonal koman en Manm proporsyonnel pou son parti ki'n ganny en defet.

E sa menm Onorab Mr Speaker ozordi pe anmenn en Mosyon dan Lasanble Nasyonal pou nou *annul* en *S.I.* Sa ki enportan pou dimoun reflexir byen laba deor, konpran en keksoz, sa menm parti ki pe anmenn en Mosyon pou *annul* en *S.I* Mr Speaker, sa menm parti ki'n fer lapriyer apre ki zot in ganny en defet dan eleksyon dernyen fwa, pou nou met manze, met manze dan lasyet Seselwa, anmenn en pe plis larzan dan pos Seselwa!

Zot in anmenn sa lapriyer en sel tre pandan 9mwan. Bann zanfan pe mor lafen! Zot in sey promet goute ki zot pa'n kapab delivre. Olye donn 1000 dipen zot in donn 750;- *juice* zot in donn zis 800.

Ler bann paran in realize poudir ban *SPPF* ki asiz dan nou Lasanble Nasyonal sa pti gin zot ki reste Mr Speaker ki byento zot pa pou la ditou Mr Speaker, zot anmenn en Mosyon pou demann bann

paran ki pe travay dir pou son zanfan, anmenn en lasyet manze an plis kot son lakour. Minis, en ansyen Minis, ozordi en Manm Lasanble Nasyonal ki ti deza Minis Lanplwa, ki konn traka bann paran laba deor.

E i ti menm ansarz Sosyal i anmenn en Mosyon Mr Speaker e i oule ki nou lo kote *LDS* nou siporte, pour ki nou tir lasyet manze dan labous en Seselwa! Be rezon mon pa ganny en konpran vreman ki zot anvi fer, zot anvi donn manze Seselwa? Zot pa anvi donn manze Seselwa, zot anvi tote zot pa anvi tire.

Mr Speaker *SPPF* i vre, zot fer zis bann miting Kendrik e zot vreman pa tro konnen ki direksyon zot anvi ale.

**(APPLAUSE)**

### **HON SANDY ARISSOL**

Ozordi zot vin dan nou Lasanble Nasyonal, zot refize koz lo en Mosyon anmennen par Onorab William ki mon'n tann *Leader* Lopozisyon in koz lo la, en Mosyon ki annan pou fer ek zil elwanye. Selman letan mon get rapor zil mon war Onorab Pillay in sinyen lo la. Savedir Onorab Pillay ti en Manm lo sa Komite Zil Elwanye.

Me ler nou, nou anmenn en Mosyon pou demande ki nou

Seselwa i ganny posibilite pou li antre lo bann zil elwanye, pou li epanouir, pou li al plante, pou li rod son lavi, annan plis larzan, lasyet manze pou son fanmir, Mr Speaker ou konnen ki *US* i fer, zot refize koz lo la, e zot refize siporte!

Sa i montre poudir zot en benn ipokrit, parske zot koz lo en keksoz e zot fer le kontrè. Dezyenmman Mr Speaker.....

**MR SPEAKER**

Ale, vey en pe ou parol en, pa al tro.

**HON SANDY ARISSOL**

Mr Speaker ipokrit i dan leksik e leksik Lasanble Nasyonal ki ti donn nou.

*(Off-mic)*  
E ou la!

**MR SPEAKER**

Ale.

**HON SANDY ARISSOL**

Lasanble Nasyonal ki ti donn nou leksik. Mon dezyenm pwen Mr Speaker. Nou anmenn en Mosyon, pa dir mwan 'e ou la' ou 'e ou la' i *unparliamentary*!

*(laughter)*

***(APPLAUSE)***

**HON SANDY ARISSOL**

'E ou la' pou lisyen, sat bef ek koson!

*(Disruption)*

**HON SANDY ARISSOL**

Mr Speaker dezyenm Mosyon, dezyenm Mosyon,

**MR SPEAKER**

*Order, please !*

**HON SANDY ARISSOL**

Ekoute pa nerve, *relax*.

**MR SPEAKER**

*Order, please!*

**HON SANDY ARISSOL**

Dezyenm Mosyon ki nou'n anmennen dan Lasanble Nasyonal se diaspora anmennen par Onorab Henrie. Zot, zot pas zot letan sak fwa eleksyon ranpli avyon ek bann diaspora Langleter.

***(APPLAUSE)***

**HON SANDY ARISSOL**

Mr Speaker pran nou larzan pey bann *diaspora* pou desann pou vin vot pou zot! Dernyen fwa zot in napa larzan e zot in anmas en defet dan eleksyon.

***(APPLAUSE)***

**HON SANDY ARISSOL**

Se pour sa ozordi zot dan Lopoziyon. Ler zot in ganny defet dan eleksyon, e i annan plizyer zot ki pa'n pran par dan eleksyon pe koz gro labous ozordi, mwan mon'n debout dan eleksyon e mon'n gannyen.

Mr Speaker ler zot refize, akoz zot pa'n ganny eleksyon, zot pa'n kapab pey tiket bann diaspora ozordi Onorab Henrie i anmenn en Mosyon zot refize koz lo la e zot refizye vote Mr Speaker. Sa i montre lipokrizi Parti US!

**(APPLAUSE)**

**HON SANDY ARISSOL**

Zot fer keksoz e zot dir le kontrè. Zot bezwen *comme* dir Louise Bazar, ki mannyer i dir sa? “Be pran zot en desizyon we!”

*(laughter)*

**HON SANDY ARISSOL**

Konnen ki zot anvi fer! Apre zot vire zot dir ek nou Lepep pe note. Lepep in fini note depi le 25 Oktob lannen pase.

Lepep in met zot en kote, mesaz ki Onorab Ferrari ti dir ek nou dan Lasanble Nasyonal les LDS travay! Zot in anmenn S.I. Zot anmenn Mosyon, zot

anmenn *Urgent Question*, zot anmenn *PNQ*, la tou le Mardi zot *PNQ* i ganny defet.

Mr Speaker les LDS travay, nou ki'n ganny pouvwar pou 5an, Lepep in met nou la, zot tola, tola, mon pa tro krwar zot pou la ankor dan 5an parske dimoun, zot pe sey rod en fason pou zot fer Konvansyon Mr Speaker.

Parske ler nou pe koze i annan en kantite mirmirasyon an term *leadership*. Preske pa tou dimoun ki *happy* ek *leadership*. So dimoun deor pe note, e dimoun ava decide ki zot anvi fer.

Mwan mon anvi dir avek tou mon bann Manm, lo nou kote latab, nou'n byen travay pou sa term, ozordi nou dernyen zour e nou pou al fer nou dernyen vot pou sa Mosyon. Sa nou pou zet li parey Onorab Henrie in dir. Mon anvi dir mersi Mr Speaker pou mon lentervansyon!

**(APPLAUSE)**

**MR SPEAKER**

Mersi. Bon, napa lot entervansyon, mon a demann Onorab Cosgrow pou fer son larepons lo deba.

*(Interruption)*

**MR SPEAKER**

Pardon? Mersi! En pe lord silvouple, Onorab Cosgrow.

**HON WALLACE COSGROW**

Mersi bokou Mr Speaker. Mr Speaker vre Lasanble apre midi i enteresan, ler *US* i koze selman.

*(laughter)*

**HON WALLACE COSGROW**

Akoz ler *US* pa koze zot pa eksite lot kote !

*(laughter)*

**HON WALLACE COSGROW**

Mr Speaker mon pa konnen ki Lasanble ki Onorab Arissol ti pe gete yer, akoz mwan mon konnen ki sa *Subaru* in fer sa Ferrari ronfle ziska son masin i vin rouz !

*(laughter)*

**HON WALLACE COSGROW**

Mr Speaker pou nou tourn lo repons bann Manm Onorab, mon'n ekout atantivman bann diskisyon ki'n ganny fer, bann pwen ki'n ganny fer resorti. E anefef mon ti ekspekte serten latak personnel vi ki mon'n deza Minis Lanplwa.

Me set akoz mon'n deza Minis Lanplwa ki mon swe, e mon anv i ki keksoz i ganny fer petet an se moman diferaman. E se zot lot kote latab ki ti promet diferans, fer keksoz diferan, fer keksoz dapre sa sanzman ki zot in promet.

Ozordi i paret mwan nou lo nou kote ki pe montre zot sa sanzman ki zot in promet pep Seselwa.

*(Interruption)*

**R SPEAKER**

En pe lord silvouple!

**HON WALLACE COSGROW**

Mr Speaker largiman prensipalman ki'n vini apre midi lo bann entervenman, entervenman in dir ki poudir sa Mosyon ki mon'n anmennen pou *annul* sa *S.I.* mon pe tir manze dan labous Seselwa ki anv i travay ;- ki anv i ganny en pti mwenz, ki anv i fer en pti pe plis letan plis pou zot kapab sonny zot fanmir.

Mr Speaker mon pa konnen ki bout dan mon lentrodiksyon ki zot in lir sa, akoz si zot ti ekout byen mon lentrodiksyon e Onorab Henrie in *capture* en pti pe sa, dan son lentervansyon. Mon'n koz lo sekter, mon'n koz lo group,



mon'n koz lo *extend* egzansyon pou la mazorite.

Parkont zot bann lentervansyon zot pe defann, e la mon pa anvi antre dan sa kalite politik parey in ganny fer par lot kote latab.

Zot pe defann en lorganizasyon ki zot menm zot, zot konnen avek ki i afilye ki malgre menm in deklar son, lentere, in dir ki poudir i nepli dan *management*, me nou konnen pour ki sa lakonpanyen.

Zot pe defann en lakonpanyen kan mwan mon'n anmenn en Mosyon pou demann Lasanble pou *extend* sa egzansyon pou tou lakonpanyen sekirite Sesel, ki tou fanmir Seselwa, tou dimoun Sesel ki travay dan lakonpanyen sekirite i ava benefisye, i ava benefisye avek sa egzansyon e ki dan plas zis travayer, zis travayer...

*(Interruption)*

**MR SPEAKER**

*Order please !*

**HON WALLACE COSGROW**

... sekirite *Pilgrim* ki ava benefisye

**MR SPEAKER**

Annou les sa Manm fer son *summing-up*. Wi kontinyen Onorab Cosgrow.

**HON WALLACE COSGROW**

E ki zis, ki dan plas zis serten travayer serten lakonpanyen. Annefe en lakonpanyen sekirite ki tou Seselwa, ki swa dan distrik Onorab Labonte, ki swa dan distrik Onorab Woolcock, dan tou distrik tou dimoun ki annan zot, tou Onorab ki annan zot dimoun ki pe travay dan bann lakonpanyen sekirite, i a benefisye.

Ozordi si zot, zot decide, zot decide zet anba sa Mosyon parey zot in dir zot pou fer, zot pe zet anba posibilite zot bann *constituents* ki ti pou benefisye avek en *SI* ki kouver bokou, bokou pli larz ankor. Sa i pou mor lo zot, i pou mor lo zot ozordi sa dernyen zour Lasanble zot ava decide, zot ava konnen ki zot pou al dir avek bann *constituents* demen ki pa kapab benefisye avek en *overtime*.

Mr Speaker an dizon sa, parey mon'n dir mon, mwan mon pwennvi se ki nou bezwen annan plis konsiltasyon sirtou dan sa bann domenn kot i afekte kondisyon lanplwa bann travayer. I annan lenstans, nou konnen i annan lenstans kot

par egzanp bann anplwayer zot konnen poudir 60erdtan.

Me selman sirtou an relasyon ek bann travayer etranze, travayer etranze i travay en pe plis ki 60 erdtan e sa petet i pa ganny fer resorti.

Se sa ki mon'n fer resorti sa zafer *Human Trafficking* bomaten, pa dan en move fason, apre midi pa dan en move fason.

Me pou *point out* pou fer sir ki nou konpran poudir lenplikasyon, lenplikasyon donn ekstra *overtime* i posib i kapab *lead to* en serten ka *Human Trafficking*.

### **MR SPEAKER**

Onorab Arissol, gard silans en pe silvouple.

### **HON WALLACE COSGROW**

Sete sa rezon ki mon'n *point out* sa pwen apre midi. (Onorab Arissol ou'n fek fini koze les mwan) Wi, *ok*. So Mr Speaker i mon swe ozordi ki Lasanble i ouver lespri en pti pe pli gran e ki Lasanble i vwar lide par deryer sa Mosyon.

Pa neserman mon pa pe dir Lasanble, mon pa pe dir Gouvernman pa re anmenn sa Mosyon, pa re anmenn sa *S.I.* ankor. Me fer serten konsiltasyon i annan en lasosyasyon sekirite koz ek zot

gete si dan sityasyon *COVID* zot osi zot bann travayer pa ti ava kontan ganny en pti pe plis letan *overtime*.

E demen bomaten sa *S.I.* i ava kapab kouver en sekter, en group, e ki sa group isi annan ava benefisye pour ki nou tou isi anndan nou a konnen nou'n fer en keksoz pou Lepep Seselwa ki pou mazorite Seselwa.

So se sa mon *prayer* ozordi avek sa Mosyon Mr Speaker. Prezan nou lo sa kote nou pou vote nou pou vot pour, me zot si zot deside zet anba zot ava dir avek zot bann *constituents*, bann ki dan lakonpanyen sekirite ki pa ganny en overtime.

### **MR SPEAKER**

Onorab Arissol, silvouple!

### **HON WALLACE COSGROW**

Zot a deside ki mannyer zot pou eksplike. Mersi bokou Mr Speaker.

### **MR SPEAKER**

Mersi. Onorab Georges lo ki baz ou pe entervenir? Ou kapab dir mwan?

### **HON BERNARD GEORGES**

Mr Speaker mon oule *raise* en *point of order*, lo lentervansyon

**MR SPEAKER**

*Point of order ok, wi.*

*(Interruption)*

**MR SPEAKER**

*Order please!*

**HON BERNARD GEORGES**

*Content of Motion* Mr Speaker Onorab Cosgrow in dir ki sa ki li i anvi se ki sa *S.I.* i ganny *extend* pou kouver tou bann Lazans Sekirite. Se pa sa son Mosyon. Son Mosyon devan i demann *quash* sa *S.I.* Setadir aret *Pilgrim* fer *S.I.*

I pa'n demann, *with all due respect* mon'n ekout li byen mon pa'n anvi enteronp li, i pa'n demann amann sa *S.I.* parey in fek dir la, son Mosyon se pour anil sa *S.I.*, se pa pou enkli lezot se pou zet *Pilgrim* anba.

Alors i pa korek ler i pe dir ki se sa son Mosyon, kekfw se sa son lentansyon.

Me se pa sa son Mosyon, alor ler in dir ki se sa ki son Mosyon i dir i pa pe - I pe *mislead the house* e se pour sa rezon ki mon pe fer sa lentervansyon. Mersi.

**MR SPEAKER**

*Well, merci, merci.*

**(APPLAUSE)**

**MR SPEAKER**

Wi, selman, selman Onorab Georges, vi ki in fini fer son *summing-up* e Mosyon in fini mon krwar le pwen pou mwan entervenir in en pe depase. En lot *point of order* ankor? Wi Onorab Pillay wi.

**HON SEBASTIEN PILLAY**

Mr Speaker lo menm *order* ki Onorab Georges in *raise*.

**MR SPEAKER**

Wi.

**HON SEBASTIEN PILLAY**

Ki Onorab Georges in bliye dir ou? Se ki la fason ki en Manm i bezwen dil ek en *S.I.* i anba *IGPA*, e se sa ki Onorab Cosgrow in fer. Onorab Georges in war sa Mosyon lo *Order Paper* li, in war sa Mosyon lo *Order Paper*.

E pandan sa deba, sa Mosyon in pase li. So si zot nide in fini fer lo ki mannyer zot pou vote lo sa Mosyon, Onorab Georges pa kapab kontinyen sank fwa en deba in fini, i pou vin servi en largiman lo *Standing Orders* ki sa fwasi avek tou respe ki mon annan pou li pa fonde, pa fonde, pa fonde.

Akoz sa largiman lo *content* Mosyon Onorab Cosgrow napa naryen pou dir lo la, napa naryen pou fer ek sa. Se koumsa ki ou *quash* en *S.I.* e napa lot fason, e sa in ganny fer plizyer fwa dan sizyenm Lasanble e zanmen ou'n *raise* sa konsern.

So mon war li drol ozordi ki ou pe fer sa zis pou sey defet largiman Onorab Cosgrow, *come on* Onorab, les sa boug fer son travay, ou fer pou ou !

**MR SPEAKER**

Ok Onorab, mon'n tann ou Onorab, e parey mon'n dir nou'n fini debat lo sa Mosyon Manm in fer son *summing-up*. So i, sa ki mon kapab dir mon pa kapab retourn an aryer e refer son deba. So sa pwen vreman i, mon bezwen zis les li pase.

In ariv ler pou nou met sa kestyon devan Manm Lasanble pou vote e pou fer sa mon a re pran parol Mosyon mannyer in ganny prezante.

*In accordance with Section 64(2) of the Interpretation and General Provisions Act this Assembly resolves that S.I. 53 of 2021 is annulled.'*

Manm ki an faver lev lanmen silvouple. Mersi, Manm ki vot kont lev lanmen

silvouple. Silvouple vot ek zot lanmen pa ek zot labous. Mersi!

*(Interruptions)*

**MR SPEAKER**

Mon a ganny en pe latansyon silvouple. Bon lo kestyon *In accordance with Section 64(2) of the Interpretation and General Provisions Act this Assembly resolves that S.I. 53 of 2021 is annulled.*

8 Manm in vot pour, 24 Manm in vot kont e 0 in *abstain* so sa Mosyon in ganny rezete par Lasanble.

***(APPLAUSE)***

**MR SPEAKER**

Bon nou'n ariv a lafen nou *Order Paper*. Mon a remersye bann Manm pou zot partisipasyon ki'n ankor enn fwa avek bokou leksitasyon. I osi le moman kot nou pe al pran *recess*, parey zot konnen. Donk mon partaz sa avek Manm piblik kekfwa pa ti ankor ganny porte a zot latansyon.

Mon bezwen zis dir Manm mersi osi pou zot travay pandan sa sesyon. Mon espere anfen, mon felisit bann lenstans kot in annan bann korperasyon e deba serye. Mon regret bann lenstans kot in annan bann pwen ki'n al dan bann pwen

politik ki vreman pa touzour avans nou deba.

Me toudmenm parey mon'n toultan dir, mon'n toultan rekonnèt ki Lasanble i en landrwa ki Manm pou fer politik, e sa i vin parti dan sa ki nou fer isi.

Mon swete ki Manm i a ganny letan pou donn zot latansyon zot bann lezot latas, zot bann lezot responsabilite anver zot Komite ki zot travay lo la dan Lasanble, anver zot *constituency* e anver bann rapor ki zot bezwen annan avek piblik an zeneral.

Lasanble pou rebran travay le 6 Septanm e nou premye *sitting* i Mardi le 7. Alor mon a swet zot tou en bon *recess* e enn ki prodiktiv osi. Mersi bokou, nou ava *adjourn*.

**(ADJOURNMENT)**